

偏安排日事 迹

佚名

文硕阁

wenshuoge.com

目录

关于我们	3
偏安排日事迹卷一	5
偏安排日事迹卷二	20
偏安排日事迹卷三	38
偏安排日事迹卷四	49
偏安排日事迹卷五	60
偏安排日事迹卷六	71
偏安排日事迹卷七	84
偏安排日事迹卷八	94
偏安排日事迹卷九	109
偏安排日事迹卷十	120
偏安排日事迹卷十一	135
偏安排日事迹卷十二	155
偏安排日事迹卷十三	167
偏安排日事迹卷十四	170

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望可以帮助有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

偏安排日事迹卷一

崇祯十七年（甲申）四月丁亥，福王至自淮安府。

王讳由崧，神宗孙、先福王常洵之子。常洵，郑贵妃出；开邸河南府。十四年，流贼陷河南，遇害；世子播迁河北。终制嗣封，毅宗手择宫中宝玉带付内使赐之。十七年，复因寇入河北，流离入淮安。时北都失守，毅宗惨崩；以伦、以序，应属福王，而迎立潞王之议起。潞王名常淂，神宗侄也。因江南在籍诸臣恐福王立后，或追怨「妖书」及「挺击」、「移宫」等案，谓潞王立，则不惟释罪，且邀功耳。时以废籍少宗伯两入留都倡议者，钱谦益也。于是兵部侍郎吕大器主谦益议甚力，而右都御史张慎言、詹事姜曰广然之，丁忧山东佥事雷演祚、礼部郎中周鏞亦往来游说；独「逆案」为民阮大铖与凤阳总督马士英密，且心冀燃灰，书言不可。时王闻，惧不得，立书召南甯总兵高杰与黄得功、刘良佐协谋拥戴。刘泽清素狡，先附立潞议；至是，以兵不敌，改计从杰等。南都诸臣不知也，方列王不孝、不悌等七款贻漕督史可法转贻马士英为立潞王地；不知杰等与士英已歃血议立王矣。可法知事势已决，始具舟楫启迎；而吏科李沾与御史郭维经、陈良弼等复倡言于内，然持异议者犹呶呶也。独沾历阶而上，面折大器云：『今日之事何事！论典礼，则礼莫重于尊君；论典兵，则兵莫先于卫主。倘有异议者，即以一死殉之』！礼成告庙，约二十八日登舟迎驾。至是日清晨，大器意尚犹豫；沾心忿，驰至各台臣所，欲追寻异议之人，方定。先数月，士英书约沾等云：『北事果真，只有论序亲贤，早正名位，吾辈方可不负朝廷、不祸身家』；故沾争甚力。二十九日，王舟抵燕子矶。三十日，以王礼见百官，素衣角带，待茶款语。语及大行，辄哭失声；语嗣立，辄逊谢。

五月戊子朔，福王谒孝陵；入谒奉先殿，出驻行宫。群臣进见劝进，辞。

初一日，首谒孝陵，避御路，自西门入，祭告陨泣。毕礼，问「懿文太子陵安在」？遂往瞻拜。已入朝阳门，由东华门，步过殿陛，谒奉先殿；出西华门，止内守备府。诸臣入朝，拜讫，共商战守，可法奏对良久。御史祁彪佳奏以纪纲法度为立国本，言颁大号及用人二事。朝罢会议登极，〔□〕监国为便；盖愈推愈让，见王志复国耻，无亟登大位心。乃以金铸监国宝。

己丑，群臣上笺劝进；凡三上，不允，止允监国。

庚寅，福王监国于南京。

是日，王先行拜天礼；升殿，受监国宝。群臣礼毕，始退。兵部侍郎吕大器心忧前议，欲请后日即登极；御史祁彪佳力争，谓『监国之名极正；今不两日即登极，何以服人心而谢江北诸将士！宜俟发丧满服后』！从之。初，扬州进士郭元勋闻迎潞

议，密言于工科左李清；清曰：『祸从此始矣！神宗四十八年德泽犹系人心，岂可舍孙立侄！况应立者不立，则谁不可立。万一左良玉扶楚、郑芝龙扶益，各挟天子以令诸侯，谁禁之者！且潞王既立，置福王何地！死之，抑幽之耶？是动天下兵也』！时草野闻立潞非序，皆不平；及王监国，人心乃定。

以监国谕天下大赦。

谕曰：『我国家二祖开天，昭宣鸿业；列宗纘绪，累积深仁。大行皇帝躬行节俭励志，忧勤宵旰十有七载，力图剿寇安民；昊天不吊，寇虐日猖，乃敢震惊宫阙，龙驭升遐；英灵诉天，怨气结地。呜呼！痛哉！孤避乱江淮，惊闻凶讣；既痛社稷之墟，益激父母之仇。矢不俱生，志图必报。然度德量力，徘徊未堪！乃兹臣庶敬尔来迎，谓「倡义不可无主，神器不可久虚」；因序谬推，连章劝进。固辞未获，勉徇輿情；于崇祯十七年五月初三日暂受「监国」之号，朝见臣民于南都。孤夙夜兢兢，惟思迅扫妖氛，廓清大难。德凉任重，如坠谷渊。同仇是助，犹莱尔民！其与天下更始，可大赦天下』。

发大行皇帝丧，谕天下。

谕曰：『先帝天纵神资，丕承弘绪。适逢国步多艰，民生日蹙；勤学立政，罔有休暇——自有生民以来，未有如先帝之焦劳者也。不期以礼使臣，而臣以不忠报；以仁养民，而民以不义报：彝伦攸斁，报施反常——自有生民以来，未有甚于今日者也。驯见妖氛日炽，戮我赤子，辱我宗藩，毁我陵寝；四海人心，莫不欲灭此而朝食。乃先帝爱惜愈加，招抚弥切；无非欲化顽为良、转乱归治！何皇天不吊，遂有今年三月十九日之事！爰及国母，掩昭相从。呜呼！痛哉！孤虽渺质，片气犹存；暂膺监国，益切除凶。谨哀告于臣民，庶怜予〔而〕多助！丧礼依旧制，以日易月，二十七日释服，毋禁民间音乐、嫁娶。督、抚、镇守、都、布、按三司官员地方攸系，不许擅离职守；闻丧之日，止于本处哭〔临〕三日，进香遣官代行。卫、所、府、州、县土官，并免进香。谕告中外，咸使闻知』。

壬辰，以都察院右都御史张慎言为吏部尚书，补本部司官颜浑、梁羽明等。

以北推总兵张应元仍镇守承天等处。

命兵部郎中万元吉宣谕各镇。

元吉先为总兵高杰监军；至是，言『闯贼胆横心雄，眈眈漕粟；且徐、凤间诸镇骈集，兵民未驯。欲亲往军，谕务令相安，以拒逆贼。又闻高杰已驻扬州，请发万金，并往犒劳；然后会同文武谕以大义，共固江、淮』。从之。元吉渡江，躬行诸镇营，酌颁犒赆，勉以大义；又言『江南辇毂重地，不便安插家口』。诸镇唯唯。

时传黄得功、刘泽清、高杰等争占扬郡，元吉复泊舟仪真；会得功先至，移书期以首倡协恭，共奖王室。得功得书，如元吉言；乃抄白来缄，驰视泽清，与杰嫌始渐解。元吉请督辅可法速赴任，为四镇画地分守。又以杰所率兵稍强而横，乃议以杰兵隶可法，外示亲信、阴寓调剂；庶不至荼毒一方民：皆其苦心也。

御史祁彪佳疏陈致治大本；监国嘉纳之。

疏言：『殿下涣颁大号，沛发明纶；虽为继统，实同创业。以仁厚归群情，又以严肃定众志：此明纪纲、飭法度之说也。伏望申谕群臣：此时典制益当遵守，勿以多事逐纷争之端；名器益当慎重，勿以乏才启滥幸之实。人才不可不爱惜，而自媒之径必不可开；官爵不可不攸崇，而躐迁之阶必不可有。恩赏固宜普，当为可继之地，勿生无厌之觊觎；开释固宜速，当核可原之条，勿紊罔贷之刑章！庶几纪纲明、法度飭，然后以轻徭薄赋收民心、以举贤录才收士心、以信赏必罚收将卒之心，言守固、言战胜矣。更有进者，殿下下一心，尤为纪纲法度之本。念敬天，则天休必滋至；念法祖，则祖泽益灵长；念勤民，则民情愈忻戴』。后其言皆验。

允廷推，进南京兵部尚书史可法东阁大学士兼兵部尚书，改南京户部尚书高弘图为礼部尚书、进东阁大学士，俱入阁办事；总督凤阳部院马士英进东阁大学士兼兵部尚书、都察院右副都御史，仍督凤防。

时弘图陈新政切要八事：一曰宣义问。欲下明纶正逆贼之罪，以鼓忠义。二曰御讲幄。欲不俟释服，更日直讲。三曰设记注。欲召词臣侍立，记监国言动，送贮内阁。四曰睦亲藩。欲依列圣践极遣使各藩，赍玺书慰告。五曰议庙号。欲制列圣主，权附奉先殿，仍于孝陵侧望祭列圣山陵。六曰严章奏。欲无使小人奸徒借端立说，脱罪思幸。七曰固江防。欲将江北、河北、山东等处正税、本折等从崇祯十六年以至十七年尽行蠲免，无为贼小惠所愚。八曰择诏使。欲遣词臣、科臣招徕朝鲜。□□□□□□□并嘉纳之。

甲午，升詹事府詹事姜曰广为礼部尚书、在籍礼部尚书王铎以原官并兼东阁大学士，同入阁办事。

曰广附立潞议，故监国未点，命再推词臣数人；乃更益以铎、陈子壮、黄道周。疏上，曰广与铎俱点，亦见监国之无我也。曰广寻辞尚书，御改左侍郎。

拟补科员张元始等。

凡六员。

升工部右侍郎兼都察院右佥都御史周堪赓为户部尚书、兵部侍郎吕大器为吏部左侍

郎。起升原任陕西巡抚练国事为户部右侍郎，总督仓场；原任天津巡抚贺世寿为刑部左侍郎。升太常寺卿何应瑞为工部左侍郎、应天府尹刘士禎为通政使司通政使。

国事，先抚关中；坐流贼不靖，戍。

乙未，改补吏部司官倪嘉庆、华允诚、叶廷秀等。

嘉庆先为户部，以堂官侯恂钱粮注误，阁臣可法先与同官知其敏练；允诚以兵部主事建言，廷秀以救黄道周改补。

复起刘宗周为都察院左都御史。

宗周，先帝时以救言官熊开元、姜采等落籍；至是，召还。

命御史祁彪佳宣抚江南。

北都之变，重以高杰兵镇扬州，江北士民奔避，无赖乘机抢掠；或假忠义名，荼毒从逆诸姓——苏、松、常、镇为最。彪佳昔按吴，有威望；故命之。刑斩倡乱、宣布赦款、甄别有司贤否，三吴宴然。

命止江督袁继咸入援。

风闻闯贼将东，故止之。

升吏部郎中徐一范尚宝司卿。

一范，先以御史按河南，谪。

兵部请设江防水师，定额五万；添设两镇，画地分防；仍复操江总督文臣协理。俱允行。

旧制：操江总督，宪臣与勋臣并设。先帝时，欲专任诚意伯刘孔昭，故罢宪臣。至是，兵部从郎中万元吉议，请复旧。从之。

升补李沾、张元始、沈胤培、左懋第、李清等为吏、户、礼、兵、工科都给事中，罗万象、钱增等为各科左右给事中。

时刑科右钱增服制未终，疏辞；随具「东南第一隐忧」一疏，□称：『江以南苏、松、常、镇、杭、嘉、湖七郡之水，以太湖为腹，以大海为尾闾，以三江入海为血

脉。自吴淞淹塞，东江微细，独娄江一派；而娄江之委七十里为刘家河（一名下江），乃娄江入海之道。东南诸水，全藉此以归墟。考胜国时，刘家河自然深广；运艘市舶，走集于此。国朝二百七十余年，潮汐泥沙，日就浅狭；今渐涨渐满，不一年竟成平陆。东流之水逆而西向，灌溉无资。若旱魃为虐，则平畴龟坼。万一大浸稽天，如万历之戊申、天启之甲子洪流倒峡，震泽不能受，散漫横溃，势必以七郡之田庐为壑，东南数百万财赋尽委逝波；其于民生国计何！但事关大利害、大工役，非一郡、一邑所能济。考之先朝水利，有专官特遣兴役者，永乐间夏原吉白茅之役也；有端委抚臣奏绩者，宣德间周忱、嘉靖间李充嗣、万历间海瑞吴淞、白茅之役也：成迹具在。特在睿断必行』。上嘉纳之；令浙、直抚按速议举行。

楚抚何腾蛟奏报恢复德安府、随州。

戊戌，吏部尚书张慎言陈中兴十议。下部酌行。

一曰议节镇。淮安、凤、庐、荆、襄为今日锁钥重地，宜申飭镇抚大臣如九边三协之类，分戍增堡，各扼险要。东西开阌，首尾相援；步骑兼屯，战舰海舟添设于长淮、大江之间。沿北郡县各积穀五千石或万石，分储立备，为仓卒转运之费。二曰议侨藩。或浙之处、严及江西之广信、袁、抚，或闽、粤间，择其可者。至府第、护卫官属，暂从节省。三曰议开屯。于江北闲田，招集流遗开屯立业，给照免租；三年后，量征课税。县府豪杰，以百夫屯为百夫长，以千夫屯为千夫长；用什五之法，就使守御。四曰议叛逆。明谕在北郡县，凡口称伪官，有能立行梟示或擒拏者，赏。五曰议伪命。国家三百年养士之报，致有今日。诸屈膝腼颜之臣家属在南者，量行旧籍，仍俟其归正；不宜以风闻谣谤，即行苛议。无论清浊混而真贋淆，既无可还之辙，复恐增从逆之想。至若自拔来归，尤从宽分别酌议。或原系废籍、或曾经推拟、或原无官守、或有地方之责无兵马之权，倘才堪一割、情可矜原，宜酌定一用之法；不当概以死责。俟贼平论定，乃如唐肃宗时以六等定罪。六曰议褒恤。如范景文、倪元璐、李邦华等传闻确者，立宜赠谥；余待详核论定。七曰议功赏。一阶半级，原用劝酬；恐烂羊酬爵、市饮售官，反增贪幸。今武爵稍宽，文职无滥；综核名实，无开幸门。八曰议起废。大行皇帝从谏如流，改过不吝；初年定案，无容更议。嗣后戍遣、废籍诸臣，清论自在。假或杂揉并进，致伤先帝玉成之德；务使廷臣协议，归于至当。九曰议惩贪。迺来百司贪黷，成盗贼席卷之势。今约在内都察院科道、在外抚按，广刺贪吏，究赃重拟。十曰议漕税。北漕万有余艘，除旗甲有数外，余纲司、舵工、挽夫不下八万人，大半募自外江。今漕登近地，此十余万人无室无乡，游食不已，为患非细；宜下廷臣酌议。俱嘉纳之；命部酌行。

兵部请罢南京守备、参赞各官，依北都设京营等官；又请罢锦衣卫南、北两镇抚官。俱从之。

兵部郎中万元吉议：『南京旧有内外守备及参赞各衙，今宜罢「南京」之名，宜存

其旧，以示不忘恢复之意；而京营之制，宜视乎北，以别无敢偶尊之嫌。此后大小各教场，俱应改称京营。其总督、戎政、勋臣、协理、枢臣等官，俱宜如北。仍练战兵，分为十营；兼用土著。大汉止用军校二百名，锦衣旗校止用军校五百名。其锦堂上，止用一员，加提督官旗办事衔。南、北镇抚官，不必用；既昭缓刑，且杜告密』。兵部覆请，俱从之。

己亥，命御史陈丹衷宣谕江北。

丹衷，先以新进士疏请调广西土兵往剿闯寇；故先帝特擢今官，命往调。至是，不果；改宣谕江北。

允大学士史可法请督师淮、扬，召马士英入阁辅政。

南都诸生卢涇材等上言：『南都幸朝廷门户，而朝廷是天下根本。宜别命一督臣，使可法从中调度』。报闻。

庚子，命江南募兵兵部尚书张国维以原官回部佐理戎政。

起原任刑部尚书徐石麒都察院右都御史，管副都御史事謫戍解学龙以原官为兵部左侍郎。

石麒，先帝时以议狱忤旨，削籍；学龙，以荐黄道周，逮戍。

升顺天府丞张有誉户部右侍郎，总督仓场。改顺天府尹王庭梅应天府尹，升江西左布政朱之臣太常寺卿、吏科左给事中左懋第太常寺少卿。

升吏科李沾太常寺少卿，提督四夷馆；御史郭维经应天府府丞，仍带原衔管巡视城事。

维经以加衔崔、魏时故套，力辞。不允。

命复原任御史陈荇原官，招募江南。

荇，先帝时为文选吴昌时例转；至是，以万元吉荐，复官。

以总兵郑鸿逵镇九江、黄蜚镇京口等处。

命上大行皇帝、皇后尊谥。

补御史宗敦一等各道员。

凡二十四员。

以兵科陈子龙巡视京营。

起废籍科臣章正宸等、台臣詹尔选等。

科则正宸、杨时化、袁恺、庄鳌猷、熊开元、姜采、马兆义等，台则尔选、李长春、张煊、郑友玄、李模、乔可聘等。时化、煊，后皆任北。

辛丑，起升工科都许誉卿光禄寺卿。

誉卿，先帝时以推升事为谢升所纠，削藉。寻具疏以疾辞，不赴。

壬寅，监国即皇帝位于南部，大赦；改明年为弘光元年。

诏曰：『我国家受天鸿佑，奕世滋昌。自高皇帝龙飞定鼎，已卜无疆之历矣。朕嗣守藩服，播迁江、淮；群臣百姓共推继序，跋涉来迎，请正位号。予暂允监国，摄理万几；乃累笺劝进，拒辞弗获。谨于五月十五日祇告天地、宗庙、社稷，即皇帝位于南都。猥以藐躬，荷兹神器。惟我大行皇帝英明振古，勤俭造邦；殚宵旰以经营，希荡平之绩效。乃潢池盗弄，钟簴震惊！燕京扫地以蒙尘，龙驭宾天而上陟；三灵共愤，万姓同仇。朕凉德弗胜，遗躬抱痛；敢辞薪胆之瘁，誓图俘馘之功！尚赖亲贤戮力劬勩，助予敌忾！其以明年为弘光元年，与民更始，大赦天下』。

命太监韩赞周管司礼监事；卢九德为司礼秉笔，提督京营。

癸卯，命马士英入直佐理，仍掌兵部事。

可法将陞辞故也。时莆田国子生陈方策自京师回南，上书可法，谓『贼有未可缓图者六：吴三桂屡与贼战于畿辅，如不即破贼，则贼主北客，旷日粮匱，不无望我接济。北兵深入，策应渐遥；愚民无知，附贼日益。贼不遽歼，北将孤注，不无望我救援。贼兵糜烂，自成授首；北兵得志，劳着功成，不无望我犒赉。贼一溃败，必走西秦；北不穷追，势将南向，不无望我安顿；似未宜缓图，所以待北兵也。献贼躏楚侵蜀，蓄奸已深。今闻李贼陷京，宁不思逞！度其地势，窃据上游；顺流而东，金陵风鹤：似未宜缓图，所以办献贼也。左镇拥兵数十万，何难战征；闻其兵丁，时亦肆掠。若不亟申大义，俾建殊勋；诚恐养寇成痼，必至于溃：似未宜缓图，所以励左兵也。京师以南、黄河以北，人受贼愚；咸知有偶僭之伪朝，而未知有中兴之新主。喜诏、孝诏，所当亟颁：似未宜缓图，所以挽民心也。山东差半降贼，

尚有兗、青、登、萊夙稱殷阜，堅壁固守；若不亟頒詔傳檄，愚民罔知適從，恐遭煽惑：似未宜緩圖，所以救東省也。京師五方雜處，何啻百萬生靈；誰無家鄉！誰無父母！似未宜緩圖，所以接回鄉也』。言多可采。

起升原任禮部侍郎顧錫疇為禮部尚書，升少詹事黃道周為禮部右侍郎、操江都御史高倬為工部右侍郎、右中允羅大任為國子監祭酒、順天府丞侯峒曾為通政使司左通政、蘇松巡撫鄭瑄為大理寺卿。

升太常少卿左懋第都察院右僉都御史，巡撫應、安等處。

甲辰，命忻城伯趙之龍總督京營戎政。

分淮、揚、鳳、廬為四鎮，以劉澤清、高杰、黃得功、劉良佐領之。

北都失，督、撫皆奔匿，鎮臣則思得善地而蚤食焉。賊駐宿迁，眾止二千，莫敢击；唯心涎揚州，思圖息足。兼以拥立功，庙堂知驱之不得，遂立分镇议，姑为羁縻。阁部可法言曰：『从来守江南者，必于江北；即六朝，犹争雄于徐、泗、颍、寿间：不宜画江而守明矣。但此时贼锋尚锐，我兵气靡，备分力单；顾远遗近，不可不择所守，立定根基，鼓锐而前，再图进取。宜分四藩：一为淮、徐，一为扬、滁，〔一〕为凤、泗，〔一〕为庐、六。以淮、扬、泗、庐自守，而以徐、滁、凤、六为进取之基；江北之兵声既振，则江南之人情自安。然有四镇，不可无督师；应屯驻扬州，适中调遣。其四镇辖淮、海者，驻于淮北；山阳、清河、桃源、宿迁、海州、沛县、赣榆、盐城、安东、邳州、睢宁隶十一州县，经理山东招讨事。辖徐、泗者，驻泗州；徐州、萧县、山碭、丰县、泗州、盱眙、五河、虹县、灵璧、宿州、蒙城、亳州、怀远各州县隶〔之〕，为经理河北、河南开、归一带招讨事。辖凤、寿者，或驻寿、或驻临淮；以凤阳、临淮、颍上、颍州、寿州、太和、定远、六安各州县隶之，经理河南陈、杞一带招讨事。辖滁、和者，或驻滁州、或驻庐州、或驻池河；以滁州、和州、全椒、来安、含山、合肥、六合、巢县、无为各州县隶之，经理各辖援剿事。一切军民听统辖，有司听节制。营卫原存旧兵，听归并整理。所辖各将，听荐举题用。荒芜田地，俱听开垦；山泽有利，皆听开采。仍听招商收税，以供军前买马、置器之用。〔每〕镇额兵三万，岁供本色米二十万、银四十万。所收中原土地，即归统辖。贼在河北，合力协防徐、淮；贼在河南，则各镇防守泗、寿』。然于青、兗、开、汝，似置不讲。

命户部速挽漕粟以济军糒。

御史詹兆恒疏言：『今北漕渐次入南，而停江、淮者尚众；运弁、旗甲折干盗卖，弊蠹不一而足。宜急救计臣：将在淮者，令漕臣路振飞督之；在京日者，令漕臣白抱一督之。星夜押发，衔尾入南。除补给京军外，尤宜立运登庾，无久露泊江干，

致生意外』。从之。

罢淮抚路振飞；起原任巡抚田仰都察院右佥都御史，巡抚淮、扬等处。

仰，阁臣士英梓里；从废籍超擢。

进伯黄得功为靖南侯、左良玉为宁南侯，各荫子锦衣卫千户。又封总兵高杰兴平伯、刘泽清东平伯、刘良佐广昌伯。大学士马士英加太子太师，荫子锦衣卫指挥佥事。

时江督袁继咸入见，面奏曰：『封爵以劝有功。无功而伯，则有功者不劝；跋扈而伯，则跋扈者愈多』。上首肯。继咸叹曰：『事已成，奈何』！忻城伯赵之龙奏：『马士英引杰过河，宜令往辑』。继咸亦怂恿。上曰：『马先生不肯去，奈何？今史先生愿去』。继咸曰：『皇上即位之初，虽以恩泽收人心，尤当以纪纲肃下志，大抵君德英明为用。伏祈振作精神，申明法纪。冬、春间，淮上未必无事。臣等虽弩，愿奉六龙为澶渊之行』！上有难色。阁臣姜曰广曰：『所言澶渊之行，非遽为此事；然不可不时提此心』！继咸又诣榻前，密奏曰：『左良玉虽无异图，所部多降将，非孝子顺孙。且皇上初登大宝，人心未免危疑；意外亦不可不防。臣当星驰回汛』。上允可。继咸往阁，责阁臣可法不当遽伯高杰；士英不悦。时人谓继咸言虽正，然使诸臣果以序迎，则上何至书召，士英与杰又何得居功；亦不可谓非钱谦益、吕大器等罪也。继咸寻还任。

乙巳，升御史祁彪佳为都察院右佥都御史，巡抚苏、松地方。

原任少詹事项煜自北遁归，命下部察议。

煜既为伪太常寺丞，至是南还，犹入班行，颜色无忤。御史陈良弼言：『先帝升遐之变，千古异常；总由大小臣工结党纳贿，淆乱纪纲。事极势穷，以至为贪邪断送。贼到日，或迎、或窜，忠烈寥寥；可叹也！先帝何在？煜逃生未已，忽混入班次。且彼居清华，尝以文章见称。既不能与李邦华、范景文诸臣捐躯殉难，或黄冠缁衣任其所往；乃突如其来，俛首贪恋，意欲何为？万一自媒得售，使载笔者记之曰：「翰林学士煜偷生逃见，仍与某官」；宁不污史册而戾圣治哉！时屯抚方孔炤亦自北归，有议陪推某缺者。户科罗万象面折其非，疏争之；乃止。』

谕礼部：考郊祀时享诸礼，一岁中几祭？某亲祭、某遣官，务照祖宗典制，详开具奏。

命礼臣追上先福王、先妃尊谥。

从御史朱国昌请也。

遣魏国公徐弘基祭孝陵。

以即位告。又亲祭告先福王、先妃于行宫。

丁未，吏部尚书张慎言疏荐旧辅吴甦、原任吏部尚书郑三俊。命甦罪，陞见；三俊，不允。

慎言疏内先列甦督师稽缓与三俊误用吴昌时二事，欲使天下共见其过，然后用之耳。俞甦、罢三俊，皆阁臣弘图所拟也。

调考功司员外王重文选司郎中。

命速议熹庙张后尊谥。

风闻后已殉难故也。

升御史詹兆恒大理寺左丞。

辅臣马士英疏陈开国大计。允之。

一、雒阳残破后，闻圣母尚寓郭家寨；当急图近养。一、皇考遇难后，匆匆藁葬；宜迁梓宫护送南来，择吉壤安厝。一、宜敕礼部择吉慎选淑女，以继中宫。一、诸藩流离，恐奸宄生心；或为所挟，不利社稷。凡侨寓者，宜俱差官迎置近地；俟中原恢复，各还原封。疏奏，命辅臣可法遣迎圣母；亲藩事，礼部酌议。

诏封疆失事各官，不许起用。

时刘孔昭言：『臣读前诏内罪废各官、「逆案」内计典赃私，俱不得轻议，惟置封疆失事于不言。今日祸及君父、倾颓庙社，封疆之罪犹当追论，以正国法；而拟议诏款中，仍留此一段之肺肝，以再误陛下。天下事，尚忍言哉』！时监军佥事宋劼亦言：『天下人才，多坏于门户。每择一题，因竖标援人、陷人；则占风望气者景附云集，致真正介特之士不得效用。宜如先臣杨士奇言：以天下心官天下人，以天下官官天下才』。皆可其奏。自此，门户之说滋矣。

起用原任礼部侍郎钱谦益。

谦益以主潞议惧祸，时科臣李沾有定策功，故浼沾疏荐为巧护地。台臣陈良弼不平

，言：『陛下以亲、以贤，当正大统。乃龙江觐驾，谦益邪议挠止。时科臣李沾相对诧异，与臣等并持公论。及事定，谦益犹现身密间；沾对臣曰：「此时尚议论不归正乎」！今忽以谦益与黄道周、黄景昉等同荐黄扉，臣忧奸人钻用，心不可测！当陛下前，不惜一死争之。退，仍与沾争，彼谓为吾乡，不得不调停矣。调停同乡情面，不顾紊胤朝廷，是何心哉！谦益大节已失，公论共斥。阅沾荐疏，原借名正人君子；而于众瑜中，混以瑕邪！从来误国宿套，牢不可破。愿以臣疏与沾疏悬之国门，发下文武诸臣共……』。疏奏，沾无以屈也。

江楚督臣袁继咸疏陈致治定国大计。嘉纳之。

疏言：『自古国祚久长，有开创，必有中兴；然致治在于得人，而守国必先审势。所云致治必先得人者，何也？宋之高宗，亦号中兴；然上不得与武丁、周宣比烈，次亦不得与汉光、唐肃絜盛者，「知人善任使」弗讲也。武丁知傅说、甘盘之贤而终任之，故能集鬼方之勋；周宣知吉甫、方叔之贤而终任之，故能致车攻之盛；光武知邓禹、寇恂之贤而终任之，故能诛莽、戮嚣，扫赤眉、铜马之焰以光复旧物；肃宗知子仪、李泌之贤虽不能终用，犹能不失其用，故能芟夷安、史，克复两京。高宗则不然。知李纲、赵鼎之贤而不能信用，用而不能信；以小人参之，卒令沦落以老。其始终所信任者，惟黄潜善、汪伯彦、秦桧、汤思退之徒；以致主势日卑、亲耻不雪，腼颜臣仇为万世笑。其得偏安一隅，犹幸尔。臣愿皇上于在廷诸臣知而已用者，任之信之，勿使小人参之；在野诸臣未及用者，明诏廷臣各举所知，一如高宗求旧学、光武褒卓茂故事，蒲轮征召，赞襄大业：则商、周、建武之隆，可立致也。臣故曰：致治必先得人也。臣所云守国必先审势者，何也？自昔论建都者，右西北而左东南。以西北之势足起东南，东南之势不足起西北；亦据六朝、五代、弱宋之成迹论耳。我高皇帝龙飞淮甸，定鼎金陵，卒能芟群雄、驱蒙古、取中原，安在东南不可起西北哉！今皇上缙承大统，宅定镐京；攻守先后之大势，不可不早计。不先自治而遽图敌，立败之道也。臣以为金陵之界限在大江，而淮南、江北实为屏蔽；金陵之咽喉在浔阳，而湖南、襄、樊实为门户。顷闻叛将溃兵蟠结淮南、江北间，小民渐丧乐生之心。若不及时区画，一旦大寇凭陵、内奸响应，得无寒心！湖南献贼仅遁，千里蒿莱；襄阳必争之地，闯逆设防颇固。镇臣左良玉并全力以往，计日可归版图；然复而不守，与不复何异！盖守襄阳，则必设重镇。设重镇，则必宿重兵；设重镇，则必须厚饷：皆不可不从长计议也。臣窃谓欲料理淮南、江北，则必处置溃兵。乞密诏督、抚二臣审察顺逆：真心就我戎索，则分信地、足额饷，申明纪律，毋为百姓烦苦；或中怀观望，急乘寇势未睹，破碎其党。虽有焦烂，宁忍小痛以除大毒，臣以为愈于养痍。欲料理湖南，则宜别简风力重臣抚治其地，选补廉吏，戢和难民；招来商贾，疏通巴蜀、黔、粤之货，以济公私。欲料理襄、樊，则必开帅府、宿重兵。俟规模初定，然后搜括旧田，大兴屯种；且耕且守，为持久计。夫襄、樊守，则可由宛、叶以图关中；淮南、江北守，则可由归德以图河南，亦可由彭城以图河北。攻守大势如此；若欲为画江舍腹里而就边角，则腹里共边角愈蹙，此输着耳。臣故曰：守国必先审势也。然臣终以明断为请！人材之贞邪

消长，理而已矣；国势之攻守得失，机而已矣。理非明不能晰，机非断不能割：臣以为得人、审势之要也』。疏奏，阁臣士英疑汪、黄等语刺己，深恨之。

督师辅臣史可法徙淮、扬。

己酉，诏议生祖妣、神庙着贵妃尊谥。

加淮抚田仰兵部右侍郎。

升兵部郎中万元吉太仆寺少卿，监理江北军务。

补吏部司官夏允彝、余扬等。

命潞王暂居杭州府。

辛亥，复原任御史郑友玄原官，督理两淮盐法。

友玄，崇祯时以考选钱粮未完，配。

诏督师辅臣可法遣官访大行皇帝梓宫并太子、二王。

从少詹管绍宁请也。

诏议先妃谥号。

壬子，命祈雨。

御史郭维经言：『圣明御极将两旬矣，一切雪耻除凶、收拾人心之事，分毫未见实着。且伪官纵横于凤、泗，悍卒抢攘于瓜、仪，焚杀劫掳之惨渐过江南；丰镐一片地，不知将来成何光景！而庙廊之上不闻动色相戒，惟以漫不切要之务，盈庭而议；以致乘便门而为钻窥之隙穴、斗疾足而作富贵之阶梯，举朝人心如狂如醉。数日以来，匹夫匹妇呼天愤抑，酿成灾祲。伏乞早降纶音：凡内外文武诸臣洗涤肺肠、从公起见，毋违道以干誉、毋拂民以从欲；凡刻薄偏私以及恩怨报复种种故习，尽期湔除，一意以办贼复仇为念。即此公忠上彻玄昊，自召天和。仍敕在京诸臣，遵古制斋祷』。从之。

进公魏国徐弘基、侯灵璧汤国祚、安远柳祚昌、伯诚意刘孔昭、南和方一元、东宁焦梦熊、成安郭祚永宫衔，荫子有差。

予司礼监太监韩赞周、卢九德各弟侄一人锦衣卫指挥僉事，〔赉〕银、币有差。

魏国公徐弘基疏荐原任南兵部尚书熊明遇等。报闻。

勋臣荐文臣，始此。

吏部尚书张慎言乞休。不允。

时勋臣刘孔昭、赵之龙等皆怒慎言荐旧辅吴甡，朝罢，群臣诟于庭，至目为朋党奸欺，所用皆私人；声彻殿陛。阁臣弘图等解之，乃退。孔昭又言：『先帝无声色游幸之好、无神仙土木之费，饬法明刑，锐心雪耻。缘诸大吏营私党恶，票拟之中，暗伏机关；声气之中，党同非类。事权功令，尽济其贪残之用。廉耻丧而人心散，大势土崩，重不可返。迨贼骑临城，主亡国破，殉节仅数人；其余从逆，尽为美官。今潜逃南中者，大率皆受伪命，为贼作内应；否则，南走胡、北走越耳。铨臣不驱除击攘，且汲汲议用。乃以误国罪臣，巧为推毂；势不尽倾江南不止』。又言：『慎言原有二心；当告庙决策定立主上之际，阻难奸辨』。疏奏，慎言疏辨，且乞休。阁臣弘图等亦以不能戢和文武，各疏乞休。俱不允。御史王孙蕃言：『慎言治事，南铨底册靡凭。或用人偶不合，勋臣宜平心入告，以候上裁；未有呼大小九卿、科道于庭，而大骂冢臣如今日之异者。「安国在尊君」，勋臣尚未闻乎』？督辅可法言：『吴甡持斧建牙，声誉特简；止因奉命讨贼迟迟其行，遂蒙先帝罢归，复催促至京拟戍金齿：此甡之过也。然甡奉命之日，正敌入犯之时；原候唐通兵为剿贼助，敌不去则兵不前，故屡请行未允：此甡过之可原也。年来仕路不清，病在党同伐异。或以不肖之最，百足不僵；或以可用之才，一眚永锢。臣生平拙守，不解异同；如监国诏内「起废」一款有除封疆、「逆案」、计典、赃私不准起用一段，臣为去之。诚以国事之败坏非常，人才之汇征宜广；未可仍执往例耳。后来不知何故，复入此等字面。此示人以隘，不欲以天下之才尽供天下用也。今宜捐去成见，一屏虚行。如甡之过，则还以过；如甡之才，则用其才。王路荡平，何容偏欹！况北都之变，文臣固多误国，武臣岂尽矢忠！若各执成心，日寻水火，文武不和，臣切不愿诸臣存此见也』。已府丞郭维经言：『可法去「逆案」一语，为失言之过』。报闻。时谓南逃诸臣不宜轻议，用孔昭言亦是；然喧争非体，故孔、蕃等及之。

诏议优恤北都殉难诸臣。

从御史陈良弼请也。

癸丑，复荫刘泽清子锦衣卫千户。

以先帝时曾拟封伯故也。

命十七年练饷已征者尽数起解，无得干没；明年全豁免。旧饷、辽饷，速催。

甲寅，命督师辅臣史可法祭泗、凤陵，左良玉祭显陵。

告即位也。

辅臣为士英陈恢复大计。命议行。

士英言：『吴三桂，宜速行接济，在海有粟可挽，有金声桓可使，而又可因三桂臣款□。原任知县马绍愉，陈新甲曾使款□；昔下策，今上策也。当咨送督辅，以备驱使』。诏可法便宜行。

乙卯，封关门总兵西平伯吴三桂为蓟国公，给诰券、禄米；发银五万两、漕米十万石，差官赍送。

先因三桂承命移三城入抵关；方抵关而京城失，三桂遂举义发丧，乞师北庭，始败叛将唐通，覆其师。已复三败闯逆；逆西遁，遂引北兵入京师。事闻，诏以三桂破贼复仇，功在社稷；乃进封。户部侍郎贺世寿言：『先帝神武，魁柄独持。只以求治不效，日夜焦迫，未免爵一人过其量、罪一人溢其罚。今日更化善治，莫若肃纪纲而慎刑赏。如吴三桂奋身血战，彷彿李、郭；此乃可言功拜爵，方无愧。若乃口头报国，岂遂干城！河上拥兵，曷不敌忒！恩数已盈，功名宜立。不则，天下且谓人主不爱嘲笑而轻名器矣。臣愿皇上申明国纪，为制治计』。国子监典籍李模言：『当日拥立之事，皇上不以得位为利，诸臣何敢以定策为名！甚至侯、伯之封轻加镇将，于义未安。况皇上正位丰镐，乃先帝所凭依；将以大复仇而光前烈也。

即在诸镇将，事先帝未效桑榆之收、事皇上未彰汗马之绩，案其实亦在戴罪〔之〕科；而予之定策，其何敢安！诸镇果负血性，必大慰先帝殉国之灵，庶堪膺皇上延世之赏。若以今日无功，洊膺勋爵；尚宜再四辞免，必明臣谊。臣实不愿光复未臻，而大体先衰。至于丝纶为重，勿因大僚而过烦；拜下宜严，勿因泰交而稍越；繁纓可惜，勿因近侍而稍宽。明王必防其渐，然后纲维不堕矣』。

命兴平伯高杰安顿扬州城外；仍迅统前征，以应东师。

起升礼部右侍郎陈子壮为礼部尚书，掌詹事府事；少詹管绍宁为正詹事，谕德徐汧、吴伟业为少詹事。

子壮，崇祯时以议宗藩不宜更制，削籍。汧，时里居；感愤时事，贻同事书曰：『今日贤邪之辨，不可不严；而异同之见，不可不化。以君民为心，则和平立至；不必合党连群，而自无不同。以职掌为务，则猷念各分；不必破党涣群，而自无不异。

。用人者执此为衡，其忠君爱民、精白乃心者为君子，否则小人；修职就业、竭节在公者为君子，否则小人。流品区明，澄叙无舛。故人谓异同立，而贤邪之界限以明；不知异同化，而贤邪之流品始出。夫以先帝十七载干惕，卒使鼎湖泣于寇孽、椒殿倾于贼烽，其故何与？良由频〔年〕以来，是非混淆，士大夫精神智虑未尝为君民勤恤、为职掌究图。极其末流，乃至漠视主上，如胡、越之瘠肥；委身寇仇，若秦、楚之朝暮：岂不痛哉！今者吾皇中兴，百尔在位；自当洗心涤虑，事我一人。有能匡弼吾君者，则登之；不然，如鸛逐雀，勿疑也。有能奠丽斯民者，则庸之；不然，为苗去莠，勿后也。有能殫心职业者，则陟之；不然，校官秕政、便文自营，勿贷也。毋以体骨不媚，远耿介特立之人；毋以惛惛无华，失专心向公之士！毋喜闻声之浮慕、援助之实繁，滥收趋势游利之宵类；毋因一事之快心、片言之顺意，误用呈身换面之儉流。除凶雪耻，端有赖矣』。沂有上当事七款：一曰辨人才、二曰课职业、三曰敦寅恭、四曰励廉耻、五曰核名实、六曰纳忠谏、七曰破情面；语多可采。

命江、淮賑济北归难民，严禁掠夺。

丙辰，命议河督黄希宪、齐抚邱祖德、晋抚郭景昌等罪。

御史朱国昌言：『北都之变，三督、抚一时并逃，骈集吴会；未雨乏绸缪之防，御寇无死绥之勇。方之卖国降敌，止争「先去」；律以失陷封疆，尚多「一逃」。乞敕廷臣申明大法』！遂下部看议。

偏安排日事迹卷二

六月丁巳〔朔〕，大学士高弘图自请往江干督漕粮登庾。从之。

命补记注侍班官。

时户科罗万象因勋臣忿争，以肃朝仪、和文武为言，具请「以票拟还阁臣、以参驳予言路，并设记注侍班官」。从之。

戊午，命遣官往北监营先帝山陵、祔葬祖陵，并申祭告。

从御史米寿图言也。

命内制国玺，权以金代玉。

上大行皇帝尊谥曰「绍天绎道、刚明恪俭、揆文奋武、敦仁懋孝烈皇帝」，庙号「思宗」；皇后曰「孝节贞肃、渊恭庄毅、奉天靖圣烈皇后」。

时议定先帝庙号，礼臣顾锡畴拟「干宗」；「思」则阁臣弘图拟也。

上皇祖母郑贵妃尊谥曰「孝宁温穆、庄惠慈懿、宪天裕圣太皇太后」。

上皇考先福王谥曰「贞纯肃哲、圣敬仁懿恭皇帝」，皇生母某氏曰「孝诚端惠、慈顺贞穆皇太后」。

谥号虽依兴献帝例，然不称「宗」，人以为得体；疏末云：「徽称鸿号，从此荐加无穷」，则非也。

尊皇嫡母先福王妃邹氏曰「恪贞仁寿皇太后」。

时遣官奉迎，犹未至也。

追谥先妃黄氏曰「孝哲懿庄、温贞仁寿皇后」。

己未，命原任都督陈洪范来京陛见。

议北使也。

庚申，命旌恤淮安乡绅、士民及有功将士。

督师辅臣可法言其誓死固守、力拒闯逆故也。时原任河南佥事吕弼周持李自成令箭、伪书至，被擒；淮民丛射杀之。

命速颁河北、山东诏。

督辅可法疏言：『闻四月二十四日吴三桂大败贼兵于一片石，贼踉跄入都，尽掠赀财；于四月二十八日遁讫。青州士绅、军民杀其伪将军、伪道、伪府，余相继杀伪者十处。我皇上进膺宝篆、正位旧都，在山东、北直尚未通晓。万一人心涣散，固尽弃前功；即或割据分争，又渐生后患。乞谕该部院择选廷臣赉监国、即位二诏，直抵山东、北直一带晓谕；庶人心有归，大统立复』。从之。

壬戌，召「逆案」为民阮大铖暂冠带来京陛见。

先是，故辅周延儒再召，大铖迓之江干，情甚挚。延儒虑「逆案」难翻，问大铖「废籍中，谁为若知交可用者」？大铖举原任宣府巡抚马士英对。时马士英犹编戍籍，忽起凤阳总督；已知为大铖荐，甚感。至是，因以边材荐大铖，且言『臣至浦口与诸臣面商定策，大铖从山中致书于臣，及操臣刘孔昭以力扫邪谋、坚持伦序，臣甚赧之。但本官天启年间曾任吏科都，时同官魏大中争缺，本官虽退让，与当时诸臣嫌隙遂开；因牵入魏忠贤「逆案」。其实本官既未建祠、未称功颂德，径坐以阴行赞道。夫谓之「赞道」，已无实迹；且曰「阴行」，宁有确据！故臣谓其才可用、罪可宥也』。疏上，阁臣皆不可；士英曰：『我自任之』。旨，即士英手票也。

命工部议建宗庙。

补总兵牟文绶后军都督府佥书，提督巡捕营；杜弘域右府佥书，提督大教场。

命公弘基、伯梦熊掌左中都督府印。

以杨振宗为都督同知，充安庆总兵。

议复懿文太子故号及靖难诸臣谥。

从太仆少卿万元吉请也。元吉言：『皇上前谒孝陵，徐问懿文太子园陵所在，亲为展拜。臣随诸臣后，莫不手额。先臣杨守陈尝请修「建文实录」云：「国可废，史不可废」。弘治中，布衣缪恭伏阙上书，请复建文故号，爵其后裔奉祀；敬皇帝勿罪。夫减曲直不载，不若直陈其事而示之，以无可增加也。削庙号弗隆，不若引景帝故事，还懿文当日追尊故号，祀之园寝而配以建文君也。乞敕廷臣广集众议：「建文实录」作何开局纂修？懿文故号、祀典作何厘正？至靖难死事诸臣，谥、荫尚缺；美逊国之君臣何厚，愧此时之忠义多亏！良由高皇帝褒余阙、斥危素，风励备

至；靖难以后，正气渐削，故酿为今日狺狺之徒屈膝拜伪。请将靖难死事诸臣及北京各省直城陷殉难诸臣，敕诸司备归采录，编成一书；令分别二等，各予谥、荫、庙祀，颁行学宫，广示激励』。又疏言：『先帝天资英武，锐意明作；祸乱益滋，何也？则宽严之用偶偏，而任议之途太畸也。先帝初临海宇，惩逆珰用事，剥削正气；固尝委任臣工，力行宽大矣。诸臣狃之，争意见之玄黄，略绸缪之桑土；敌入郊圻，束手无策。先帝赫然震怒，一时宵壬乘间中先帝以用严：凡廷杖、告密、加派、抽练，使在朝者不暇救过，在野者无复聊生；然后号称振作，乃敌氛如故、■〈寇，女代支〉裨弥张。十余年以来，小人用严之效，彰彰如是；先帝悔之，于是更崇宽大，悉反前规。天下以为太平可致，诸臣复竞贿赂，共肆欺蒙；每趋愈下，再撓先帝之怒；诛杀方兴，宗社继没。盖诸臣之孽，每乘于先帝之宽；而先帝之严，亦每激于诸臣之玩。臣所谓「宽严之用偶偏者」，此也。国步至今，艰难之极。乃议者求胜于理，而不审势之重轻；好伸其言，多不顾事之损益。盖殿上之彼己日争，阃外之从违遥制。即如昨岁督师孙传庭拥兵关中，识者俱以为不宜轻出；出则粮绝兵败。关一不守，形势遂失。然亦有逗挠议之者矣。贼既渡河，臣即语今阁臣史可法、姜曰广：急撤关宁吴三桂，俾随枢辅迎击，可以一胜；胜则都城始固。既先帝召对，亦曾及此。然已有蹙地议之者矣。及贼势熏灼，廷臣或劝南幸、或劝出皇储监国南都；语不择音，要亦权宜。然已有邪妄议之者矣。由事后而观，咸追恨议者之误国；倘事幸不败，必共服议者之守经。天下事无全害，亦无全利；大率类是。当局者心忧无全利之害，非朴诚通达，谁敢违众独行！旁持者偏见无全害之利，意气笔锋，必欲强人从我。臣所谓「任议之途大畸」者，此也。乞皇上究前事之失，为后事之盐，以宽为体、严为用。盖崇简易、推真诚之谓宽，而滥赏纵罪者非宽；辨邪正、综名实之谓严，而钓距索隐者非严。宽严得济，任议乃合。仍求于任事之人，严核始进，宽期后效；毋令行间再锤藏垢、边才久借燃灰，诚牧之以严，自可任之以宽矣』。疏奏，俱嘉纳之。

总兵刘良佐率兵攻临淮，不克。

先是，良佐兵马自山阳下，沿途淫劫。临淮民间其将至，严兵固守；良佐怒，攻之，不下。御史朱国昌言：『临淮汤沐邑，何物么魔，鼠窜之余，复鸱张至此！乞敕督师便宜抚剿』。已良佐开镇于彼，众稍惧；良佐亦虑兵民深怨，移驻寿州，乃解。

癸亥，命原任陕西总兵官赵光远提督川、陕军务，加都督同知。

加原任辽东巡抚黎玉田兵部尚书。

以同吴三桂破贼也。

加旧辅臣谢升上柱国少师兼太子太师、原任御史卢世■〈樅，彳代木〉太仆寺卿，

赐敕书奖谕，赉银、帀有差。

升与世■〈榷，彳代木〉，皆德州人。时传言两臣仗义起兵，擒斩伪官；故有是命。然升已改面事北，再为辅臣。惟世■〈榷，彳代木〉出拜诏，然未闻起兵也；起兵者，为生员谢陞。

补科员黄云师等。

兵科等科黄云师、锤斗、吏科等科左右给事熊维典、陆朗、张希夏、户科等科给事中王士鏐、杨时化、袁铠。士鏐、铠俱服未阕；铠寻卒于镇江，鯁直不寿，人多惜之。

命齐庶人知璫等随班朝谒，列勋臣后。

以旧居南京故也。时谓南京既为帝都，知璫等应迁；许朝谒，尤非体。咸以咎礼臣顾锡畴。

诏以追尊谥号播告中外。

礼臣顾锡畴因请补建文帝庙谥、景皇帝庙号并靖难诸臣谥，又请增理学名臣从祀先师者。俱从之；从祀一议，终寢。

礼部请建立恭皇帝专庙。命廷臣集议。

时礼臣顾锡畴欲矫睿宗失，建专庙；别太庙也。

兴平伯高杰攻扬州，不克；城中民乱，杀进士郑元勋。

杰既奉旨驻城外，又坚欲入城。时杰兵素骄，自山东南下，所掠不赀；扬人已心恐。及抵扬，咸罢市登陴，太守马鸣騄画守御策甚备。不能入，犹日掠沿村妇女。扬人愈恐，守益坚；且议出战，柔脆非敌也。元勋素豪侠，欲居调停功，出羊酒劳军。杰自明无他，止欲安顿一军家小，便进征耳；元勋许之。时鸣騄已升海道，尚在郡，与推官汤来贺商之；皆曰「不可」。阖城士民亦同声言杰兵淫掠状，愿死守。杰怒，分兵困城。城中故殷富，多木客、盐贾；乃共出财守备，街衢多树木栅，钉（？）上下为深沟。杰升高望，知不可攻，顿兵善庆庵焚掠，城外烟火蔽日；而无赖居民，间亦乘机为利。淮扬抚黄家瑞闻变来扬，百姓遮道诉状；家瑞集有司、绅衿、父老于城楼，军民环堵听。元勋曰：『高总镇何害，不令入城？』众哗曰：『城外殍尸遍野，恶得无害』！元勋大声曰：『亦有扬人自相杀者，岂尽高镇』！众闻，哗益甚。有被伤百姓在城中者解衣前，示伤；万众俱怒，指元勋为杰党。元勋

恐，疾趋下城；社兵持刀及之，碎其尸。杰益怒，力攻城；守益坚。阁部可法自请督师至扬州，诣杰营；杰必欲得鸣騄甘心，为元勋报仇。可法为之解释；且曰：『朝廷守土官，岂可擅杀』！乃馆可法于福缘庵。阁部之行也，以川兵三百自随，杰疑之；即分与二百人，然杰疑如故。时鸣騄避泰州任所；而杰防可法甚严，一切出入文移，必呈杰始达可法。寻以乱民横杀，乡绅疏参鸣騄；众皆以为杰强之也。可法留杰营月余，不得要领，而扬人亦苦于城守；乃以瓜洲宅杰。

授福府书堂官陶瀚等六人各锦衣卫指挥僉事，子孙世袭本卫千户。

河南乡官丁启睿俘伪官陈奇等以献。命解京正法。

启睿，故总督兵部尚书；疏言伊弟参将启光等所获也。计归德府同知、知县等官凡七人，俱一日擒之；恢复全郡。然后光塘报云：闯贼胁上中箭，至真定府固关死——皆讹也。

命勘议原任总督王永吉。

御史周元泰言：『永吉侈谈方略，钓誉猎声；先帝超级升迁，授之东抚。及北兵东向，堵御无术；不阅月，连陷七十余城。登抚曾樱偏一隅，兵单将弱；陷一城，则一城报。永吉拥有全齐，兵权在握；敌走于前，兵尾于后，不报陷城而报复城。故同一失陷也，樱则为罪，永吉则为功；居然改抚为督矣。十七年正月，逆贼过河，据有三晋；所望卷甲前来保卫神京者，永吉也。乃三月十九之报哄传，而永吉安在？夫边督拥有重兵，当真、保告急时，调度各抚、联络诸帅奋臂入援，神京固金瓯无恙矣。即不然，当京城失守后，亦宜协同吴三桂迅扫逆氛，以报先帝深仇。胡乃削发被缙，望风鼠窜，以羞朝廷而误中国，负先帝特达之知；此其罪岂寻常逃难比』！时永吉亦自疏待罪。诏责以不同吴三桂杀贼，乃削发先回，罪无所逃；命速勘议。

兵科陈子龙言：『守江之策，莫过水师；海舟之议，更不容缓。请委兵部主事何刚训练』。从之。

命法司及巡城御史苏狱，分应释、应豁为三等，从公举行。

工部尚书程注乞致仕。允之。

命议殉难、从逆诸臣。

御史宗敦一言：『先帝之变，九庙饮痛；而传闻在廷诸臣仗义死节者，自范景文、李邦华而下，仅得十余人。其余拷者拷、逃者逃，甚至为逆贼草诏、屈节称臣者，

大半皆读书中秘、蕊榜特达之人；真犬彘不食其余矣。乞敕九卿、科道博访死难诸臣，从优议恤；或锡以谥荫，或建祠旌表。至从逆称臣辈，或比之畔逆之律，籍其身家、捕其苗裔。使薄海内外，晓然知杀身成仁者，不但垂芳百世，而且隆及子孙；忘君事贼者，不但身名不保，而且巢卵俱尽：不人鼓忠义，捐躯讨贼者哉！臣又闻在内、在外各官，临难偷生、涂形逋逃者，益复不少；虽与从逆有间，而官守、臣谊两难俱容。或概行削夺，处以考工之法；或酌量情罪，治以士师之条。统惟敕部察行』！疏上，得旨速议。时吏部主事夏允彝忧居，着「降贼大议」；其言曰：『或问「唐肃宗安禄山之乱六等定罪，首大辟，次赐自尽，次重杖一百，次三等流贬；今可仿否」？曰：「是不同。唐长安虽破，玄、肃犹存；先帝何在？君崩臣活，较玄、肃时宜加一等」。或问：「唐德宗于朱泚破城，先斩降泚罢任官崔宣、洪经纶等；德宗至凤翔，又斩乔琳、蒋镇、张光晟等。今可仿否」？曰：「是亦不同。泚初起，止姚令言诸逆党耳；非崔宣等助之，岂能横行若此！今闯势久成，诸降贼者自负恩丧节，而非闯逆同起事；则尽法中有差等」。或问：「先帝尝有钦定「逆案」，可仿否」？曰：「是又不同。魏逆虽危宗社、杀害妃嫔、屠戮忠良，而非僭位弑主也。今逆贼，岂魏逆比。从逆当加等，何疑」！或曰：「视唐之六等空加一等是矣；何以定之」？曰：「重者辟而加籍，次辟，次自尽，次重杖乃戍，次远戍，最轻者流近地；无贬法也」。或曰：「加罪一等，实仍六等也。今之降贼者，以何等罪，定何等刑」？曰：「宋企郊、张嶙然、黎志升、韩琳、安伸、白广恩、陈永福等，从贼攻陷城池，或为搜宫、或为用刑，皆大逆，非从逆；不在此数。所谓「从贼」者，皆都城破后屈节者耳。其最重者，如何瑞征、杨观光、韩四维、党崇雅、薛所蕴等受贼宠任，为贼伪大臣者也。周鍾手草伪诏，指先帝为「独夫」，称逆贼为「尧、舜」者也。杨枝起本无官，而投身请降，且伪任文选者也。光时亨，阻先帝南迁，身又降贼者也。杨廷鉴、陈名夏、魏学濂，或献条陈、或定仪注、或请催漕，此弥天罪也：为首等。降逆为要秩，且视旧加升——如庶吉士径受伪编简、科道改为弘文、少卿改为正卿等职，非投顺最先、谄佞最深，何以至此！为二等。如降贼仍为伪官，要虽不改其旧，亦是受贼宠用——尊如伪卿寺、要如伪弘文、伪吏政、伪谏议、伪漕院、直指等官，何容末减！为第三等。如已受伪官，为所疏远、不甚著名者，为第四等。初曾受拷，不能自固而降、又不甚著名者，为第五等。献金、献女以媚贼求免者，而北故未受伪官者，为六等：似亦至平矣。内有已受贼官，于五月十四日以前未闻贼败，先自逃回者，视本等或减一、或减二等；又有非五月十四以前为北复窜归者，身投司宪、良心未减，或于本等议减等。惟至今未归、归而不出、虽云逃归实受贼差委将为内应，此无论逃于何时，断难减也」。或又曰：「唐以早定六等，致从逆益坚，再召史思明乱。今刑章太峻，无乃激之叛乎」？曰：「臣子所论者，一法而已矣，或诛乱而乱定，或养乱而乱滋。诸降贼者，皆误国庸臣，非纵检横才也。贼之灭亡，岂附逆者能支！然国家不可不立一法，以待杀贼归国者。凡诸从逆未归之家，羈其妻子、录其家产；俟之三年，有能擒贼巨魁、建功于国者，赦。虽极重如宋企郊等，苟能斩闯贼并刘、牛等贼，亦赦之可也。惟终于不归，即加等诛族、没籍，又非六等可论矣」』。

乙丑，召原任大学士蒋德璟入阁。不至。

德璟疏言：『臣负先帝大恩，有大罪三。臣于诸臣中独受先帝非常知遇，而今先帝安在乎！佐理无状，误主辜恩：大罪一也。臣虽班次在后，遇事妄言，同官每为咋舌；而先帝每优容之。即兵饷一事，各边虚冒甚多；先帝令臣与户部堂司商核厘汰，意在蠲加派以恩恤穷民；而兵日虚、民日困、饷亦日绌，臣因循不效，坐致鞠凶：大罪二也。同官七人，范景文等皆能殉难；而臣以独存，臣愧六臣矣！臣与陈演同时罢官，演被拷死；而臣以先出独存，臣又愧演矣！臣潜踪水次，隐忍迂延；既不能如屈原抱石自沈，又不能如虞允文借兵督战。徒托恢复之虚词，以自文其苟全性命之实迹，臣又愧部院诸臣矣：大罪三也。臣负三大罪，而尚可腆颜陛见，以厕足于中兴佐命名贤森布之目哉』！疏奏，上俞之；命回籍，候召用。

大学士高弘图请罢。不允。

弘图，先为御史，曾疏诋东林；及再经起补，又以不附魏珪罢。至是，阮大铖召对，历辨冤状，言弘图素知臣者。弘图乃力言「逆案」不可翻，士英与大铖俱怒；故乞罢。

起张肇林为通政司使左参议。

命勘议原任户部侍郎吴履中。

履中自北归，具疏待罪。时金坛士绅檄云：『先帝焦劳十七年，无日不卧薪茹胆；诸臣世恩三百载，何人不食税衣租！贼入宫而莫救，焉用股肱！臣卖主而乞降，是何心肺！既已攀龙髯而莫逮，即当奋螳臂以争先。平时乏嫠妇之忧天，百身莫赎；此际倘厉鬼以杀贼，九死如饴。奈何周鍾以名宿之士口谈忠、许大节不夺，乃授伪职弘文馆学士；吕兆龙本猥薄小儿滥登科甲、当思感恩独深，乃受伪职成都府同知。汉司隶依然仍旧，莽大夫向遽美新！不歌文山之「正气」，君子固所含羞；更闻危素之履声，贼党亦应起憎。魏阉不过弄权，凡媚珪尚从逆论；李贼敢行弑帝，岂伪官可以顺存！至若吴履中，谏垣颇着直声，居乡犹存厚道；方观学政，晋署尚书。既熟讲「明伦」之两字，何难从先帝于九京；而尸行燕邸，既不即拚残躯，「杀身成仁」之谓何！鼠窜里门，又不先谒新君，「为国忘家」之谓何！中兴今幸有帝，无烦抱器于白马西畿；恢复不患无人，何得借口于黄冠故里！若设身留有用，江左之管夷吾欲存；正恐人尽如君，南朝之李侍郎安在！周鍾，本朝馆选也；岂不闻方学士之麻衣上殿！吴履中，本朝户侍郎；岂不闻段司农之正笏击泚！一则过船再弹别调，一则再来不直半文。至于兆龙，又何足道哉』！

丙寅，起升原任礼部侍郎钱谦益为礼部尚书，协理詹事府。

起补原任简讨张居、黄文焕等原官。

大学士姜曰广乞休。不允。

曰广言：『前见文武纷竞，既惭无术调和；近睹「逆案」掀翻，又愧无能预寝！遂使先帝十七年定力，顿付逝波；皇上数日前明诏，竟同覆雨：惜哉！夫「笑骂由人、好官自我」，臣生来无此心脸；所惜者朝廷典章，所畏者千秋清议而已』。又言：『王者爵人于朝，与众共之；祖宗会推之典，所以行之万世无弊也。昨者，翻「逆案」之举，遵内传而罢会推；此不可之大者。斜封墨敕，口助处分：种种覆辙，载在史策。皇上亦知内传之故乎？总由鄙夫热心仕进，见摈公论；遂乞哀内庭，线索关通。夫既在内庭，岂详外事！但见其可怜之状、听其一面之辞，不能无动者，人情也。而外庭口持清议之人，亦有贪婪败类之事，授之口实，得以反唇；而内庭遂以为尽皆如是也。间以事情密闻于上，及得意旨，转授之鄙夫。平台一对，演集旧文，膏唇鼓舌，立谈取官，同登场之戏。最可恨者，阴持会推之柄，阳避中旨之名，使人敢怒而不敢言；而天下事从此不可为』。疏奏，勋臣朱国弼、刘孔昭等交疏攻之。

吏部尚书张慎言四疏乞休。允之；赍银、帀，给应得诰命、恩荫。

慎言辞表有云：『先帝山陵未卜，而臣之祖父母先受丝纶；青宫皇子安在？而臣之子孙妄叨恩荫。况风闻不足进驱虎狼，回首长陵而下松■〈禾秋〉、黍稷，诸臣何以为心？而犹侈口论功乎』！慎言清执有望，人皆惜其去。

礼部请选立中宫。诏以列圣、先帝之仇未报，不许。

上嘉庙张后谥曰「孝哀慈靖、恭惠温贞、偕天协圣哲皇后」。

既以后崩问未确，故缓宣诏。

命太仆寺少卿万元吉再往扬州、临淮、六合一带调辑军民。

元吉临行上言：『臣屡阅北来塘报，有「闯贼被杀」一语；臣愚度之，似是「捆载而还」为确。当贼攻陷京城，师老志骄，原有败道；今被创入秦，更挑精壮，垂涎东南。恐将士在上游者却而趋下，在北岸者急而渡南；金陵武备素弱，何以当此！臣入都将近十日，窃窥人情，类皆积薪厝火，安寝其上。争功者，思为史册之矫诬；角才者，不顾公论之注射：舌战徒纷，实备不讲。一旦有急，不识诸臣置皇上于何地！伏乞申谕臣工，尽洗前习；毋急不可居之功名，毋冒不可违之清议：务萃群谋，以制一胜』。嘉纳之。

丁卯，命繕写「钦定逆案」进览。

御史詹兆恒言：『自崔、魏煽祸，毒危宗社，幸先帝入继大统，芟夷内难；于是以首恶正两观之诛、党从列「春秋」之案，凜如也。然临驭十有七年，此辈日夜合谋，思燃溺灰；先帝神明内断，确不可移。今梓宫夜雨，一抔未干；太子诸王，六尺安在？仇耻未复，悲痛常在圣心；而忽召见阮大铖、还以冠带，使屡年「钦案」一遽同粪土，岂不上伤在天之灵、下短忠义士之气乎？』疏奏，命录进。

戊辰，谥已故辅臣刘一燝「文端」、贺逢圣「文忠」。

一燝，先被魏忠贤削夺；逢圣，居家殉难，故得谥。

扬州城启。

先是，扬州久闭，客主俱疲，督辅可法无如之何。适原任兵科陈泰来至城外，请挺身入城，反复开谕；于是兵民怨渐解。城中士民出见，高杰亦加意抚慰；门始启。

命北回各官俱回籍候议，不许渎奏。

通政司刘士桢言：『北都诸臣鼠窜南还，谓宜埋名省愆；乃包羞忍耻，賫疏求上。不曰臣留生以图恢复，则曰臣倡义以佐中兴；不曰乞骸骨以归故里，则曰宽残生以养亲平。臣每读之，且讶且鄙！虽不敢谓不死之人，尽属逆孽；但既称有筹可展，何不与黎玉田、吴三桂连袂誓图杀贼，而顾踉跄苟全？且恩诏业宽一面，欲归即归，何必仰烦天听！乞立涣严论：凡一切从北遁回，不分大小文武，俱回家静听，不许渎陈。即其中有未降而逃与降而旋逃者，总令束身里居，俟事久论定』。允之。

己巳，诏议郊祀大典。

礼部言：『郊社分祭、合祭，本朝典制先后不同。谨案洪武二年十一月冬至，祀昊天上帝于圜丘。三年五月夏至，祀皇地只于方泽。行之数年，风雨不时；高皇帝断自宸衷，举合祀之典。乃命即圜丘旧址为坛而以屋覆之，名大祀殿。洪武十年十一月丁亥，合祀于奉天殿；以大祀殿未成也。十一年冬十月工成，命礼部去前代之祭，岁止一祀；以首春三阳开泰之时，每岁亲祀，以正月上辛行礼。十二年正月己卯，合祀天地于大祀殿。此高皇帝厘正，允为定制者也。自文皇帝迁鼎燕京，恪守未改。至嘉靖九年，世庙从廷臣议，始更为南北分祀。万历三年，准阁臣张居正疏，复从合祀礼。今中兴之日，实草昧之时。若删繁就简，郊祀大典，宜一禀高皇帝合祀之制，于孟春上辛，岁一举行；若以分祀之制，自世庙更定。统惟裁断』！疏奏，敕廷议具奏。

以总兵吴志葵镇守吴淞。

兵部侍郎吕大器疏劾马士英。以「惜体和衷」谕之。

大器以定策不合，自知不为时容，疏攻士英甚力；皆正论也。内又牵及总督何腾蛟，谓其以三月巡抚，藉士英力奥援速化；识者非之。

大学士王铎入京。

东平伯刘泽清入朝。

泽清初主立潞议；至是陛见，欲自解免，极诋东林与江北党□诳言害己。又言：『中兴所恃，全在政府。旧用大帅，自应廷臣公推；今用宰相，亦须大帅参同』。退谒阁臣姜曰广，曰广微以先日声气讽；泽清作色曰：『我在先帝时为东林所卖，被弹无完肤；不尽杀此辈不止』！曰广默然。越数日，疏纠吕大器、雷演祚荐张捷、邹之麟、张孙振、刘光斗等。又条陈保邦八款，首规政府、末刺朋党，攻江北尤力；语绝恣肆。

辛未，命内臣王肇基督催省直钱粮；已而罢之。

阁臣弘图以内遣不可开也。

命吏部即日会推东抚。

壬申，命严核从逆诸臣。

阁臣士英以荐阮大铖为中外攻，甚忿；大铖亦语人云：『彼攻「逆案」，吾作「顺案」相对耳』。于是士英疏攻从逆，谓『闯贼入都，侍从之班、清华之选，素号正人君子皆稽首贼庭，如科臣光时亨、龚鼎孳等以及陈名夏、项煜等，不可枚举。更有大逆之尤，如庶吉士周鍾劝贼早定江南，衣冠之梟獍；宜加赤族』。又言：『今累累启事罪废诸臣，其案亦先帝所定；何以通不遵依！于所爱而登之天者，即曰先帝原无成心；于所恶而辄之渊者，即曰先帝定案不可翻』。疏上，命科、道官逐名核奏。

东平伯刘泽清请早正年号。部覆，已之。

泽清乞以今岁五月为弘光元年，以慰民望。礼臣顾锡畴谓『明诏已颁，难于再更；宜示不忘先帝』。遂已之。

太仆少卿万元吉请恤死事总兵猛如虎等。下部议。

如虎守南阳，闯贼攻城，战甚力，伤贼精兵数千人；城破，死之。又参将刘士杰、游击郭门、守备猛先捷俱以剿猷、操二贼，力战死；故元吉及之。

癸酉，命驱逐原任山西巡抚郭景昌出都，革其职。

景昌先按山东，以纠故辅杨嗣昌被逮，民哭送盈道。及起楚、晋二抚，俱未到。至是，御史朱国昌纠其不法；命驱逐远去——同乡辅臣铎恶之也。

大理寺寺丞詹兆恒进「钦定逆案」。

闻阁臣士英亦于是日进「三朝要典」矣。

乙亥，复懿文皇太子谥曰「兴宗孝康皇帝」、常妃曰「孝康皇后」。上建文君谥曰「嗣天章道、诚懿渊恭、覲文扬武、克仁笃孝让皇帝」，庙号「惠宗」；马后曰「孝愍温仁、贞哲睿烈、襄天弼圣让皇后」；景皇帝谥曰「符天建道、恭仁康定、隆文布武、显德崇孝景皇帝」，庙号「代宗」；汪后曰「孝渊肃懿、贞惠安和、辅天恭圣景皇后」：颁告天下。

皆礼臣顾锡畴拟也。

丙子，复冠带阮大铖言「剿贼实着」与「防江两合、三要、十四隙」。纳之。

大铖言：『臣观连年国不振，人心涣也；联络行，则人心自固。然荆、襄、楚、豫、淮、海、青、徐延袤三千余里，贼从出之路，即我防贼而失之之路也。贼巢窟在秦，则犯我者定从潼关趋陕、巩而出洛，此其中路；从鱼河堡、韩城、朝邑渡河而窥保德、蒲州、安邑，此其东路；从韩中、信阳而窥郢、襄，此其南路。待其来犯，起而应之，而我人心已风鹤矣。何如联络一定，即敕授六镇臣率重兵由汝宁与楚之抚镇由德安而合驻于南阳，以扼其中路；徐淮镇臣率重兵与辽镇吴三桂合兵而驻于临清，以扼其东路；左镇之偏裨率重兵驻于襄阳，与郢抚徐起元以扼其南路。盖驻兵太远，贼蔓难图；太近，恐孤军易裹。扼此数处，坚壁清野，以逸待劳；俟约会集齐而后分兵进取，此稳着、此上策也。控扼一固，便谋进而驻南阳者可以渐逼于巩、洛，驻临清者可以渐逼于怀庆，驻郢、襄者可以渐逼于房、竹；渐联、渐固、渐逼，而贼之鸱张豕突俱化为釜鱼矣。夫从前用兵之失，只是集众兵孤注于前而后无一应着，所以一败之后，至于不可收拾。倘南阳进，而敕皖抚率兵由六、汝以接应之；临清进，而敕淮阳一镇率兵由邹、滕以接应之；郢、襄进，而川抚率兵由夷陵、荆州以接应之：则我师知后劲有人，胆气自壮，万无溃丧可虞。此接应一着，断断不可预策者也。此外，如□□□□□□□□□□□□□□□□用董卜松落番人，会

西宁之义旅；从甘肃山丹，以发蜂羣怀袖之难；募遣巩、雒之人，以入于商、雒南；而用间牒，为潼关里应外合之人。大约忠信可以激人之真心、金钱亦能得人之死力，权虽不可预设，机实可以互施』。又言：『守长江者，有三要、两合、十四隙可言。何谓三要？江自湖口来，小孤而下莲花、白沙诸洲，股数不一。直至黄石矶、趋皖城，横衿如带；与南岸雁仪紧对，不过四、五里而遥，可以夹扼：此一要也。过此为长风夹、三江口、柘涧湾、乌沙夹、麻布料、六百杖、梅埂、铜陵夹、紫沙、丁家洲，水面浩渺，支派细分。直至荻港，其股又合；南岸板子矶与北岸泥■〈彳 义〉斜对，不过六、七里而遥，可以夹扼：此又一要也。过此为旧县芦席夹、教化度、上三山，其支派复分。直至芜湖，其股又合；南岸清风楼与北岸螺矶相对，可以夹扼：此又一要也。何谓两合？贼自上游南窥者，必由东流、雁■〈彳 义〉、八都、殷家汇、乌沙夹、山口镇以至池口、青溪，而近江之岸有香口、黄湓河以隔之；水路必由小孤、黄石矶、长风夹、罗刹矶以至青溪，而与陆兵始能聚会：此一合也。池口、青溪而下，沿江陆路皆牛车棚水含缺之处，路如锯齿，人马难行；必欲铜婆铺、五溪桥、青阳、南陵、石簰渡山路以抵芜湖。至芜湖，水陆凑集：此一合也。何谓十四隙？江自东流而下，南岸如香口，其源直接建德尧城渡，与彭泽皆通；此处不虑贼分枝下船袭我水师乎？再下则有黄湓河口，其源直接鸡儿滩，东通殷家汇；宜防与香口同也。再下则有大通河口，其源直接青阳、吴田铺诸处，宜防与黄湓河同也。再下则为荻港河口，其源直接青阳、繁昌，宜防与大通河同也。再下则有鲁港，其源直接下方渡、石簰渡，宜防与荻港同也。再下则为芜湖河口，其源直接泾县、旌德，其宜防更倍于鲁港矣。再下则为姑孰溪采石口虽紧绕太平城下，而其源直接宣城、黄池，宜防更倍于芜湖口矣。以北岸言之，对雁■〈彳 义〉则有安庆山口，其源直接太湖仓巷，通宿望漳、浚诸河，此急宜防者也。下此为枞阳河口，其源直接罗刹河、庐江诸处，宜防与山口同也。再下则为汤家沟，此桐城出穀■〈彳 义〉路，宜防与枞阳同也。再下则为灰河，其源直接无为、庐江，宜防与汤家沟同也。再下则为泥■〈彳 义〉，其源直接无为州城，宜防与灰河同也。再下则为濡溪口，此乃巢河出江大路，宜防万倍于诸处矣。再下为西梁山河口，此乃私盐兴贩之藪，与南岸和尚港奸徒呼吸相应；尤为要道宜防矣。山川形势，了然如此。乞敕兵、工二部：两合之地，必集水陆重兵。三要之处，作速相地估工。如雁仪宜筑〔堡〕与安庆相联，泥■〈彳 义〉必筑堡与荻港相联，螺矶必筑堡与芜湖相联；分置游巡之兵，远发陆地之援。务以两合联络三要，以三要弭控此十四隙：斯江防固矣』。疏奏入，服其详明；然未能行也。

丁丑，吏部侍郎吕大器乞致仕。允之。

大器坚主立潞议，虑有后祸，以亲书「告庙祝文」抄录送阁。其谢表末有云：『臣自此云游远涉，恐当事者误以往名远渎天听，致形踪无获；臣不敢不预为请明，入讥其横』（？）。

应安巡抚左懋第疏请北行。命吏、〔兵〕二部酌议。

时懋第闻母讣，自请解任北行。且曰：『如得叩头先帝梓宫之前以报察核之命，臣死不恨』！上许之。

逆贼张献忠攻破重庆，瑞王并原任巡抚陈士奇、监司陈其赤等皆遇害。

时兵民死者甚众，妇女俱砍手死。

赠死难沅阳知县刘士璟山东佥事。

士璟，先为扬郡训导；转沅阳令。北兵至，竭力捍御；城破，不屈死。

命治内臣何志孔罪。既而释之。

初，宁南侯左良玉接监国诏书，不肯拜。江督袁继咸贻书良玉，备道上伦序之顺；乃开读如礼，属内臣何志孔、巡按御史黄澍入贺——实伺朝〔廷〕动静也。澍陛见，面数马士英不宜垂涎纶扉，弃皇陵入朝；又得张献忠伪官周文江银八千两，题授参将：罪可斩。帝曰：『若有此事，先帝时何不纠举』！然澍犹攻诋不休。时志孔亦随澍诋士英；司礼监韩赞周叱志孔使退，将议处分。士英恐失良玉心，疏宽志孔；竟释之。

戊寅，封左都督常应俊为襄卫伯，食禄一千石；子孙世袭。

应俊以皮匠负上脱危，初授都督，世锦衣。至是，复进世封。

左都御史刘宗周请驻蹕凤阳，以图恢复。命宣付史馆。

宗周舟次近郊，疏言：『今日中兴大业，舍讨贼复仇，无以表陛下渡江之心；非决策亲征，何以作忠臣义士之气！至讨贼次第，必先据胜形。江北淮、凤等处虽立重镇，尤当重在凤阳，以驻亲征之师。盖中都天下枢，东扼徐、淮，北控豫州，西顾荆、襄，南去金陵不远；以此渐恢渐进，秦、晋、燕、齐必有应者』。又言：『先帝十七载忧勤，可对皇天而泣后土；一旦身殉社稷、罹古今未有之惨，而食报臣工如此之薄！何怪从逆诸臣累累若若，朝君臣而暮■〈寇，女代支〉仇！昔人云：「死者可忤，生者不愧」！仰惟陛下再发哀痛之诏，将先帝十七年遗事，大书特书，布告天下；而后乃兴问罪之师，请自中外诸臣之不职者始』。疏奏，中外耸动。

命肃朝班。

湖广巡按黄澍疏纠原任巡抚王聚奎。命从重勘议。

聚奎先为御史劾杨嗣昌，再劾陈启新，被谪。及超擢楚抚，至长沙赴任，因人心风鹤，城不可守，奔还武昌；故纠。

己卯，礼部更议思宗庙号以请。诏仍旧。

时忻城伯赵之龙疏言「思」非美称，援证甚核。礼臣顾锡畴改拟「正宗」以请，阁臣高弘图固执前拟。上重违其意，命仍之。

庚辰，诏于明年正月行郊祀礼，仍遵洪武合祀制。

辛巳，大学士马士英疏荐谢升、张捷。命九卿、科道公议。

疏言：『二臣清执无党，又非「逆案」；宜以升为吏部尚书带阁衔，捷为吏部侍郎』。皆阮大铖意也。

升未任右都御史徐石麒为吏部尚书、工部左侍郎何应瑞为本部尚书、户部右侍郎张有誉为左侍郎。

起登莱巡抚徐人龙兵部右侍郎，王心一仍原官刑部右侍。

后人龙以不谨察。

升御史王燮都察院右佥都御史，巡抚山东。

后燮降北为御史。

诏于七月初二日恭迎圣母。

戎政兵部尚书张国维请增防三辅。命覆行。

疏言：『为国之道，必居重方能驭轻。从能为江左策者，无不曰守河而后可以守淮，守淮而后可以守江，控荆、襄而后可以固建业。惟今日事势，渐觉不同。盖患在外者，当以藩篱为先；而虚在内者，更当以根本为急。我高皇建都江南，凤、泗、滁、和等处虽不名「辅」，而实有藩屏意。今皇上已封四镇，握重兵守江北矣；独不曰江南不可狃乎？请除旧设水陆额兵外，另于南城外设战兵三万——少亦一万五千，统以能将，殫力训练；仿汉设京城之制，为朝廷中辅。其沿江下也，请于京口设战兵三万——少亦一万五千，统以能将，殫力训练，为苏、松、常、镇之外藩，淮南之屏蔽，以为朝廷东辅。其溯流而上也，请于芜湖设战兵三万——少亦一万五千，统以能将，殫力训练，为徽、宁、太之外藩，淮西之屏蔽，以为朝廷西辅。中

辅，譬腹心也；左、右辅，譬两翼也。无事分守，有事互援。目前则三路屯兵，始为内地虎豹之势；异日则三路进剿，即以为中原恢复〔之〕图。如是而后，天子尊严、中兴之功可次第举矣』。先是，吏科都李沾亦言：『国家仿藩镇之意分诸镇，宜令督、镇碁置星列，以壮藩篱；而天子内总六师，以重根本』。意与国维疏同。然竟不行者，畏四镇猜也。

壬午，削旧辅温体仁谥，追谥旧辅文震孟等。

礼臣顾锡畴请谥震孟「文肃」、原任礼部侍郎罗喻义「文介」、原任少詹姚希孟「文毅」、原任南京兵部尚书死节吕维祺「忠节」；又言：『温体仁蒙先帝委任最专且久，负先帝最大且深；乃滥叨大典，窃谥「文忠」。乞将体仁原谥或更、或削，使天下知幽芳所在，虽久远而必扬；凶德所归，纵掩护而必斥』。疏奏，震孟等俱依拟，体仁谥削。

升原任礼部何楷为户部右侍郎。

楷为言官，因纠杨嗣昌，谪。至是，以服阕，部中陪推，躡迁部堂；阁臣铎荐之也。

升徽宁道副使程世昌都察院右佥都御史，巡抚应、安等处。

再加升旧辅臣谢升少师兼太子太师、卢世■〈榘，彳代木〉工部右侍郎，升福建按察使王应华光禄寺卿，及兵部尚书黎玉田并充大行皇帝、皇后山陵使。

升、世■〈榘，彳代木〉、玉田俱在北，应华素谄堪舆；故有是命。

下监生陆浚源于理。

浚源故兄澄源，崇祯时为兵部主事；屡疏攻门户，京察为民。至是，浚源疏言：『国家祸本之酷，不在流贼而在百官，不在今日而在四十年前；借国本为题，沽名出色，踵发不休。恭诵监国谕赦内一款：罪废各官，除「逆案」、计典、赃私，不得轻议。然皇上知有「逆案」，未知「逆案」之罗织也；知有计典、赃私，未知计典、赃私之砌陷也。「逆案」一书，先帝专为逆珰祠颂诸臣而发；在事各官弃去本题，一味罗织，砌入「三案」多人。夫「三案」者何？挺击、红丸、移〔宫〕也。「三案」在神祖末年光庙大渐时，魏忠贤尚未用事，有何关涉！诸臣始借「三案」为做官张本，继借「逆案」为陷人坑阱。乞皇上俯赐宸览，知「逆案」之罗织，即知计典之砌陷；知挺击之罔诬，即知红丸、移宫之颠噬』。内又参钱谦益、许誉卿招摇把持，为奸贪尤。疏奏，为通政使刘士桢所参，遂下狱究拟。寻以阮大铖暗解，得释。

甲申，以邱磊为山东总兵。

磊久客山东，纵兵扰民，所至城闭民逃。然麾下多辽人，颇劲；故用之。

升太仆少卿郭维经大理寺少卿、御史宗敦一大理寺右寺丞。

赠举人张履旋御史。

履旋，吏部尚书慎言子也。贼伪官至县搜捕甚急，履旋义不受辱，投崖死。

赠原任吏部主事程良筹光禄寺少卿，举人刘申锡知州、生员杨之金教授；祠名「义烈」。

良筹，工部尚书注子；起兵讨闯，与申锡等俱死。

以黄斌卿防御京口。

命设山东、河南、山西各官，并推巡抚。

苏松巡抚祁彪佳以苏郡焚劫闻。诏禁止之。

先因苏州衿民闻项煜等从逆，纷纷檄讨。至五月初十日，奸民乘机焚抢；于是煜与大理寺正钱位坤、通政使参议宋学显、礼部员外汤有庆四家，荡洗无遗。二十五日，常熟又焚；原任给事中时敏家三代四棺，俱行劈毁。彪佳言：『三吴民情嚣动，而今所借者又忠愤义激之名；与其震之使惧，不若感之使服。夫治人之防，在国法；国法诚申，人心自正。乞将现在从逆诸臣最着、最真者先行处分，使地方士庶无所借口；余仍遵照恩款，俟其反正。再乞严旨申谕焚劫之条，加等重治』，允之。时太仓讨檄有云：『岂方、黄之屠戮过惨，报以贰心之臣；抑崔、魏之衣钵犹传，复睹叩头之事』！人以为名言。

命都司同知陈谦奖赉郑芝龙，调其兵六千入卫。

乙酉，命速议北使事宜。

督辅可法言：『吴三桂破贼后，畿辅间必为我有。但彼既能杀贼，即为我复仇；予以义名，因其顺势，先国仇之大而特释前嫌，借兵力之强而尽歼丑类，亦不得不然之着也。今□马闻已南来、凶■〈寇，女代支〉又将东突，未见庙堂议定遣何官、用何敕、办何银币、派何从人；议论徒多，光阴已过。万一北兵至河上，然后遣行，是彼有助我之心，而我反拒；彼有图我之志，而我反迎。既示我弱，益长敌锋。

乞敕兵部速议』！从之。

命举堪任西北守、令者。

督辅可法言：『目今人才告乏，西北危北，人人自危思避。臣以为宜仿保举法，通行省直抚、按、司、道及在京九卿、科道官：果才胆过人、堪拯危乱者，不拘资格，各举一人；起送到京，赴臣军前，酌补西北守、令缺。俟有功，超擢』。从之。

增设兵部侍郎二员、镇江抚臣一员。

命鲁王暂驻处州、崇王暂驻台州。

召对阁臣高弘图等。

为北使事也。凡七议，皆弘图等定：『一、梓宫葬田贵妃坟园，此出自逆■〈寇，女代支〉。合于天寿山特立陵墓，选日恭厝；东宫、二王神椁访有确据，亦选地安厝如礼。一、吴三桂、黎玉田仗义购兵，当日必有成说。陈洪范此行，须与吴镇议，或面、或书。如议分地，割榆关外瓠脱与之；以关为界。若议榆关内，则山陵单弱，何以安设备守！惟金、币不妨优厚，应着于令。助我剿■〈寇，女代支〉有功，复应劳军若干，亦宜从厚。若许使臣别有便宜，非庙议佥同以去不可。一、建州南北关旧賚有制，崇祯三年后，概废。今议款，料必并议旧賚。须告以中原沦陷，物力未充；俟三年匹马不犯后，每量增岁币十分之三，渐补积年缺额。一、国书体裁，景泰中，曾称「也先可汗」；今或「可汗」之，或称「金国主」，宜会议。一、使外国，具有成礼。今敌据燕京、称帝号，我使第不至屈膝，即是不辱命，全天朝。一、岁币多寡，陈洪范到时可议。十万外，数目太多，必须驰奏；十万上下，听便宜行。一、敌若先勒银、币然后退，须陈洪范留燕都，急将誓表驰奏；再遣官賚银、币、誓诏往，洪范及吴三桂、黎玉田面议，令敌〔血〕书誓，乃为有济』。疏奏，命会同府部等官从长酌议。弘图曰：『必不得已，山东决不可弃，当以河间为界』。士英曰：『南北分疆，与今上为与国可耳』。工科都李清疏言：『今之言款，大约以不忘陵寝、不忘神京，借口讨闯为言。然既曰「经理」、又曰「款」，则凡此陵寝、神京者，力取乎？抑口舌争乎？若以力取，势必长子督旅，行人执辞曰：「若还吾地」！但未知猛士谋臣，果如雨如云否？能唾手获否？若言求金曾归宋燕京与河南、陕西矣，然不旋踵失；非徒强敌能取，而气索则力孱，其求不足以守之也。今无论往而未必求，求而必不得；即求而得矣，未得而我之酬谢有穷，既得而人之征求何极！夫以小民脂膏不用之饱腾，而作金帛糜费；民穷而饷匱、饷匱而兵枵、兵枵则冲突，情见势屈，恐江南已骚然糜敝，而谓吾能返陵寝、神京否？若「借敌讨闯」一说，古有之矣：善则回纥助唐，不善则蒙古翊宋。然考其时，唐虽借援回纥，而帅之者李、郭；宋虽借援蒙古，而协之者孟珙：自恃而不全恃人，故能为我用。今谁为李、郭？谁为孟珙？可恃乎、不可恃乎？则当思真德秀之言，

曰「亟图自立」也。臣愿皇上一面遣使，仍一面下诏亟筹自立计；则以款为宾，以战、守为主。我既有备，何忧事之不济哉』！疏奏，俞之。

偏安排日事迹卷三

下于奉先殿，以代行皇帝、皇后祔祭。

以太庙未成故也。

命暂停缉事衙门，以五城御史纠察。

苏松巡抚祁彪佳言：『洪武初，官民有犯，或收系锦衣卫；当事者因非法凌虐，高皇帝乃于二十年焚其刑具，送囚刑部审理：是祖制原无诏狱也。后乃以锻炼为功、罗织为事，虽朝廷爪牙，实权奸鹰狗；迫勒成狱，法司无敢雪冤：此诏狱〔之〕弊也。洪武十五年，改仪鸾司为锦衣卫，端常直驾侍卫，未尝有所理掇。迨东厂立，始开告密；用银而打事件，得贿而鬻刑章。无籍凶恶，倚恃投充；鲜耻士绅，交通幸免。飞诬多及善良，赤棍立致巨万。招承多出吊拷，怨愤充塞京畿。欲绝苞苴，苞苴弥甚；欲清奸宄，奸宄益多：此缉事〔之〕弊也。若夫刑不上大夫，祖宗忠厚，立国之本。及逆瑾用事，始去衣受杖；刑章不归司败，扑责多及直臣。本无可杀之罪，乃加必死之刑。当其血溅玉阶、肉飞金陛，班行削色，气短神摇；即恤录随颁，已魂惊骨削矣。天下归忠直之誉，朝廷受愎谏之名：此廷杖之弊也』。疏奏，阁臣曰广拟革；不允——诸内臣意也。曰广疏奏甚力，有「缉事〔不〕除，宗社且不可知，何厂卫」等语；乃命五城御史体访——识者已知厂卫之必复矣。御史朱国昌复极言立厂卫之害；报闻。

升国子监监丞陈龙正礼部员外、原任临川知县张采礼部主事。

后北兵入嘉兴，龙正居家病症；感愤，不疗死。

加去任吏部尚书张慎言、工部尚书程注太子太保，予荫。

巡抚湖广何腾蛟疏陈守楚要着，以固长江。从之。

言『楚土地自荆、襄下带蕲、黄，沿江二千余里；自非于扼要害处各设重兵宿将，一处疏虞，全疆溃败。除武昌为全楚根本、已有镇臣左良玉世守外，其扼要之地有四：一、荆，襄；一、岳阳；一、承德；一、蕲、黄。荆、襄，全楚门户，在所必争。但目前尚稽恢复，则兵将安插无地；防御之着，宜并力于岳阳设总镇一员，统领水师五千、马步一万，直抵荆河口，湾泊于监利、公安等处，以防狡贼之顺流；马步屯札于城陵矶，以应舟师之声势。水陆俱备，则上流固。承天，陵寝所在，难听贼久踞，然未可轻率；其原设总镇应驻兵于仙桃、汉川两处，内固汉、沔各湖之险，外连承德各寨好义之民，以守为复局从此定。再如德安与蕲、黄，皆属吃紧。惟是蕲、黄近而德安远，守远不如守近；宜设兵一万、总镇一员为之驻防，起自阳

逯、团风、道士袱以至富池、田镇、清江各要口皆属其辖；而更联络蕲、黄山寨，作我外援，则下流固。若驰驱中原，固有三路并进之功；即暂安江左，亦有万里长城之势』。疏奏，命议行。

戊子，原任大学士孔贞运卒。

谥原任督师兵部尚书卢象升「忠烈」。

象升以丁忧督师，死贾庄之战。先帝时，赠太子少师；至是，补谥。

起用罪废各官；复原任左佾都金光辰原官，候服阙用。

光辰，先帝时以御前救刘宗周故，谪。余皆罪废，或降调者。

升李之椿光禄寺丞。

之椿，以吏部降。

己丑，吏科都章正宸疏陈国是。

正宸言：『今日形势，视晋、宋更艰难。肩背腹心，三面受敌；而捍将骄兵，漫无足恃：岂真虎踞龙蟠不拔之业哉！而当事泄泄偷息，何也？遥望故都，伤心离黍；夫亦念祖宗弓剑所藏乎？先帝、先后殉社稷之烈乎？青宫、二王陷沦贼垒望援嘘涕乎？从君以亡者守正诸臣冤惨乎？三百年生养黔黎尽为虫沙猿鹤乎？两月来，闻文吏锡鞶矣，不闻献馘；武臣私斗矣，不闻公战；老成引遁矣，不闻敌愆；诸生卷堂矣，不闻请缨。如此日望兴朝之气象，臣知其未也。今宜以进取为第一义；进取不锐，则御守不坚。当亟檄四镇分渡河、淮，与河北、山左协力，互为声援；使两京血脉通，而后塞井陉、绝孟津、据武关、攻陇右，豪杰并起，贼不难旦夕殄矣。陛下何不缟素亲率六师至淮上，岂必冒矢石、履戎阵哉！声震同仇，勇愤百倍也』。

庚寅，升应安抚左懋第兵部右侍郎兼都察院右佾都御史——经理河北、联络关东军务，加马绍愉太仆寺少卿兼兵部职方司郎中、陈洪范太子太傅，款北。

书称「大明皇帝致书北国可汗」，以银十万、缎绢各数万行。又赐陷北诸臣及吴三桂诏谕，通和意。懋第言：『臣此行往问先帝、后梓宫，又问东宫、二王消息，当衰麻往，谊不敢辞；但臣衔当议。臣同行之人，不得不言。臣衔以经理河北、联络关东为命，带封疆重寄之衔；而往议金缯、岁币，则名实乖和。以此衔往敌所，将先往夺地而后经理乎？抑先经理而后往乎？此衔之当议者也。若同行之马绍愉，即臣壬午年所特纠。绍愉赴北讲款，奴颜婢膝，许金十万、银一百二十万；敌送之参

、貂无数，令复归。臣疏言「中国宽一马绍愉，北廷添一中行说」；而绍愉遂递解回籍矣。今与臣连鑣出使，可无一言哉！如皇上用臣经理，祈命洪范同绍愉出使，臣不敢复言北行矣。如用臣同洪范北行，则去臣「经理联络」之衔；但绍愉似可无遣也』。疏奏，阁部俱请止绍愉，改用原任蓟督王永吉。诏遵前旨。

安庐巡抚张亮以闯逆可乘，请解任办贼，视贼所向进讨。允之。

寻召亮入京议；既而不果，复遣还任。

补原任刑科李汝灿、御史黄宗昌原官。

汝灿，先帝时以建言，处。

命总兵金声桓驻防扬州。

辛卯，补原任工科陈燕翼原官。

燕翼，先帝时以劾黄澍冒功，谪。

升户科都张元始太常少卿。

壬辰，赠先朝名臣吏部左侍郎叶盛为吏部尚书，补吏部尚书罗钦顺荫。

从礼臣顾锡畴题请也。远年补荫，人争觊觎矣。

定守护凤陵戍兵五千人。

追谥继妃李氏「孝义端仁、肃明贞洁皇后」。

授进士陈震生等中行职，班三诏。

震生、汪铉、卢象观、张翀之、王鸣珂、欧养素六人，皆应授邑令。至是，借差，改京职；与大理寺丞詹兆恒同班诏四方。

命严汰札付武职；非兵部、督、抚总兵等官，不得擅畀。

原任户科熊汝霖疏请唤群迷、昭臣分。俞之。

疏言：『当事诸臣争夸定策，罔计复仇；处堂未已，且为斗穴。噫！此乾坤何等时

，不刻刻筹兵筹饷、议战议守：如何防江？如何守淮？如何控制荆、襄？如何定齐、豫？如何使诸镇贾勇北伐，毋恋恋淮南？如何使督、抚一意西征，毋悬悬江左而一味招摇构嚷、露齿张拳？始武与文争，继文与文斗。清夜自想，究有何因？是盗已入室而奴且哄庭，主人翁俛首听之；天下事其有济哉！疏奏，俞之。

癸巳，镇江于永綬等兵乱。

督辅可法部将四人刘肇基、陈可立、张应梦、于永綬，皆以功迁镇帅，加宫衔；而永綬尤桀黠。相与统骑兵百余、舟二百余，从可法北征，暂住京口。会浙抚所调都司黄之奎亦部水陆三、四千戍其地；之奎安静，独镇兵横。偶一骑买民瓜，半予价；民冒之，□刀砍民；兵怒，缚买瓜者投江中，遂大隙。六月二十六日，浙续发防江兵至，守备李大开率之；怒镇兵冲道，砍其马，杀二、三人。马负剑驰本营，镇帅知有变，率兵与大开相击；他浙营坐视莫援，大开矢洞胁死。镇兵乘机焚掠，死者约四百人，罄虏财物。抚臣祁彪佳闻乱，从苏郡整部伍，疾至。永綬等兵闻风，亟遁。彪佳兵追之，所收货资、衣甲甚众。奏闻，命四将由六合趋可法军前听核治而已。未几，移驻仪真镇，民始安。

革北还御史江承诏职为民。

以应按贺登选代题，故先削职籍。

升四川巡按刘之渤都察院右佥都御史，巡抚本省；以御史米寿图巡按。

吏科左熊汝霖言：『蜀事已为书腐陈士奇坏尽，今不宜用一弱不胜衣之之渤』。不听。士奇为提学，则谈兵；及为巡抚，则又谈文。故汝霖及之。

户部以兵增饷缺，请敕会议量入为出；又请开援纳事例。俱从之。

甲午，命从逆诸臣以六等定罪。

从科臣马嘉植请也。嘉植言：『今日可忧者，乞师□□召兵□□，自昔为患。及今不备，万一饮马长淮、侈功邀赏，将来亦何辞乎』？又请从逆诸臣仿唐六等定罪。从之。

命各镇举用大帅，俱听督辅史可法题请。

召对北使陈洪范、马绍愉等，议恤原任兵部尚书陈新甲。寻以科疏，已之。

时左懋第以忧不入，独阁部、九卿、科道与洪范及绍愉俱对。上言及款北，绍愉言

：『先帝时，曾命臣使北；若款成，必无今日』。上问「何以不成」？绍愉言：『使者再往，则款矣。主款者陈新甲，以言官劾弃市，故辍』。上曰：『如此，新甲应恤』。诸臣无应者，独词臣陈盟朗应曰「可」。上因命即恤，并察处劾新甲者。时诸臣恐殿上相争，蹈勋臣前辙；遂退。既而工科都李清等言：『新甲受任中枢，楚、豫丧失者为襄阳、河南、汝宁、南阳、归德等六郡；即恭皇帝饮恨上宾，祸亦由此。且又误听张若麒言，出关催战；举五镇八万之精锐，尽丧海滨。今者皇畿沦陷，其病原此。不以为罪，将举而功之乎？当日刑部初拟，犹缓以秋刑；先帝竟改票另拟，加之立决。盖恶其以浪战误国，又恶其以泄款辱国；而非以主款死也。乞将新甲罪状再颁天言，仍昭原拟』。又给事中袁彭年、陈子龙复特疏争之。遂已。

改吏部员外倪嘉庆为户科给事中，察核直省钱粮。

大学士高弘图荐其有心计故也。

丙申，左都御史刘宗周言文武将相未尽调和、宫府表里多出权宜，又以纪纲法度、风俗人心为言。俱嘉纳之。

命速议开国、靖难及正德、天启惨死诸臣谥。

时靖难诸臣谥虽奉俞旨，然以人远事湮，又礼部顾锡畴将祭南海，中止。至是，工科都李清复举崇祯时前疏请之。得旨：「速覆」。

丁酉，以杜弘域、杨御蕃、牟文绶、丁启光、窦国宁、胡文若补三大营各总兵官，弘域等统一营至五营，启光等统六营至十营。

命推补原任户部尚书于仕廉等。

从忻城伯赵之龙请也。

淮扬巡按王燮以皇太子及二王皆遇害闻。

时有未任阳春县典史顾元龄于五月出都，亲见闯败奔，被吴三桂西追去讫。又传言皇太子卒于乱军，定王、永王俱于贼走日遇害于吴三桂宅；内皇城宫殿、太庙、享殿各门俱焚，惟存正阳一门，前三门外焚劫更惨。燮据元龄言以闻。闻者流涕。

戊戌，命核凤阳总督朱大典。

原任户科熊汝霖言：『近闻北骑南下，山东诸郡岂可轻委！南北诸镇非乏雄师，不于此时渡河而北——或驻临济、或扼德河，节节联络，断其来路；直待长驱入境，

徒欲一苇江南，公然向小朝廷求活乎？且闯贼遁归，志在复逞。及今速檄诸镇过河拒守，一面遣使俾北回轅，然后合五镇全力分道西征杀贼，可以成功。总在我内外文武诸臣凡事实做、急做，无滋议论、无迟时日而已』。又言：『大典虽屡挂弹章，然毁家措饷，宜令充为事官，北行』。命核议具覆。

抚宁侯朱国弼疏枚卜、会推同五府。不允。

国弼言：『间者兵部会推勋武臣，而九卿、科道与议；独吏部枚卜会推，臣等不问。此后必约见任诸勋，虚公商榷，列名上请』。诏以朝廷设官，各有职掌，即阁部不得相侵；会推五府，出何典制？已之。

起补大理寺正乔可聘河南道御史，掌印。

大学士马士英乞休。不允。

以刘宗周疏纠也。

庚子，万寿圣节，帝御殿，百官朝贺。

识者以为国哀伊迺，宜仿宋高宗免朝故事。

升开封府推官陈潜夫为江西道御史，巡按河南。

壬寅，工科左利瓦伊樾请改款北为酬北，□□□□。从之。

命上供应用诸物须内衙门汇奏点过，方发部备用。

工科都李清言：『皇上自中州播迁后，栉风沐雨，备极艰难。光武之不忘麦饭、豆粥，唐宗之不忘质衣馊舍，皆从安乐中忆艰难，盖以励俭也。若皇上持此自励，则安不忘危，侈源塞矣。非然者，奢用必至多藏，多藏必至厚敛，厚敛必至烦刑；恐全盛之天下膏血亦殫，而况半壁之膏血有几！伏乞申飭内外，废无用之金玉、罢不时之传奉！勿谓奢小而为之，锱铢亦巨万之开端；勿谓俭小而不为，巨万亦锱铢之层积』。上俞之。

诏谥荫大典，子孙不得擅求；渎奏者禁。

谥山西巡抚蔡懋德「忠襄」、随州知州王焘「忠愍」。

懋德，以督战遇害；焘以城陷，自缢。皆礼臣顾锡畴同里也。

命事系兵机者，照例密封下科。

癸卯，革阁部镇将于永绶职，带罪立功；降〔刘〕肇基、张应梦各三级。仍命自今兵将调集地方，俱听抚臣节制。

追赠开国功臣颍国公傅友德、宋国公冯胜等。

从工科都李清言也。

革从逆诸臣职；命法司察有确据者，先行抚、按解京正罪。

原任户科熊汝霖言：『北都一案，臣尝访之来者，确知梁兆阳、杨观光、何瑞征为从逆献谋之首，侯恂、曹钦程为出狱谢恩之首，方岳贡、魏藻德为见朝报名之首。而汤文琼以布衣死难，衣带中藏有「位非文丞相之位，心存文丞相之心」二语；贼兵以此责陈演，斩于市。应揭出以惇史』。疏奏，命核议。

甲辰，革原任漕道庄应会职。

兵科陈子龙疏纠其贪也。

荫从龙内臣屈尚忠、田成等各弟侄都督同知，世袭锦衣卫指挥使。

礼部尚书顾锡畴疏纠从逆诸臣。命察议。

疏内所纠，乃何瑞征、周鍾、项煜、杨廷鉴、陈名夏、魏学濂、方以智也。

夺故辅温体仁、薛国观、周延儒官荫、总理熊文灿祭荫宫衔。

御史郑友玄言：『延儒之贪，倍于国观；体仁之奸，又毒于延儒。今延儒、国观皆相继伏法，独体仁以先死逋诛。乞将体仁官荫、贐产，或显斥严追、或比秦桧丑缪之谥，貌其奸慝；勿令国观独恨地下』！疏奏，追夺有差。

都察院左都御史刘宗周入京。

丙午，督辅史可法疏陈分设四镇始末，且请朝臣论是非、疆臣论功罪。纳之。

初，四镇垂涎扬郡；可法不得已，许有警时各安顿家眷。谓之「有警」，则无警时不得驻耳。然以调停故，坐羁北伐；识者恨之。

议旌北都死难布衣汤文琼。

东平伯刘泽清请宥故辅周延儒助饷赃银。命刑部酌议。

时辅臣姜曰广见泽清疏，恶其渐干朝政，故暂停不下；欲令发自言路，奉有俞旨，然后下泽清疏，止批「已有旨」而已。既久无言者，乃票「发部」。

戊申，户科罗万象请以副榜充贡。不允。

阁臣铎意也。时请赠荫者，铎概持之；然自他辅票拟，又允之。滥觞遂开。

兵科陈子龙陈防守要着。命速行。

一曰北使宜速：『臣料敌今在临、济间者以安民为名，不过建州零骑，或即我降将。万一大众南下，而我玉帛待诸境上，城下之盟，国体益伤！宜敕左懋第、陈洪范等星驰渡淮，先赍敕谕往；而令马绍愉等护银、币续行。沿途将登极诏四行腾布，使诸夏晓然知有共主，则人心尚可鼓也』。一曰河、淮当守：『淮自濠、梁以上，秋冬之际，浅而难守；河自徐、邳以上，归德、汴、洛之境，荒远近■〈寇，女代支〉。今我所恃江北障蔽，四镇兵耳。刘泽清扼守淮阴，刘良左并镇濠、寿，差为得策。扬州无藉兵守，高杰之来，安顿家眷；今秋气渐爽，闻其久怀进取，自当速往徐、邳本汛，控黄河上流。黄得功素称忠勇，亦当移镇符离、宿州，以便东西策应。其应用粮饷，当先待会计，陆续措发。移兵之期，断不可过此月矣』。一曰江防宜密：『数月以来料理江防，兵非不多、将非不勇；但患统制未一、分汛未明，船只鲜少耳。今黄蜚虽未受事，而上有郑鸿逵之师、下有黄斌卿之师，但当画分信地，凡诸零星兵船皆附丽之，令其益广招募；郑、黄二师须兵万五千人、船五百号，声势始壮。似当即日给发，令刻期受事者也』。

礼科袁彭年请授杨鹗沅抚、王永吉楚督、牟文绶楚镇，以备闯逆。命速议。

命拏究四川贡生吴邦策。

先是，邦策寓都门，目击闯逆变，取伪吏部告示并私记，藏之发中。至留都，刊「国变录」；分死难、刑辱、囚辱、潜身、叛逆、授官、诛戮七款，牒列姓名。内职方郎龚彝以崇祯十六年陛辞，而误刊授职。疏辨，因命拏究邦策。

己酉，宁波府通判朱统𦉑疏请保举。不允。

旨谓「先朝之坏，坏于保举；不必行」。

内传户部左侍郎张有誉升本部尚书，阁臣高弘图等缴御札争之。不听。

有誉曾任漕储道，上召对时，勋臣朱国弼力争漕运总兵不可罢；有誉不与辨，惟历陈漕事原委，洞如指掌。国弼一语不能对，颊赤而已。至是，以尚书周堪赓久不到任，传升有誉为之。识者谓「且启阮大铖等传升渐也」，劝有誉力辞；不能从。工科左利瓦伊樾言：『当此军兴浩繁，有誉经济通才，用之甚当；乃臣同官章正宸请缴御札、阁臣弘图等合辞引咎，岂为有誉争哉！正以中旨传宣之渐，不可长耳。臣愿皇上慎持之』。报闻。

庚戌，命马上差官催礼部右侍郎黄道周赴任；又命吏部主事叶廷秀以都察院堂上官，涂仲吉、朱水明以翰林秘秩用。

兵部侍郎解学龙疏荐黄道周等；票拟者，阁臣铎也。前超升何楷、今超升廷秀，遂为异己借口矣。

辛亥，上传〔谕群臣〕。

谕曰：『朕痛九六之运，方资群策，旋轸故都；乃自殿争启衅，驯至穴斗成风。封事虽勤，庙算安在！先帝神资独断，汇纳众流，天不降康，咎岂在上！朕本凉德，冀尔文武大小诸臣鉴于前车，匡复王室！昔汉宣起于艰难，丙、魏合志；唐肃兴于灵武，李、郭同心。今若袒分左右、口角玄黄，天下事不堪再坏！兹特谕尔诸臣和衷集事，勿颈之交，仇忘廉、藺；同车之雅，嫌泯复、恂。朝廷以此望尔诸臣，尔诸臣以此体朝廷意；不则，祖宗成宪，弗尚姑息！特谕』。

复原任御史毛羽健原官。

羽健，先帝时会纠阮大铖、杨维垣；后坐袁崇焕党，革职。

命高墙庶宗除不轨另议外，余尽释放。

命起用郑三俊、易应昌、房可壮、孙晋等。

从兵科陈子龙请也。可壮后仕北为刑部侍郎。

命都察院严禁各衙门词赎。

御史朱国昌言：『南京文武衙门，自勋爵部寺及散秩首领皆受词贪赎，淹禁平民』。故禁之。

壬子，大学士高弘图等请建中宫。命候皇太后回銮日行。

举经筵，以公弘基知经筵，辅臣可法、弘图、曰广、士英、铎同知经筵；词臣钱谦益、管绍宁、陈盟充讲官，张居为展书官。

太仆寺少卿万元吉请急发高、黄二镇兵饷，以便进取。从之。

元吉言：『高杰闻两■〈寇，女代支〉相持，欲乘机复开、归；伺便入秦，夺其巢穴。所乏者，饷耳。黄得功见朝议款北，力言不可示之以弱，恐长觊觎、恣要挟，辱国匪小。二镇之论，与款议相胥。今款金既颁，防饷即宜速措。惟是东南民力实竭，催科一急，鼓噪四起。惟望皇上卧薪尝胆，以澹嗜好；早朝晏罢，以斥晏安。日进阁部、台省诸臣，戒绝玄黄，广收谋断。凡行间兵事各疏，一一简出，面商批答；不许所司延诿』。从之。

吏科都章正宸疏铨政十二事。下部覆行。

一曰惜人才：『北都沦陷，忠义志不图生；天下之才，十去一、二。燕赵豪杰、齐鲁英秀、秦晋雄风，不可复问；天下之才，十去三、四。大河以南仕于北者，又以污滥，死灰难然；天下之才，更十去五、六。所留以资中兴者，仅在荆、扬、益之间，可不知爱惜乎！廓纆恢纲，无以细过小眚，复从湿束；可不叹于乏才』！一曰甄督、抚：『督、抚者，吏治系焉、军政系焉、人才民生系焉。今见在督、抚支撑半壁，孰贤、孰否？宜去、宜留、宜更，必冢臣力秉虚公；庶封疆无误』。一曰催俸册：『吏部俸册，有年月、有贤否，据迹难移，法成不变。今掌故无凭，亲狎屡迁、疏逖不调；虽欲平进，其道何由！必据呈牒咨访，是易公举为私访、变明试为暗报也。行催立限，势不容缓』。一曰慎名器：『国步多艰，方鼓忠智。定策既茂厥赏，其余复人自请叙，将使金银不克其印、束帛不克其锡，何以免瓜果之诮、息繁纓之论哉』！一曰持职掌：『当使用人独归吏部，不宜政出多门』。一曰重郡守：『得贤守一，胜雄师百万；不宜令上制司道、下制司理也』。一曰补悬缺：『长吏员缺，无如今日；宜令该抚、按随才题授，据成败而核功罪』。一曰核环赐：『夫用人拨乱，其可使凡俚近器侥幸功名哉！宜将荐剡察核核本末、缕条用舍，酌年资、审才品，应升者升、复者复，或别用、或休致；无徇虚声，隳乃实迹』。一曰酌行取：『古官宿其业、吏不数更，久任以责成功；近减俸行取及未周一考之士，不已汰乎！今即破格抡才，断宜以年为准；使群吏戢心供职、蠲多应之思，而后神羊屈轶可遇也』。一曰肃疆吏：『文武诸臣共寄封疆，则共宜死事。逆者逆贼长驱，望风奔窜；不斩误国之臣，安激报国之气！即有智谋勇决，可效桑榆；亦必先定罪案，徐论才谔。未可遽登启事，以开幸门』。一曰饬废官：『宥过之典，与志士更始，所以作天下气也。然爵见重，〔则〕士乃劝；法相守，则士知恩。宜令废官罢吏，务加严饬；不许叩国阁』。言皆切中时弊。

罚原任户科熊汝霖俸。

汝霖言：『臣观目前大势，无论恢复未能，即偏安尚未稳！孜孜讨论，止应有「兵饷战守」四字；今改为「异同恩怨」四字。即一、二人之用舍，而始以勋臣，继以方镇；固圉恢境之术全然不讲，而惟笔锋舌铎是务。且闻上章不由通政，结纳当在何途！内外交通，神丛互借；飞章告密，墨敕斜封：端自此始。可不严行结究，用杜将来！至厂卫之害，横者借以示威，黠者因而牟利；人人可为叛逆，事事可作营求。缙绅惨祸，所不必言；小民鸡犬，亦无宁日。先帝时，止此一节，未免府怨。前事不远，后事之师；思先朝所以失，即知今日何以得。事急矣，及今为之已迟，再欲不为何待！釜游化为穴斗，臣诚不知何说』！疏奏，罚俸。

甲寅，户科倪嘉庆追论枢辅杨嗣昌调度乖方，请削官、荫。不允。

疏言：『嗣昌当敌入关时，不宜尽调剿■〈寇，女代支〉有绪之卢象升、孙传庭等东驰，致■〈寇，女代支〉氛日炽』。时阁臣士英任兼枢辅，故欲宽嗣昌以自为地；遂不允。

乙卯，大学士高弘图、王铎以争东厂不得，俱乞休。不允。弘图又请召还督辅可法；报闻。

偏安排日事迹卷四

八月丙辰朔，日有食之。车驾祀先师孔子。

礼科都沈胤培言：『恭遇皇上传制祭先师孔子，亲聆天语，责卫臣尽职。夫朝廷之礼不同：有视朝之礼，有升殿之礼。视朝，容或面商大政，宣谕群臣。若升殿，非大朝贺，即大祀典；未闻可以传宣而有越班奏事之官也。况崇儒重道，宜尚德缓刑；何对越先师之诚未已，遽兴肃清奸宄之思！若日食之变，尤有可言。「春秋」书灾，首谨日食，大概小人凌君子之象。今之蒙气，强半在下。玄黄勇于私斗、黑白混于分歧，则意见蒙之；干进者人思跃冶、陈情者章满公交车，则利诱蒙之；而且封事不由银台，则蒙于职掌；匿名屡揭街衢，则蒙于风俗。祈皇上独揽干纲，专精斧藻；日升月恒，自今伊始』。俞之。

丁巳，命会议先臣于谦功——从吏部尚书徐石麒请也。

先是，谦子应天府尹冕，无嗣；徽人于嵩冒称谦族子，得世杭州千户奉祠，后改世锦衣卫。时御史黄澍亦由徽籍移杭籍，故为嵩后之英谋求改伯；石麒等疏，即澍草也。工科都李清、吏科都张希夏皆以为不可，议遂沮。

兵科陈子龙请优〔□〕涂仲吉、祝渊以台谏。不许。

仲吉以争黄道周，廷杖；渊以浙举人争刘宗周不当罢，被逮。故子龙荐之。

廷推户部侍郎张有誉本部尚书。允之。

命补河南巡抚及缺官，兼察规避道、府有司。

升吏科左熊维典户科都给事中。

起补易应昌都察院左副都御史，升礼部右侍郎王廷垣左侍郎、詹事管绍宁右侍郎。

起原任顺天巡抚杨鹗兵部右侍郎兼都察院右佥都御史，总督川、湖、云、贵、广西等处。

东平伯刘泽清疏攻宪臣刘宗周。

先是，宗周疏出，都中谤纸喧传，有「吴甡等聚兵句容，合东林为不轨」语；更言「四镇方修行署，将入清君侧」。缙绅岌岌，旬日方定。越数日，泽清疏至，明己有功无罪；且言宗周若诛，即卸职——求皇上赐剑！语狂悖。上不得已，温旨谕之。

。

苏松巡抚彪佳请定三吴财赋。

彪佳言：『西北陷没，财赋皆仰给东南供输，非旧贯可泥。请委原任广州府推官颜俊彦与各郡绅士会议更定』。允之。

礼科袁彭年疏纠宗贡朱统■〈金类〉。报闻。

统■〈金类〉纠辅臣曰广，彭年疏驳之。通政司刘士禎亦言统■〈金类〉越奏违制，自求罢斥。俱报闻。

己未，浙江总兵王之仁请开屯金塘大榭。允之。

命优恤蓟国公吴三桂父吴襄。

襄，故总兵，留京师；李自成勒襄为书招其子三桂降，三桂不从，遂并妻祖氏、二子、一女皆被害。至是，三桂贻书刘泽清，期合兵灭闯。泽清以书闻，赠襄辽国公，谥「忠壮」，祖氏赠夫人，给祭葬。

升编修杨廷麟左庶子、刘正宗左中允。

廷麟以御史祁彪佳荐，转今职；正宗后降北，复为编修。

庚申，议起原任蓟督王永吉巡抚山东、凤督朱大典巡抚河南，命吏部堂司面奏。

以永吉现在勘议、大典尚未结案故也。

加阁臣可法少保兼太子太保、武英殿大学士，弘图太子少师、曰广太子少保并文渊阁大学士，士英太子太师、武英殿大学士，铎太子少保、文渊阁大学士；予荫有差。

。

可法荫锦衣卫指挥僉事，余俱中书舍人。

辛酉，复召原任司礼监太监李承芳入内，还其原荫。

承芳，先帝时，以罪发南京。

壬戌，升刑部左侍郎贺世寿户部尚书兼都察院右僉都御史，总督仓场。

命陷北总兵祖大寿子泽溥随陈洪范北行。

泽溥至北，留不返。

复设东厂；礼科袁彭年疏谏，镌级调外。

彭年言：『高皇时，不闻有厂也。相传文皇十八年始立东厂，命内官一人主之。此不见正史，惟大学士万安言之；亦不闻特以缉事着。嗣是一盛于成化，然西厂汪直，踰年辄罢；东厂尚铭，有罪辄黜：当时已不得称纯治矣。再盛于正德，相继用事者则邱聚、谷大用、张锐等也；初皆倚逆瑾煽虐，构八党之凶，酿十六年之祸，天下遂骚然。三盛于天启之季，逆珰之祸，几危宗社。乞陛下镌前事之失，以杜奸萌；清铨枢用舍之衡，以绝贿源』。疏奏，责以狂悖，调外。吏科、河南道俱疏救，不听。

起原任蓟督丁魁楚，以兵部右侍郎兼都察院右佥都御史，提督楚、豫军务，巡抚承天、鄢阳等处。

魁楚，崇祯时以失机，戍。

升光禄寺丞张作楫本寺少卿。

作楫，先为兵科，以纠杨嗣昌、高起潜谪；浸升今职。后降北，为同知。

戍原任鄢阳巡抚王永祚。

以弃城。

命提问原任苏松巡抚王志举。

坐贪故也。时志举已仕北为京卿矣。

癸亥，补原任吏科熊汝霖吏科右给事中。

甲子，内传催外解钱粮。

旨言：『初，遣内臣往催，因辅臣弘图、科臣罗万象等疏止。今军兴旁午，外解无几；该部严催全完，限八月中』。盖为遣内臣地也。

革原任巡按山东御史余日新职，法司提问。

以闻变先窜故也。

署刑部贺世寿拟上从贼六等条例。着再确拟。

一、为贼领兵献策、谋危社稷者，即庶僚、不宜末减。一、督、抚、总兵降贼，情罪极重，不宜列二等。一、四、五品京堂及科、道、翰林受贼要职并降贼守巡等官，不宜止于绞。一、庶官受伪命——如科、道、翰林、吏、兵等部官，又封疆大吏巡方司道闻变倡逃者，不宜止于流。一、献女、献婢媚贼及受伪官者，不宜止拟徒：皆明旨所驳也。

督辅史可法疏请各镇兵饷，以图进取。命户部速发。

可法言：『近阅诸臣条奏，但知催兵，不为计饷；天下宁有不食之兵、不饷之马，可以进取者。目前但有饷银可应，臣即躬率橐鞬，为诸镇前驱』。

逆贼张献忠破成都，僭称王。

蜀王及抚、按各官俱失所在，总兵赵光远降贼。

升礼科沈胤培太常寺少卿。

乙丑，命吏部选堪任监司、府、州、县，随四川巡按米寿图行量人地题补。

命法司提从逆张嶙然、党从雅、薛所蕴等。

从尚宝少卿程正揆言。

升尚宝少卿徐一范鸿胪寺卿。

命优恤湖广殉难举人陈万策、李开先等。

万策为从逆御史喻上猷开荐闯伪官，将用之；万策自缢，开先触墙死。

吏部右侍郎黄道周疏陈时务。俞之。

道周言：『南都定鼎，则福建、江右皆为首藩。江右之有虔镇，南携肇、广，西揭汀、漳；有事则合三省之师，不十日出鄱阳外。福建之有浦城、建阳，东连温、处，北距玉、铅；水陆所凑，在于衢州。衢州之比虔镇虽为差弱，而建瓯之势，〔虔〕、衢相等；有事则合三省之师，亦不十日出钱唐外：诚以岭南之饷接济虔镇、以

岭东之饷接济福省，以两广之事权分匡赣州、衢州，则臂指形成，藩屏巩固矣。一曰〔先〕复燕京而后可都鍾陵。燕京虽当残破，然畿辅人心思明如旧；可多方劝率，刻日收复：此一务也。一曰先召勤王而后可言讨贼。今神京颠覆，宜召诸侯师咸集江上，多方激励，克诘张皇，誓期北伐：此二务也。一曰先讨闯贼而后可平群盗。凡群盗之起，皆假闯为声势。宜先大讨贼，以计潜弭群盗；则取盗兵、资贼粮，兵不患不多、饷不患不足：此三务也。一曰先理山左而后可复山右。山左、右皆古帝王都，德义所萃，决无舍四十叶天子、臣仆草■〈寇，女代支〉理。倘得张邈、孔伋之徒奋臂其间，晋阳、蒲坂必闻风相应。山右既复，真、保自还。藉此两翼，则不烦天子待边：此四务也。一曰先靖河淮而后可定江汉。东平、汶上暴客飞〔驰〕，有司莫禁；舳舻命脉，殆尽是矣。诚索常、镇之力以佐淮、扬，诛叛魁、散群从，遴选十五以佐西讨，如是则河、淮清，而江、汉可定。由是一意以理蕲、黄，〔使蕲黄〕淮扬常为江、汉两眼：此五务也。一曰先复承天而后可收全楚。承天，楚之郢都，王气所鍾；复郢而后，可以东定豫中、北取上蔡、西断入雍之道：此六务也。一曰先镇滁州而后可固江淮。滁阳，宇内奥区，贼所必趋；诚增池河兵、筑大柳城，于拥卫二都甚便：此七务也。一曰先定进取而后〔可〕议镇守。诚欲克复燕京，必先直趋关、陕；欲克复河、淮，必先直取徐、宿；欲克复荆、襄，必须探讨全蜀。进势一丈，收势五尺；尽取江、皖，沓杂瓜、仪：此八务也。一曰先树儒臣而后可用武将。儒臣致命，武臣不敢不死；儒臣立功，武臣不敢不奋。诚于风力之司，采其骨干胆识者以行三军，犹夙习耳：此九务也。行此九务，而一本于克己饬躬、省刑薄敛，先礼乐而后刑威、先仁义而后功利、先邦家而后四海，岂忧闯、献哉！疏奏，俞之。

工科右马嘉植疏言朝政。奏旨「回话」；已宥之。

嘉植言：『比者举动乖张，政事颠倒，进言指为矫激，论事指为迂疏；以献替为悖妄，以尽言为近名。臣不愿兴朝鱼水有此景象也，致令东南生气耗竭，骚然挺险，谁为皇上共守此一块土！』语皆切直。得旨：『回话』。适太后回銮故，免究。

丁卯，山东济宁州朱光、生员孙胤泰、乡民魏立芳等各疏请兵。

既而不行，命补道官而已——不能救也。

起补原任吏科庄鳌献、礼科阴润各原官。

鳌献与润，皆以建言谪。至是，起补；润后仕北。

辛未，升户科左宰朝荐礼科都给事中。

原任大学士程国祥子震初疏请恤。不允。

责以居政地时加派过多，为寇驱民也。

命淮抚严逮从逆各官光时亨等。

阁臣士英疏列时亨、钱位坤、项煜、周鍾、龚鼎孳、杨枝起等故也。

皇太后至南京。

先是，辅臣士英询知太后所在，密启请令内员及裨将王之纲迎之，令李际遇等护行。及至，各官迎江干；上跪迎洪武门内，各泣下。

浙东阳、诸暨复乱。

两邑向有许都之乱；虽诱歼厥渠，然余党尚伏。适朱大典募兵勤王，以饷少，抵杭而溃；剽掠至诸暨，许党乘之。有司仓皇申奏，旋剿定。

命逮从逆御史喻上猷等。

左都刘宗周所纠也。

升原任南祭酒文安之詹事府正詹事；补修撰刘同升编修，赵士春、陈之遴各原官；升庶吉士陈于鼎编修。

壬申，起升宁夏巡抚樊一衡兵部右侍郎兼都察院右佥都御史，总督川、陕等处恢剿军务。

起升编戎佥事越其杰都察院右佥都御史，巡抚河南。

以原任福府长史陶椿龄为尚宝寺卿。

赠故浙江参政杨师孔翰林院侍读学士。

改户部侍郎练国事为兵部添设左侍郎。

升太常卿朱之臣刑部右侍郎、通政使刘士桢工部右侍郎。

时原任宣大总督推户部右侍郎，闻已点；内召文选郎中王重至，云欲换本。既而，止及推晋。疏下，已点复挖，补痕宛然。阮大铖语人云：『我阻之也』。

命修西宫。

拟奉皇太后居之也。

癸酉，吏部尚书徐石麒陈铨政七款。俞之。

一〔曰〕定官制：『地狭，则员宜省；差减，则缺宜裁；事纷，则官宜备；时棘，则才宜储：此在内者当议。又督多，则官尊而费广；抚多，则力分而民诟；监多，则指繁而视乱：此在外者当议』。一曰慎破格：『风会既薄，全才已鲜，而好奖借者动求破格。不知新发之硃，光铄初露，骤试艰巨，则必锋销鐔折而不可用』。一曰行久任：『宜仿前朝待况锺、刘纲诸臣遗意，外职自方面以上过两考者、或由台省外转应还朝者，地方爱戴挽留，加以京衔久任；知推部曹非历俸五年不得调，大僚亦非历俸二、三年不得调：庶心志不分，治效自奏』。一曰慎名器：『自军兴以来，用人多端；廉耻轻，则防维决。累累从逆，皆此一念；胡可有此』！一曰严起废：『用人者当于起之之日，严辨废之之因，无为不肖然灰；使人知一念不谨，遂沈永劫，庶瞿然戒矢』。一曰明保举：『国初，外吏皆由五品以上京官保任，故能守身守官。自保任法坏，京官乃有庇外吏以市交者；贪滥成风，吏治益坏。宜使在京各官各举所知开送部臣——列其名次并举主姓名，开呈御览；庶乎集思广益，不负国家』。一曰消朋党：……乞皇上仿祖宗午朝故事，召见群臣于便殿；凡关系军国重务，与辅臣、部院面商可否，见之施为。虽欲各立门户，又何从得』。疏奏，俞之。

苏松巡抚祁彪佳疏留镇臣黄斌卿。命兵部会议。

总兵郑鸿逵欲调斌卿于上江，以下江自辖；彪佳深惜其才可用，故请留。

督辅史可法奏将北伐。命严申纪律；如四镇纵兵淫掠，一体纠察。

甲戌，命巡抚王燮、总兵邱磊进驻东昌，不得议驻河南。

遣户科都熊维典督催浙兵饷、金花、钱粮。

升浙江副使陈曷虞太仆寺少卿。

东平伯刘泽清等再疏劾左都刘宗周。

初，泽清疏下，闻诸镇独疏、公疏，不〔一〕而足。越数日，忽下杰与泽清疏。疏言：『宗周劝往凤阳，为谋不忠。夫凤阳无城郭朝市，止有高墙。皇上新承大统，乃欲安顿烽火凶危之地；此必非宗周一人逆谋，乃姜曰广、吴甡合谋也。乞将曰广

等三奸拏送法司，正其谋危君父大罪』。时督辅可法不平，诘三镇与刘泽清，皆云「不知」；遂据以入告。泽清俟可法疏下，乃言：『前具公疏，实与良佐等知会。辅臣不专虑疆事而分驳公疏，惟恐曰广等不得党胜』。又云：『臣与东林无旧隙，因江北新党数人苛求太过』。然后知公疏及甞，泽清意也。

命吏部考选废籍各官及举贡生监才品堪用、愿效力危疆者，咨发督辅以补地方缺员。

乙亥，内传起升张捷吏部左侍郎——从魏国公徐弘基等请也。

捷，先以荐吕纯如，为言路攻；未几，又以私书，被发配。至是，弘基等再据刘泽清疏催请，竟起之。

大理寺少卿郭维经疏郑芝龙功。命部复议。

丙子，下从逆项煜于狱。

革原任礼部郎中周鏊、工部尚书陈必谦职，命刑部提问。

朱统■〈金类〉纠辅臣曰广，并及二人也。疏下，有「乃心王室」之褒。吏科右熊汝霖、江督袁继咸皆疏雪曰广冤，士英不悦。

改兵部主事凌駟为山东巡按御史。

督辅可法荐之也。

工部尚书何应瑞言江浮大木，有助殿工。命择吉兴役。

丁丑，命修筑雒地陵园，祠官岁时致祭。

增安庆水兵五千人。

封邹存义为大兴伯，世袭。

存义，皇太后弟。国戚世封，世庙议革；部弗稽也。

命恤死节生员许琰。

琰闻先帝崩于贼，愤激；一溺、再缢，卒死。至是，以进士王曰俞言，命礼部核奏

。时金坛生员王明灏亦恸哭不食死，然无为言者。

命四镇得纠有司。

从广昌伯刘良佐请也。

戊寅，命原任蓟督王永吉戴罪总督山东军务，仍同陈洪范等料理酬北事宜——从阁臣弘图等请也。

未几，刑部拟戍请；诏以永吉身为督师，国破君亡，岂止一戍！姑戴重罪任事；不效，加等。

赠原任福府长史黄秉石詹事府少詹事，荫子。

己卯，命三法司将从逆诸臣会同府部九卿、科道限三日内议奏。

兴平伯高杰、东平伯刘泽清皆疏言从伪一案，乞皇上少宽文网，收归依心；不宜锻炼过刻。时以为二臣疏，皆从逆诸臣浼之也。

起升拾遗太仆少卿王濬右通政。

加掌锦衣卫事冯可宗都督同知。

补原任给事中马兆羲礼科、南御史成勇福建道。

转王一心、高倬各本部左侍郎。

赠原任巡按湖广御史刘熙祚太仆寺卿，谥「忠毅」；荫一子。

熙祚为张献忠所执，题诗于壁，愤骂；不屈死。

加户部郎中袁枢銜一级。

先是，铨部升枢山东佥事，户部题留；奉旨：『准留，不准加衔』。未几，复有此旨。

奉皇太后懿旨，命礼部同监臣韩赞周遴求淑女。

辛巳，改补李模、张煊、李长春、杨一儒为河南等道御史。

命催山东巡抚王爌、总兵邱磊赴任，兵部侍郎左懋第、都督陈洪范渡河。

授杜光祖等锦衣卫千户；寻加指挥僉事，子孙世袭千户。

授千户者，凡三人；皆上寓淮时居停主也。

升光禄寺少卿姚思孝大理寺右少卿。

壬午，命总督丁魁楚一意剿贼，并承德巡抚事于何腾蛟（？）

应安巡抚程世昌请移驻池州。允之。

改原任大学士王应熊为兵部尚书，仍以原官总督川、湖、云、贵，专办蜀寇；赐上方剑，便宜行事。

封郑芝龙南安伯。

癸未，升尚宝司丞钱元恂为本司少卿。

革原任楚抚王扬基任，听勘。命沅抚李干德戴罪，赴督辅王应熊军前理饷。

起升为民福建右布政申绍芳户部右侍郎兼都察院右僉都御史，督饷江北；原任左僉都王志道为户部右侍郎。升两广总督沈犹龙为兵部添设右侍郎，升应天府丞郭维经为都察院左僉都御史。

命文武不许荐举以开幸门，非言官不得上奏以摇朝政。

起升削籍给事中瞿式耜应天府府丞。

式耜坐会推钱谦益，处。

原任登抚陶朗先子学瞻上疏乞恩。不允。

朗先，曾以赃处。

乙酉，怀宁侯孙维藩子惟诚乞恤。不许。

维藩与故辅陈演等俱被闯杀。

追论先朝桃红坝功，加淮抚田仰兵部尚书，荫一子锦衣卫僉事世袭。

仰，家居十七年。至是，追论，冒予升荫；辅臣士英庇之也。

内传起升阮大铖兵部添设右侍郎——从安远侯柳祚昌言也。

阁臣士英因荐大铖，丛议；至是，忽因祚昌荐传升。

偏安排日事迹卷五

九月丙戌〔朔〕，赐原任总兵杜松谥「武壮」。

与刘綎同战死。

抚宁侯朱国弼请先上太子、二王谥，次及死难诸臣。命礼部议奏。

礼部以太子等薨问未确，姑缓之。

靖南侯黄得功趋扬州，兴平伯高杰以兵袭仪真；太仆少卿万元吉和解之，乃罢。

初，督辅可法虑杰跋扈，故置得功仪真，阴为牵掣势。适杰锐复开、归，请可法将家眷寄扬州；得功谓督辅驻节地，非诸镇宜居，发牌争止。次日，率快骑数百由扬城往高邮，迎其宗弟黄蜚；初不备杰也。杰副将胡茂桢驰报瓜洲，谓得功图杰；杰仓皇发兵，邀得功于扬。得功素勇，杰兵莫当其锋，乃挫退。时杰又同日出奇师，乘虚捣仪真；得功兵颇伤，遂两相分拏。元吉急趋调和，督暨监臣亦先后至，谕以大义；乃解。

改新升南瑞道副使王期升管职方司郎中事。

阁臣士英意也。

丁亥，督辅可法请进兵恢复。诏以北使方行，大兵继渡未便；命详酌行。

营奉先殿。

铸「弘光」钱。

授考选博士、行人、推知等官蒋鸣玉等为科道部属等官。

戊子，命议纂史官搜罗群籍——从阁臣弘图请也。

升大理寺丞詹兆恒本寺左少卿。

改环召御史詹尔选等外衙门用。

尔选于先帝时直言，几廷杖；阁救，削籍。至是，以孤冷无援，赐环中格。

命原任御史王应斗、毛九华候边抚缺，科熊德阳候卿寺缺用。

复原任蓟辽总督赵光抃、给事中章允儒、刘廷佐、邓英、傅朝右、黄绍杰、御史王绩灿、李右谏、李日辅、吏部主事吴羽文、王三重等官。

己丑，工科左利瓦伊樾疏陈民劳吏弊。命饬行。

维樾言：『民有七害，吏有三反。长吏贪残酷罚，讼师、劣衿构衅吞逼，衙役需索，市棍侵渔，势豪逼扼，游客抽丰：此七害也。赦蠲本朝之德，而下鲜实惠：是为恩反；乡勇本守土之资，而募练无法，不任保障：是为令反；事例本权宜之术，而奉行不善，只饱私囊：是为例反。今欲安民，必先察吏。监司者，守、令之表；抚、按者，监司之主也。请敕行各抚、按厘奸剔弊，留心地方』。

署刑部朱之臣再拟六等，请命绞罪以上提问、流罪以下抚按究拟。

计大逆凌迟处死五条、绞六条、流二条、徒二条。工科左利瓦伊樾言：『逆臣一案，经侍郎朱之臣拟议，严且尽矣。然「逆」之一字，未可概施。导贼掠地攻城是逆，则偷生非逆；受贼显爵是逆，则毁形非逆；受贼半职一官是逆，则受辱非逆。伏祈别是逆、非逆两案，毋使一念贪生，与十恶不原者同名获谴』。时是其言。

革苏松巡按御史周一敬、东阳知县姚孙棐职为民；仍命追一敬赃银万两、孙棐赃银六千两，解充公费。

皆明旨所定，不由部讯。

升福建提学副使郭之奇詹事府正詹事。

阁臣铎所拟也。

琉球入贡。

湖广巡抚何腾蛟疏陈天象。命申饬内外。

腾蛟疏言：『迩来紫微垣中，光芒若隐若见。占者云：「臣工不和」。且天市垣居临艮位乃金陵分野，座中帝星时隐时显，明而微弱；主天子危疑不安。愿皇上仰承天意，酌宽严之宜，令大小臣工和衷体国，幸甚』！

偏沅巡抚李干德奏获伪官。旨允献俘。

命张成福以都督僉事充山东河北总兵官。

庚寅，追削原任户部尚书李待问官。

以加派殃民也。

命故官子孙陈乞谥荫，通政司不许封进；果有德业、节义当表扬者，礼部察请。

命刑部究周铲恶款，又命锦衣卫及五城御史驱逐尚宝丞黄正宾等。

朱统■〈金类〉纠讎诸款，多诬捏；吏科都章正宸、河南道乔可聘言于左都刘宗周曰：『讎不纯』。宗周愕然问故；曰：『言有余而行不足』。宗周默然。

命省右布政一员。

旨云：『右布政空虚无事，从分火耗于左』；非王言体也。

东昌府乡绅张凤翔等擒斩伪官，复东昌等府、县。

时闯贼败于吴三桂，所在起义；东昌乡绅张凤翔及府、县绅并生民会监军职方凌駟、淮镇副将王国栋，凡擒伪府尹一人、伪州牧三人、伪县令九人、伪防御同知推官各一人。刘泽清以闻，皆命优叙。

辛卯，命撰起居注。

起升原任淮安僉事刘若金通政司参议。

壬辰，留用例推户科陆朗。

吏部尚书徐石麒疏朗通内被留，故外迁也。卒得留。

予公弘基、伯孔昭一子锦衣千户。

以迎圣母劳也。

癸巳，革湖广巡按黄澍职。

澍按楚，赃私狼籍，故纠阁臣士英以盖其贪。至是，竟批「革职」——士英意也。

升御史陈良弼、周元泰、朱国昌太仆寺少卿；予实俸，管差如故。

以定策功也。

大学士姜曰广乞休。允之；命行人护送，予驿，赐银、帀俱从优。

曰广入阁，铮铮有风裁；不幸为刘泽清、朱统■〈金类〉诬诋，遂以此去。

赠故祭酒陈仁锡詹事府正詹事，谥「文庄」。

命修先帝「实录」，并纂修「玉牒」。

阁臣弘图疏言：『先帝在祚十七年，溯厥盛美，指不胜屈。陛下悼往方深，采辑邸报、搜罗见闻，正可授管南董，以成「实录」』。允之。

甲午，左都御史刘宗周乞休。允之；命驰驿回籍，给登极恩典。

宗周临行，疏言五事：一曰修圣政，无以近娱忽远猷。一曰振王纲，无以主恩伤臣纪。一曰明国是，无以邪锋危正气。一曰端治术，无以刑名先教化。一曰固邦本，无以外衅酿内忧。

户科吴适请申明祖制，以议论归言官。报闻。

适言：『顷中兴求旧，一升姜曰广于揆席、一还刘宗周于宪署，与旧冢臣张慎言同被特简。曾日月几何，三臣忽先后去。揆厥所自，皆因含沙为祟耳。身非言责，遂一言掺大臣进退；则捷幡风炽，而正直气衰。臣恐廷臣中有如三人者，渐且恋盟猿鹤；即启事未列诸臣有如三人者，益复锢梦林泉。去者日多，来者日寡；谁与共图天下事！继自今，请申明祖制，以议论归言官，毋使谗说高张，荧惑听睹；则大臣益懋于职矣』。

例转御史黄耳鼎江西南瑞道僉事。

耳鼎奉差按秦，以闯炽不敢进；故例转。

命黄斌卿移驻九江、郑鸿〔逵〕移驻镇江、黄蜚移驻芜采。

命巡按御史凌嗣便宜联络北直、河南乡绅义士。

丙申，以王之纲为都督同知，充河南总兵。

丁酉，叙江北文武多年战功，加马士英少傅仍兼太子太师、进建极殿大学士，卢九德升一级，各予荫锦衣卫指挥僉事世袭；黄得功、刘良佐各加宫衔一级，荫一子入监。

加史可法仍兼太子太师，越其杰兵部侍郎，张国维加太子太保，荫子锦衣卫僉事。其余文武内臣，加升有差。

户科倪嘉庆请开屯田，限抚标。允行。

疏言：『敌、寇两强，边腹皆削。兵少不可制敌，饷少不足养兵；求兵、饷之俱足，无如连络诸镇以自强、力讲屯田以自贍可也』。

戊戌，谥原任礼部尚书董其昌「文敏」、左副都御史张玮「清惠」。

谥旧辅臣孙承宗「文忠」、太常寺少卿鹿善继「忠节」，赐祠额「忠烈」。

升行人司副姚孙渠尚宝司丞。

己亥，命户部等衙门会议省节，以国用匱拙故也。

工科都李清言：『先帝时，何尝不因敌寇急饷，然犹以天下供天下不足；今欲以一隅贍天下有余，此必不得之数也。盖疆宇虽缩，而沿江、沿淮之费无异九边；祈敕各部察现可征钱粮通行会算，以入定出，徐俟转输』。疏奏，命会议。

户科吴适疏陈「忧勤节爱」四款。俞之。

命行人洪维翰催督钱粮。

庚子，谥原任右都御史沈子木「恭靖」、工部尚书沈儆烺「襄敏」。

礼科都沈胤培疏请其祖与父也。

升右通政王濬为都察院右僉都御史，巡抚登莱、东江等处。

加原任淮督路振飞右副都御史。

补原任锦衣卫指挥使刘侨管西司、余之英管街道、徐同贞等各僉书。

准牟文绶以原官充总兵，镇守荆州。

命靖南侯黄得功移驻庐州以防桐、皖，与广昌伯刘良佐合营进恢黄、汝；兴平伯高杰移驻徐、泗，进恢开、归。

追补建文死节诸臣赠谥，立庙祭京师。

文臣以方孝儒为首、武臣以徐辉祖为首。

壬寅，改青浦县知县陈爌中书舍人。

爌，常遇帝于风尘；疏请内转，允之。

升吏科都章正宸大理寺左寺丞。

正宸屡疏忤时，故迁；优之，实远之也。

御史游有伦疏陈和衷。俞之。

言『今国家遭变，正同舟遇风时也。故必人人从君国起见，事事为朝廷究心合谋而算，大与小和，内外有一体之维，师济见一心之雅；于以雪耻除凶，断不可必矣』（?）。

准王允诚以后府右都督充岳州总兵官、吴学礼以原官充前锋、署总兵官马进忠驻镇荆州。

浙江总兵王之仁请清察卫军团练，以资战守。允之。

癸卯，命闽兵留镇京口——从苏松巡抚祁彪佳言也。

福建巡按御史陆清源奏闽、粤寇横。得旨「会剿」。

畿辅旱。

工科都李清请备荆、襄，以固金陵。命督、抚饬行。

命给河南巡按越其杰饷银十五万，为养兵屯田之本。

甲辰，追赠开国名臣李善长等十四人、正德谏臣蒋钦等十四人、天启惨死诸臣左光斗等九人各有差——从工科都李清言也。

谥已故大学士何如宠「文端」。

原任真定巡按刘宪章自疏请罪。命巡、按提问。

以京城陷，南还。

命左良玉子梦庚挂「平贼将军」印。

命江北监军少卿万元吉还太仆寺供职。

予北都死难诸臣赠谥，立庙祭京师。

文臣范景文等二十三人，武臣刘文炳等六人，内臣则王承恩、李凤翔二人。自有明二百余年，内臣无谥；有谥者，自承恩二人始。

命绅衿与齐民较田多寡，一体当差——从刑科蒋鸣玉言也。

命散左中允杨廷麟所募兵。

廷麟闻北都变，募兵勤王；以朱统■〈金类〉诬诋，罢之。

命都督杜弘域提督池、太地方。

丙午，定皇考恭皇帝陵曰「熙陵」。

升大理寺丞宗敦一右通政，起革职南吏部郎中张鼎延大理寺寺丞。

准张拱日袭封隆平侯。

加吏部郎中萧士玮太常寺少卿。

命豫督丁魁楚另用，楚抚何腾蛟并抚湖北。

丁未，命北来原任庶吉士史可程在寓候察议。

可程，督辅可法弟；南归后，子蔚青、弟可遵与妇父韩大忠六人皆被杀。

命诸抚杨鹗、范矿、越其杰等俱速赴任；粮饷，户部即给。

吏科右熊汝霖言：『皇上御宇四阅月，用过几何人、去过几何人？今日推一督、明日推一抚，只是讨兵、讨饷，迟迟吾行，去已无及；则何不就各处兵饷通盘打算，裒多益寡，然后崇节俭以裕军需、励忧勤而鼓朝气，则一切声色货利、笔舌戈矛总销归于卧薪尝胆之内矣』。

戊申，命督臣王永吉驰赴山东，同抚臣王燮、王澐料理战守事宜。

进抚宁侯朱国弼爵保国公。

加升杨振宗一级，荫一子世锦衣百户。

旨云：「功在定策」。

命兴平伯高杰赴徐州。

加怀远侯常延龄太子太保，荫一子入监。

削拟授吏部胡江职。

己酉，升礼科左张希夏吏科都给事中。

起降原任兵部侍郎张凤翔添注左侍郎。

凤翔先任工部尚书，坐累下狱；后起降。

命奉先殿立主致祭。

礼科都沈胤培言：『殿非太庙，上宜设位，以一后配一帝』。从之。

礼部主事张采疏陈四款。俞之。

采言：『皇上正位中兴，当事事扫更；独仍设厂卫，则廷臣交章，不允。臣以为徒增一行金使耳。且厂卫皆市井无赖，安能仰体宸衷！权之所在，则利随之。夫重权莫如用人，诚奖恬抑竞、端乃鉴衡，则天下从风，况乎辇毂』！余三款，多可采。

以旱，命修省。

庚戌，开事例佐工。

除旧纳中书等杂职外，有部院司务、乙榜准贡等，皆新例也。

辛亥，革浙江巡抚黄鸣俊、安抚御史左光先职；光先仍追赃提问。降巡按御史任天成级，调外。

先是，许都攻东阳，知县姚孙棐启门迎；鸣俊、天成欲纠之，光先以同里解释。及阁臣士英荐阮大铖，为光先疏侵，心恨。至是，坐以贿庇贪，革职提问；鸣俊、天成亦坐累。

革原任吏部侍郎吕大器职，擢太常寺少卿李沾都察院堂上官。

沾言大器怀挟异心，阻挠定策故也。

命南归河北、北直、山东、秦、晋各官绅，文臣赴吏部、武臣赴兵部酌用。

实授卢鼎总兵官，镇守武昌。

命礼部发单公议诸应谥者，无得滥徇。

差尚宝司丞李之椿往浙直催趲光禄寺钱粮。

命察原任左都刘宗周所劾台员。

除魏管、李植等外，又及傅景星、苏京向北——皆在差南归，为黄耳鼎代辨者。

命从逆诸臣不得蒙举。

先是，刘泽清疏荐从逆黄国琦、施凤仪等，已奉俞旨。至是，御史胡时亨疏纠国琦实受伪吏科，不可借题授职，羞朝廷而辱班序。上俞之。

命保举换授诸宗室回籍。

命副将以下皆骑马。

时营卫各官横行，金扇高舆，阗咽道途；职方王期升请禁之。

壬子，命刑部提问革职御史黄澍。

楚藩中尉朱盛浓承士英意，言其毁制辱宗、赃秽狼籍也。

起补葛寅亮太常寺卿。

准德清、归安等漕白蠲折。

原任詹事雷跃龙自疏请罪。命下法司究拟。

跃龙，以国变南归。

命追原任福建巡抚朱一冯赃银。

一冯富而吝，镇臣高杰劾之；至是，又以挟资渡江，命江南、北抚臣严追。

御史沈宸荃疏战守兵饷事宜。命部覆行。

言『今之大计，无过战守兵饷数者。猷踞西蜀，荆、襄之兵无能轻出；敌向东省，江、淮之兵未能即移。且器甲备乎？储糈裕乎？将有李、郭、宗、岳其人乎？则战未可遽言，且先言守耳。然至于兵以不任战者充数，何如募之、精之，当百、当十。各府、州、县近各练乡勇，可以固圉江、楚。运不北上，则运军有余；闻江北有北上班军，今亦不北上做工。宜练以实伍，所云「战不足，以守或胜」者也。若饷，难言之。现入六百余万，而淮、徐四镇及督师岁饷业至二百四十万；至于江、楚各镇督抚及京师营兵等岁饷，岂下淮、徐哉！此开屯养兵之政，今日宜酌举也。若皇上服御、工作可止或减，以为兵民两裕地者，惟祈以节俭倡之而已』。

癸丑，命曹州道袁枢、沂州道郭正中三日赴任；如违，拏究。

时北兵向山东，正中留京师，日具条陈；枢以任子升监司，复谋留部。东平伯刘泽清言：『北兵已至沂州，正中恋长安何为！若枢抽税浒墅关，奉先帝旨察奏；今公然回部、公然监司，又公然题留。孰云浒墅之钱不灵，封疆至贱；已卖北方，何当又卖南方』！疏奏，当国惮之，故勒限赴任。

礼科都沈胤培奏：恭皇帝专庙未成，宜奉位宫中中小殿，以皇妣孝诚太后配，二先后俱祔姑享。从之。

甲寅，命奉差户科左罗万象回奏；以疏止内臣催粮，致额解不前也。

后回奏到，罚俸一年。

命催豫抚越其杰、豫按陈潜夫到任。

荫孟津监生王镛、王无党世锦衣卫指挥。

皆辅臣铎子弟，以从驾渡河荫。

改总兵李成栋镇徐州、李世春镇泗州；加贺胤昌中军都督佥事充总兵，镇扬州。

下从逆梁兆阳于法司。

减故辅周延儒赃银三万两。

吏部尚书徐石麒乞休。允之；仍予驰驿，给覃恩例。

石麒以外转科臣陆朗为所纠，然时情日换，已欲另用一番人矣；遂乞休。初，石麒纠朗，侵及内臣；及予告，阁臣知内臣恨之，拟旨甚峻。上曰：『冢臣犹冢子也，当以优礼遣耳』。遂得温旨。后北兵抵嘉兴，石麒豫作遗笔，以郡完毁卜身存亡。城破，自缢；二仆祖敏、李成亦随缢。

命禁诸臣拜客、宴会，专理各衙门诸务。

吏部侍郎张捷署部事（原本，此条附在下卷十月标题行下，而不系以日。今按十月事迹，以乙卯起，正与本月甲寅尽朔相接；中间无所隔，要当是此两日间事——盖一面允徐去、一面命张署也。但下月既不系日，未便凭虚加载；故割附于此）。

偏安排日事迹卷六

十月乙卯〔朔〕，升尚宝司卿钱元憲太仆寺卿。

荫内臣李国辅弟、侄锦衣卫千户。

以郑芝龙为总兵官，镇守福建等处。

升罗■〈日兼〉芳前府都督僉事充总兵官，镇守贵州、铜仁等处。

丙辰，起补右通政梁云构添设兵部右侍郎。

后降北，复为右通政。

命河南抚按越其杰、陈潜夫星驰赴任。

升尚宝司丞李之椿为卿。

户部侍郎管钱法何楷疏陈鼓铸事。允行之。

『钱式，以一钱为准，作银一厘。广收铜，多鼓铸用。工精，以绝私铸。广收工匠，严禁渣末之搭，则钱自精。以交纳税粮，责成米户旧钱重八分以上者，准二文抵新钱一文；七分以下，碎为铜，交官照时给价。行使低小者，没其资本：则钱自行』。俱得俞旨。

戊午，保国公朱国弼请赐券增禄，仍世袭公爵。俱不允。

升太常寺少卿李沾都察院左都御史。

沾初意止在副院，吏部尚书徐石麒难之。至是，奉旨超升；虽云功在定策，亦缘纠吕大器疏也。

命曹州道袁枢赴豫抚越其杰军前酌用。

命吏部分别酌用蔡奕琛、杨维垣等——从礼部尚书钱谦益言也。

谦益言：『中兴令主，世当屯艰，皆侧身恐惧。晋元帝初镇江东，颇以酒废事；王导以为言，引酌覆，遂绝。有司奏太极殿施绛帐，帝命冬施青布、夏施青练。将拜贵人，有司请市雀钗；帝以烦费，不允：史称帝恭俭有余，雄武不足。然小心只畏

,再光晋祚。伏望取法□□□□□□□□□□□□□□□□□□□□□□
□□□□□□□□□□□□□□□□□□□□□□□□□□□□□□□□□□
□□□□□□□□□□□□□□□□□□□□□□□□□□□□□□□□□□
□□□□□□□□□□□□□□□□□□□□□□□□□□□□□□□□□□
□□□□□□□□□□□□□□□□□□□□□□□□□□□□□□□□□□
□□□□□□□□□□□□□□□□□□□□□□□□此所谓战胜庙堂者』。言专阉寄,则云:『臣
观三十年来,文臣出镇、克奏肤功者,孙承宗之后,马士英一人耳』。言资〔干〕
济,则云:『有英颖特达之臣,如蔡奕琛、冯元扬、祁逢吉、何〔谦〕等』。言雪
冤滞一段,则云『先帝钦定「逆案」,一时握笔诸臣未免轻心,故出故入。今既以
赞道无据用阮大铖,若虞廷陞,以京营建祠不画题削夺者;杨维垣,首纠崔呈秀者;
虞大复,以哭奠左光斗几致重谴者;吴孔嘉,以报父仇牵连;周昌晋无他罪,以
持论依傍定案者』。末又申前一段,则云:『奕琛曾以复社发端,抗疏攻臣。天下
多事,果有嫌隙,固当先国家之急而复私仇;况臣无仇于奕琛乎!亲见门户诸臣植
党营私,断送君父;何忍师其故智!且他日何面目见先帝于地下乎!「逆案」之故
入者,阮大铖。当周宗建攻逆阉时,实赞其议;安有引人攻奄,而身反赞道者!贾
继春家居时,顾大章被逮过新乡,继春饯送泣别。已法司定案一疏,解死者之拏僂
、全生者于囹圄;而反坐罪案,不亦冤乎!他如冯銓,以申救繆昌期、周宗建被逐
去相位,而不免于入。房壮丽,敌陷畿辅,投井死节;吕纯如与董应举及臣等以经
济相期许,应举每言其枉,声泪俱下,皆死而不得出。记崇禎初年,钦案初定,臣
待放国门,张慎言、房可壮过臣,相与叹息;慎言慨然曰:「吾三人他日当事,宜
共理此案」。弹指十六年,言犹在耳,岂附会于今日哉!谦益老于门户,乃以门
户攻门户,又以门户荐非门户;人皆哂之。

配原任登萊巡撫曾櫻。

櫻有清节，先帝时以失城逮狱。因闯逆入京，遁。寻自投法司，故配。

刑部请豁原任吏部郎中吴昌时贓。不允。

旨言其貪穢素着，故不得援恩詔概豁，止減五分之一而已。

兴平伯高杰请释逆犯武愔。不允。

懔以癸未进士，为闯逆徐州防御使；张示招诱，书「自」为「字」、「成」为「丞」，避逆讳也。

以武职冒滥，命各抚、按察送履历试录。

己未，宥原任兵部尚书张缙彦；以原官总督河北、山西、河南地方，便宜行事。

縉彥先令家眷入京，身处河南；疏言：『集义擒伪，收复多城』。朝议不得已用之，且月给其家米五石。工科左利瓦伊樾言：『縉彥闇忽失机，寸斩莫赎。当逆贼入宫，青衣候点；维时司官刘养贞哭骂縉彥，谓某日曾劝某处堤防、某日曾劝某处宜堵，縉彥褻如充耳。遭此烈祸，固已难施面目矣。及贼被北困，鼠窜狼奔，草间求活；意中岂复有朝廷哉！今贼臣未诛，反先登用；若法纪何！况贼踪乍退、北骑方张，岂有河北残疆为縉彥收复者。縉彥昔列中枢，大权在手，不克展一筹以固吾圉；若今风鹤逃散之余魂，即建熊罴当道之伟略，人之能否旦晚悬绝若此，有是理乎！燕、吴相去三千里而遥，黄河以北，邮问隔绝；縉彥之从贼、不从贼，谁剖明其心事！集义勇、复城池，果谁见之而谁闻之！夫国家所以厉世摩钝、诫往惩来者，名与器而已。敕书关防何物，而为贼臣颁给，则辱在朝廷；兵部总督何官，而令贼臣窜处，则玷在枢要；文武便宜何事，而委贼臣专行，则耻在官常；吏部札付何器，而假贼臣填名，则污在符檄。臣恐天下豪杰之士，闻之解体；更恐烈皇帝在天之灵，亦有恫乎不忍闻者！乞收回成命，无为所欺』。报闻。后北兵入南都，縉彥复降。

起补编戎御史张孙振四川道，掌河南道印。

孙振按晋，以干请不遂，纠学臣袁继咸；又与抚臣吴甡相攻，为甡纠，遣戍。至是，起补——署銓侍郎张捷意也。

准文选司郎中王重回籍，以原任南吏部郎中刘应宾代。

先是，礼部尚书顾锡畴署銓，开单坐缺挑送选司，重概不从；以手书与，亦不答。锡畴怒，纠之；咸谓曲在锡畴。吏科都章正宸疏留重，然犹密语人曰：「吾不敢必者，请耳」。至是，言于尚书徐石麒，谓重门多招摇；重遂请退。

大学士高弘图四疏乞休。允之；令行人护送于驿，赐银、帀。

弘图入阁，持论侃侃；如阻内遣及内传诸事，皆有大臣风。弘图去，士英始专政；时事日非矣。

庚申，黄河口决。命部议筑塞。

命原任大同知府蔡屏周以四品服俸添注职方司郎中，又复原任应天府通判徐树藩官——皆侍郎阮大铖所荐也。

大铖自受事以来，凡察处降补官员，贿足则用；常语礼科都沈胤培曰：『国家何患无财，即如抚、按纠荐一事，非贿免则贿求，半饱私橐耳。但令纳银若干于官，应纠者免纠，欲荐者予荐；推而广之，公帑充矣』。其谬妄如此。屏周援期升例；树

藩以助银二千建堡，故得之。

壬戌，谥原任礼部侍郎张邦纪「文憲」。

邦纪，辅臣弘图房师也。

荫掌锦衣卫事冯可宗一子世本卫指挥。

癸亥，赠大学士孔贞运少保，谥「文忠」，荫一子尚宝司丞，予祭葬。

初，署礼部管绍宁以「文恪」、「文恭」请，不允；有「既无显德亦无表」等语。至是，绍宁忽改「文忠」。贞运为相，醇谨无他长；前二谥为当。

命再讯系狱郎中周鏊。

鏊叔原任御史维持、弟原任知县铨疏言：『臣家门不幸，突出周鏊；因与锺有隙，私刊「燕中纪事」及「国变录」等书，自捏「劝进表」、「下江南策」，硬坐于锺，从淮上达南中，致臣家、臣邑不能洗此「从逆」之名。且鏊于皇上登极时，首倡异谋，另图推戴；是锺罪止一身，鏊罪在社稷』。疏奏，令并讯。

甲子，加湖广巡抚何腾蛟兵部右侍郎，巡抚全省。

升四川右参议王鼎镇尚宝寺少卿。

鼎镇，崇祯时，以御史例转。

命提从逆杨观光等——保国公朱国弼、诚意伯刘孔昭、礼部尚书钱谦益、吏部左侍郎张捷、兵部右侍郎阮大铖所纠也。

时「从逆」一案，已经屡讯，止欲攻门户中从逆者；虽里居之方允昌、系狱之梁兆阳，众矢交撦，亦不甚深求。□□是，又合攻观光等。而于原任庶吉士张家玉，则曰「荐刘宗周、黄道周于逆闯，令其收人望以集群党」；盖以此阻宗周、道周也。于史可程，则曰「系阁臣弟，友于素笃；公然从贼，宜下于理」；盖以此逐可法也。后家玉起兵广东与北师抗，遇害。

荫内臣冯进朝等子、侄一人世锦衣千户。

谓效劳军中，屡经大捷也。

命祔祭死难内臣王之心等，予荫有差。

国变后，王之心、张国元自缢，高时明自焚，方正化骂贼死；余皆被刑者。

工科都李清请迁孝康、兴献二帝于专庙，又请祀孝庙为不祧之主。命下部议。

疏言：『臣闻「礼」：祖有功而宗有德。若祖功，则高庙与成庙当之矣；若宗德，则舍孝庙何属！今观弘治十八年间，凡恤民瘼、抑近侍、宽谏臣，且与刘大夏、戴珊辈日结鱼水欢，君臣何异父子！亲远而祧，非并有德者祧之也。若我皇上即今世宗，而恭帝即今献帝；当时张孚敬、桂萼等俱力持考献，然皆云别立庙，谓「祀太庙则有祧期，而祀别庙则无迁期也」。今者专庙之建议，实本此。夫以世论，献皇浸通乎祧矣！何如俟太庙告成后奉迁专庙，与恭皇同祀；则使异日得长享血食以慰孝子慈孙心者，谅非世庙所欣然于在天也。且不独献皇可合祀，即孝康亦可合祀；何也？均一追尊耳』。疏下部议，竟寢。

凤阳地震。

丙寅，命内臣孙元德往浙、闽催内库及户工二部一应钱粮。

元德初以造桑皮纸至浙，婁甚；及得是差，恐喝军民。不及期年，所获不资。后北兵至，以橐付潘中军，置江东。江东将士籍之，金瓶高三尺许，满实大珠。将士十三往返，皆盈橐去；中军司房干没者不与。

起升工部主事邹之麟尚宝司丞。

之麟，夙以持议与声气左，故察处。

起复原任户科戴英原官，补兵科给事中。

英以旧辅薛国观门生，例转察处不谨。至是，因荐复原官——非建言赐环，始此。

加考功司郎中梁羽明太常寺少卿，依旧管事。

命内臣田成往杭州选择淑女。

京师两进淑女，皆不称太后意；乃令成出选。群稚女毕嫁，一方骚然矣。

丁卯，雪被纠御史魏管等。

从黄耳鼎言也。

免办兽炭。

工科都李清以国用大修言于阁，请此项宜裁；阁臣铎曰：『可裁否』？士英曰：『裁之易耳』。次日，批免。相臣之权足有为若此。计省价凡一千七百两。

戊辰，令楚镇左良玉兵以盐代饷——从阁臣马士英言也。

每百斤定价一两五钱；已良玉疏言不便：『于今者三军方切防剿，若鬻盐糊口，何时方完？盐既不可为粟，兵须转而为商』等语。疏奏，士英不悦。时良玉与士英已隐隐树兵矣。

加总督王永吉一品斗牛服色。

隆使臣体也。后以停行，辞免。

赠太仆寺少卿刘时俊兵部右侍郎，荫子。

以先朝剿水藿功。

以卜从善驻芜湖，领戎政提督营。

己巳，命议临淮侯李祖述及朱元臣、陆卿鸿罪——从兵科左王之晋言也。

时诸勋臣持议，每以文武不死难为诮。及之晋疏出，保国公朱国弼等始惭狼狈，补纠。元臣国勋卫、卿鸿锦衣卫指挥，皆以京师陷，同祖述南窜。命户部左侍郎何楷兼工部左侍郎，以便鼓铸。

予镇远侯顾肇迹等祭葬、赠荫有差，令立祠祭京师。

肇迹等十五人，惟成国公朱纯臣先被杀；余皆因闯为北兵败，乃与旧辅陈演等俱见杀。至是，礼臣迫于诸勋臣，概依殉国例请。旨下，工科都李清言：『肇迹等或禁、或拷，半膏贼手，非殉也。彼同时文臣中如大学士方岳贡、邱瑜等，何尝不以拷禁死；而褒讥相半，祠祭犹悬。既无生死之殊，亦无后先之别；何独有文武之异！无已，将疏内十五臣附祀旌忠祠，不必另建。以蓄民膏，至仁也；以节国用，至俭也；以偷生与就死者别，而又以慷慨赴义与颠沛陨身者别，至明也。一举而三善备矣』。部覆如议。

凤阳地再震。

庚午，御史陈潜夫请许定国开镇河南。命该抚酌议。

国子监监生蒋佑圣、吴蹈昌各进「历朝实录」。

加文选司郎中刘应宾太常寺少卿，照旧管事。

再赠故工部尚书沈傲烺太子太保、河南按察使葛锡蕃太常寺卿，荫一子入监。

以为藩、臬时缔造恭皇帝藩府劳也。

吏科都张希夏请严计处诸臣不得滥荐。从之。

旨末又云：『如有冤陷者，该部明列缘由奏请』。识者知幸门未塞也。

加王遵垣左府都督僉事，充登莱总兵官。

辛未，再赠杨师孔礼部右侍郎兼侍读学士。

一赠、再赠，皆以子文骢故。

革原任礼部郎中周仲璉职，法司提问——刑科梁应奇所纠也。

仲璉与故辅周延儒密书，呼「辅叔」；疏指为义父、干儿者，过也。

命史可程在寓候议。

从阁臣马士英代请也。

敕礼部严行各城精选淑女。

壬申，户科吴适请复日讲与朝制。命候旨行。

癸酉，命丁魁楚以原官提督两广。

魁楚负罪起岩疆，忽改善地；人以为钱神有灵。

予进士谢于宣祭，减半造葬，荫子。

于宣，太仆少卿三宾子；以闯逆刑死。

命兵部移会兴平伯高杰，谕李必忠弗留官硝。

时工部买到官硝，已经杰批放；其麾下李必忠留之。故令杰谕；则谕贤于旨矣。

兵部侍郎阮大铖陈水陆兼防事宜。命申饬行。

疏：『以湖口为贼自荆、楚东犯之西路，高宝焉（？）为□偏青徐、窥淮扬之东路，以和□为闯□开、归、汝、颖、寿、喻、淮趋定远、滁州之中路。西路之警，以黄斌卿为前茅，堵湖口；黄蜚为中权，趋荻港、皖口；郑鸿逵为后劲，驻芜、采；操臣则驻江口为援。东路之警，鸿逵堵瓜、仪，蜚趋龙潭，斌卿驻芜、采，操臣亦驻江口。中路之警，蜚统水师于江北针鱼嘴为前茅，鸿逵自京口趋大胜关、和尚港，斌卿自九江下芜湖为左右翼，操江则驻江口为中权。至上江要害，建德接壤九江、彭蠡，而陈家衞为冲；于此守之，则池、太安。祁门接壤饶州、浮梁，而三通岭为总路；于此守之，则征、宁安：宸京肩背可以无虞矣』。

升编修陈于鼎为左庶子左春坊左谕德，程正揆为右庶子掌右春坊，编修赵士春为左中允，简讨张居、司业李景廉为右中允。

于鼎后降北，复任编修。

赏杨承恩、德承惠各百户。

余门杨氏所请也；不知何功。

复宣庙吴贤妃尊号，上谥曰「孝翼温惠、淑慎慈仁、匡天锡圣皇太后」。谥建文故皇太子文奎曰「恭愍」。复皇弟允熲吴王，谥「悼」；允熿衡王，谥「愍」，允■〈火熙〉徐王，改谥「哀简」曰「哀」。诸公主驸马皆复旧号。追封皇少子文圭「原王」，谥「怀」。

初，方孝孺等既谥，礼部主事张采言于工科都李清曰：『若不念惠宗弟若子乎？封爵未复，谥号犹悬。如普于诸臣而靳于吾君之弟若子，犹缺典也』。清乃疏言：『皇上绍统，以惠庙与代庙并尊；且有加谥，又有追复：典礼明备矣。然就此两朝中，有明未尽明、备未尽备，尚在母子兄弟间者。一为景泰之废太后。察正统十四年，代庙即位，尊生母吴贤妃；今代庙称宗矣、汪后亦加尊谥矣，为帝之生母而既靳尊谥，且并削原号，可乎？则何以慰代庙正孝之心！以为明备，孰缺略于废太后之仍旧者！夫废而复之者，正也。一为建文之故太子。察建文元年，立子文奎为皇太子，嗣后革除事兴，所革者年号耳；原未革及帝号，则亦未革及皇太子号。今惠庙

称宗矣、马后补谥矣，为帝与后之元子而踵故号，不锡新谥，可乎？则何以慰惠庙正慈之心！以为明备，孰缺略于故皇太子之无谥者！夫无而补之者，正也。一为建文不以罪降之亲王与不以谴錮之皇次子。察建文元年，封弟允熾吴王、允炂衡王、允■〈火熙〉徐王。又察建文三年，载少子文圭生；未几，三王皆降封，且废允熾、允炂为庶人，改允■〈火熙〉为瓯宁王，又闭文圭于大内矣。今惠庙之号谥复，且孝康与孝康后亦复；为皇弟而或降郡王、或夷庶人，又为皇少子而不锡王封，可乎？则何以慰惠庙手足毛里之爱！或曰：「孝康有四女，其可考者为江都、宜都、南平三主，而其一无考；然皆贬称郡主，是可尽复否」？曰：「帝子与帝姬，一也；何亲、何疏之别」！以为明备，孰缺略于诸王、公主之或贬或罪者！夫贬而复之、罢而近封之者，正也。乞立赐下例：于皇太子文奎应加谥，则照悼、恭、哀、冲诸太子例；于允熾、允炂复号、亦复加谥，则照瓯宁王允炂谥「哀简」例；于皇少子文圭应加王爵且予谥，则照秦、晋诸王以下例。以此诏告海内，曰典礼明备，是真明备矣。然则建文时之吕太后与景泰时之怀献太子今贬为世子者，遂可不议乎？一则应殉而不殉，犹与少子居孝康陵；则有号、无谥可也。一则不应立而立，至欲黜宪皇以自私；则始立、终贬可也』。部复，从之。

命左春坊卫胤文以原官兼兵科，监高杰军西讨。

命诸臣不系从逆外，余皆斟酌未减——从督臣史可法言也。

可法言：『先帝以尧、舜之君，惨殉社稷。倘在北，始应从死；岂在南，独匪人臣！即如臣可法谬典南枢、臣同官士英叨任凤督，未闻悉东南之甲疾趋北援；即镇臣高杰、刘泽清以兵力不支，折而南下。是首应重论者，臣等罪也。乃以圣明继统，遂盖臣子重辜；不惟斧未加，且恩荣迭被。独于诸臣在北者，毛举而概绳之；岂散秩闲曹，其责反重于南枢、凤督哉！宜将从逆诸臣择罪状显著者数人，重处示儆；若伪命未污、身被刑拷者，皆当置弗问。又如管屯、管河诸臣避贼南来，不系受任封疆、掌握兵马者，皆当以宽典。即督、抚大吏，亦当权其所处时势，以为罪案重轻；其余隐避北方、徘徊后至者，皆准戴罪讨贼，赴臣军前，因才酌用。至于东兵助战，义重复仇；诸臣委曲相从，尤当原其心事。总之，应罪者罪，无为报怨之借题；应宽者宽，无令人心之解体。使天下晓然知君臣大义，不但在北者宜死，即在南者亦宜死；而圣明宥过，不但在南者姑宽，即在北者亦姑宽：必有全身忍垢之人，为雪耻除凶之计。宽以死而报以死，或亦精理所必至也』。疏奏，允之。

甲戌，内传升吏部侍郎张捷为吏部尚书。

阁臣士英意在戎政尚书张国维，侍郎阮大铖意在捷；以国维为言官时纠荐皆异调也。内传忽出，士英抚床惊愕；自此，意惮大铖矣。先是，捷疏言：『先帝末造，诸臣之心皆坏。浑同之域，自造藩篱；坦荡之途，横生荆棘。有用精神，不矢之奉公效职，而耗之结党行私；兼人才力，不用之任事端功，而并之护同摧异。积威所劫

，使人不知有朝廷；重赂所归，使人不知有法纪。文武迁除之格，任意把持；封疆功罪之衡，全凭颠倒。以科场为垄断，功令荡然；以文墨为纠连，应呼遍地。于是举贪官污吏之所猎渔、豪绅悍士之所诓逼、债帅骄兵之所淫掳，总而聚其毒于民。人心既去，国运随之，而祸且及先帝。今日救时急着，非尽反前此所为不可。阁部大僚，急须涤虑和衷，尽破方隅；举从前钦案实冤者，分别雪之，或录之、恤之；其不冤者确，宜概仍之。即目前从贼之案，污伪最著者，辟之；染逆无据者若干人，未减之。从此与诸臣约：腐烂葛藤，尽情放下；自强作用，真实讲求』。然后秉均、后所行，不践所言也。

保举宗室朱统■〈金类〉自请换京职；授行人。

统■〈金类〉自比刘向，疏己功不在定策下；又欲援先帝时朱露例，径授梧垣。见者哂之。

遣刑科梁应奇催两广钱粮。

乙亥，都督同知李诚矩请取「三朝要典」宣付史馆，以昭信史。报闻。

诚巨，孝定皇太后侄也。疏荐原任礼部尚书朱继祚、兵部右侍郎谢启光、右庶子余煌、编修吴孔嘉，乞加召环。言「要典」者，始此。煌，绍兴人；后北兵渡钱塘，煌自缢。

起升顺德副使张秉贞都察院右佥都御史，巡抚浙江等处。

初，文书房内员传令催张弘道，因毫不可入见；阁臣以秉贞名上，竟点用。上传，疑假托也。秉贞后降北，为礼部郎中。

丙子，内传改授职方司主事彭遇瓢为御史，巡按浙江。

除授不自铨部、题差不必总宪，阁臣士英所为；欲布心腹以箝潞王也。或曰遇瓢通内，径取上传耳。遇瓢既得旨，凡浙绅谒贺，银、币悉纳；足迹未离都门，筐篋灿然矣。

诛王裔。

王裔，借名王重儒，伪为定王。至境，守陵内臣谷应珍诘知为伪，以闻。戮之。

安远侯柳祚昌疏讦词臣徐汧等。不允。

祚昌疏言：『皇上中兴应运，奸臣阴怀两端。问谁朝衣冠谒见他藩于京口驿前而俨然推戴者，词臣徐汧也。汧自恃东林渠魁，复社护法。狼狈相顾，则有复社之凶张采、章允诚、至贪至横之举人杨廷枢；鹰犬先驱，则有极险极□之监生顾杲。皇上定鼎金陵，而彼且安然为「讨金陵檄」；所云「中原逐鹿、南国指马，祈哀□□、分地盗贼」，是何等语！乞大奋干断，立逮徐汧，革去举人杨廷枢、恶生顾杲，先行提问；其余徒党，容臣次第指参，恭请斧钺』！疏奏，命已之。

御史沈宸荃疏荐礼部尚书黄道周、词臣刘同升、葛世振、徐汧、吴伟业等。着马上差催。

命五城御史及锦衣卫缉逐罪废诸臣潜京钻营者——从户科吴适言也。

时罪废诸臣投刺白日，亦终无缉者。

命于弘光元年上辛行合祀礼。

先是，礼臣顾锡畴以合祀请，已奉旨。至是，侍郎管绍宁署篆，又题分祀；票拟者愆不忆也。太常少卿沈胤培言：『圣祖合祀之礼，宜遵者四。汉儒董仲舒曰：「郊尝以正月上辛日，所以先百神而最居前」。皇上改元肇事，礼行于郊，而百神受职；以泰坛昭事之精诚，耸万国尊亲之志气：宜遵者一。周朔建子，冬至圜丘，适当献岁，不妨迎阳报天。我朝循夏正，不无地先天祭之嫌。今用岁首开泰之辰，行大报天地之礼，孔顺孔时：宜遵者二。世宗遗诏，原有「郊祀等礼，各稽祖宗旧典斟酌改正」之文。故穆庙时，辅臣献议曰：「岁一举合祀，奉二祖以并配，遵太祖更定之制、体世宗未安之情。盖分祀者，一时改创；而合祀者，我朝通行：宜遵者三。南都自合祀后，北郊遂废。今俗所称地坛，非地坛也；更建方泽功难成，而溷举分祀于合祀之所，非所以为礼：宜遵者四。天坛近拱宸居，遥通陵脉；臣知圣祖在天之灵，必有凭依不舍者。仰祈需发德音，仍遵合祀』。疏奏，覆从之。

命户部发罪赎款单于省直——从阁臣士英请也。

凡问拟抵赎、赃罚，不拘批行、自理，俱实填入单，进贮官库，每季汇解。如无钦单，擅用私单征收，不许输纳；仍许该抚、按察参及地方人执持私单赴阙申奏，犯官罪死。

丁丑，起升原任太仆少卿杨维垣通政使司通政使。

维垣编戍淮安，至是起。

召管海运户部郎中沈廷扬料理江防。

命总督王永吉暂驻河上料理战事，俟陈洪范等归。

……

……湖上逍遥，谁复为陛下任驰驱者。若已故枢臣冯元扬，身膺□简，特晋中枢；徒事贪庸，寸筹莫展。时见部疏徇其陈请，议予祭葬：是使误国之臣，死生皆可得志。何怪启睿之徼幸也！乞将丁启睿立正典刑，以为人臣负国者戒；仍敕部自后恤典，勿得滥徇』。

命内臣孙呈绣仍为总监，同登莱巡抚王濬星驰赴任——从东平伯刘泽清言也。

呈绣以分监南甯，阁臣弘图等欲罪之；呈绣惧，浼刘泽清疏荐，请用为登莱总监。阁争，不听。然濬卒不行，呈绣寻召回——其狡计也。

调曹友义管黄河水师、金声桓豫楚援剿，各总兵官。

免行刑。

予秦、楚殉难诸臣祭葬有差，仍准自行建祠。

楚府长史徐学颜、长沙推官蔡道宪、知嘉鱼县黄良鉴、锤祥萧汉、蒲圻曾拭、均州胡承熙、衡阳张鹏翼、兴都留守徐寿崇、武昌通判李毓英、经历任文熙，皆死楚者；秦府长史章尚綱、商雒监军副使乔迁高，皆死秦者。

予原任保定巡抚兵部右侍郎徐标等祭葬、赠谥有差。

标与郎中徐有声、给事顾鉉、彭管、御史俞志虞、副使米廷焕，俱祭葬、赠荫；皆死国者也。四川死事，有知泸州苏琼妻舒氏、吏目赵阶升；河南死事，有乡绅简讨马刚中、南阳知府邱懋素、左镇监军主事余爵、山西粮道蔺刚中；途中死〔事〕，有主事刘大年、前南科张焜芳、河间兵备赵珽：俱赠祭葬。又有主事成德父文桂、德妾萧氏、童氏、妹季白，文桂赠如子官，妇女附祀旌表。

定江北督、抚、四镇额兵三万，楚抚额兵一万，京营额兵一万五千；余停减有差。

户科吴适言：『当今敌、寇叵测，中外并吁。自东、豫、江、淮以及荆、楚、黔、蜀，处处用兵，人人需饷；而饷何在？前此有加派可言，今无可加矣；前此有内帑可请，今无可请矣；前此犹以全盛之幅■〈巾员〉供一隅之输挽，今独以一偏之正供给四应之经费矣。点金无术，雨粟何期！臣以为今日兵非不足，患选练无方与营伍不实耳。请陛下速敕各督、镇、抚就见在兵丁实加抽练，而尤信赏罚、同甘苦，

乃能臂指相使、缓急相应。夫尽人能战、是处可守，何用彼屠！沽市儿挂名军伍，以虚名耗实饷乎，非减兵也！减去其挂籍无用之徒、厘去其虚伍冒粮之弊，则兵不必增而自足矣』。部覆，从之。

癸未，起刘光斗补广东道御史。

原以大察不谨，处。

起升原任吏科都刘安行、通政司参议刘若金俱为都察院右佥都御史。

安行提督南直浙江开垦沿海屯田、市舶、鱼盐等税兼理海防军务，若金提督闽广沿海开垦屯田、市舶、桥税、珠池兼理海防军务。未几，复差二内监，其职同；且设数监司，各举所知充之（按前书例，当自「未几」以下为目；原本亦于「未几」平抬另起。今从旧丹笔，于「御史」画断，故下皆为目；实非通例也）。

命凡城破自死及病死、仇杀，不得借名求恤。

甲申，淮南赣巡抚林一桂回籍。

升光禄寺少卿张作楫翰林院提督四夷馆太常寺少卿。

御史张〔孙〕振疏论吴甡、郑三俊、祁彪佳。不听。

偏安排日事迹卷七

十一月乙酉〔朔〕，赠原任户部侍郎庄祖海尚书，荫一子。

命改折各衙门上供钱粮，以实内帑。

免议益王。

原任杭州推官黄端伯疏其不法故也；端伯亦免究——和事而已。

命御史差委暂行掣签法，事平仍旧。

时御史争营美差，左都李沾苦于情面，以掣签请——非体也。

丙戌，荫已故兵部侍郎董光弘一子。

起升原任刑部右侍郎蔡奕琛吏部左侍郎。

奕琛先坐关说，拟戍；有旨：『禁锢终身，永不叙用』。至是，特起少宰。会推之日，户科吴适言于朝曰：『今日乃冢臣独推耳。言官仅备画题，不敢参驳；何名会推耶』？同官感其言，皆托故不赴；科臣到者，惟户科署印陆朗一人。行海屯。

.....

宥原任文华殿中书顾大成。

时纠其从逆饷银九千，免。

予故词臣沈懋学谥「文节」、焦竑谥「文端」。

两人皆鼎元。懋学以阻江陵夺情，归；竑以科场诖误，谪：皆沦落，不竟其用。

丁亥，东平伯焦梦熊疏荐原任浙抚熊奋渭。着遇缺推用。

命陈麟署总兵官，管理江督标下水师。

戊子，升凤阳副使张如蕙太仆寺少卿。

以与阁臣士英共事也。

准邓文尧袭封定远侯。

赠少詹闵中俨礼部右侍郎，不准荫。

桂王薨。

京师旱，命礼部钱谦益等祈雨于天地坛。

以西花园殿为慈禧殿。

命黄澍回籍候勘。

先，澍疏请楚饷，有「恐各兵索饷南下，震惊人民」等语；已挟左良玉自重矣。至是，因纠马士英见怨，故提问。良玉阴唆部将群哗，欲下南京索欠饷，保救澍。江督袁继咸为截留江漕十万石、广饷十三万给之；且疏代澍申理。以镇臣怜其任劳，士英不得已，批「免逮」，乃已。澍留良玉军中，竟不归。说者谓士英之修隙、澍之抗提，皆非也。时继咸既以累疏与当路隙，所条陈及题用道、府等官，俱置不覆。郑鸿逵五千人既留京口，继咸以陈麟加镇銜，代鸿逵料理水师；邓林奇加镇銜，料理陆师：俱寝阁。阮大铖索六千金，始给一署镇札；必再索六千金，始肯给敕印也。此外，白丁用重赂躐大帅者甚众；京师有「职方贱如狗，都督满街走」之谣——诸将士卒解体也。

己丑，凤阳内臣奏皇陵灾，松柏根皆烬。

时凤阳里氓遥见陵中二人——一衣朱、一衣青，毆击甚苦。寻闻号泣，不辍。乃率数十人持杖入，惟二犬踉跄走；识者以为不祥。

升原任河南副使张弘道太仆寺少卿。

庚寅，令淮上辅镇、楚豫督抚严备河北。

防北兵过河也。

命温、台玉环等山三年起科。

授曾国栋、牛宽、王文学锦衣卫千户，世袭百户。

以护从微劳得之。

予死事彭文炳祭葬、赠荫，建坊曰「一门忠烈」。

彭遇颺请之也。已礼部题荫，以太滥不允。

壬辰，予死难内臣李凤翰、王承恩各世锦衣卫指挥僉事。

敕慰德、晋、卫各藩。

癸巳，宁南侯左良玉奏华容、石首战捷。

起升广东右布政王骥太仆寺卿。

甲午，谥吉王曰「贞」。

升杨御蕃一级，荫子锦衣百户。

追叙崇祯时擒李青山功——实诱其来降，执而俘献也。

乙未，令辽王寓台州宁海。

端门外火。

其地即社坛，门东与太庙门对。

丙申，予蓟督吴阿衡谥「忠毅」、祭葬荫，建祠——从同乡阁臣铎请也。

阿衡因墙子岭失事，致北直、山东失陷七十余处而死，置勿论可也；谥、荫过矣。

定中宫礼冠价三万、常冠价一万。

时内臣需价三十万，责于户、工部及应天府催请甚急。工部合户部言：『今何时耶？金瓯半缺，民力已枯。今天下兵马钱粮通盘打算，缺额至二百二十五万有奇。户部现存库银，止一千有零。乞敕监臣加意节省』。疏奏，乃定减。

大学士史可法请颁讨贼诏书，兼痛陈时事。俞之。

疏言：『痛自三月以来，陵庙荒芜，山河鼎沸；大仇在目，一矢未加。昔晋之东也，其君臣日图中原，而仅保江左；宋之季也，其君臣尽力楚、蜀，而仅固临安。盖偏安者，恢复之退步；未有志在偏安，而遽能自立者也！大变之初，黔黎洒泣，绅

士悲歌；痛愤相兼，犹有朝气。今兵骄饷绌，文恬武嬉；顿成暮气矣。屡得北来塘报，皆言北必南窥。水则广调唬船，陆则分布精锐；尽河以北，悉树降幡。而我河上之防，百不料理；人心不一，威令不行。复仇之师，不闻及于关、陕；讨贼之约，不闻达于北庭。一似君父之仇，置诸膜外。近见北示，公然以「逆」之一字加南；辱我使臣，蹂我近境：是和议固断难成也。一旦寇为北并，必以全力南侵；即使寇势尚张、足以相拒，北必转与寇合，先犯东南。宗社安危，决于此日。我即卑宫菲食、尝胆卧薪，聚才智精神而枕戈待旦、合方州物力而破釜沈舟，尚恐无救。以臣观庙堂之作用、百执事之经营，殊有未尽然者。夫将所以能克敌者，气也；君所以能驭将者，志也。庙堂之志不奋，则行间之气不鼓。夏少康不忘逃出自竄之事，汉光武不忘蓼莪爨薪之时；臣愿陛下为少康、光武，不愿左右执御之臣轻以唐肃、宋高之说进也。忆前北变初传，人心骇异；臣等恭迎圣驾临莅南都，亿万之人欢声动地。皇上初见臣等，言及先帝，则泪下沾襟；次谒孝陵，赞及高皇帝、高皇后，则泪痕满袖。皇天后土，实式盐临。曾几何时，可忘前事？先帝以圣明罹惨祸，此千古未有之变也。先帝崩于贼，恭皇帝亦崩于贼：此千古未有之仇也。先帝待臣以礼、驭将以恩，一旦变出非常，在北诸臣死节者寥寥，在南诸臣讨贼者寥寥：此千古未有之耻也。庶民之家父兄被杀，尚思剖胸断脰，得而甘心；况在朝廷，顾可漠置！以臣仰窥圣德、俯察人情，似有初而鲜终；臣恐恢复无期，而偏安未可保也。今宜速发讨贼之诏；严责臣与四镇，使悉简精锐，直指秦关。悬上爵以待有功，假便宜而责成效。丝纶之布，痛切淋漓；庶使海内忠臣义士，闻而感愤也。国家遭此大变，皇上嗣承大统，原与前代不同；诸臣但有罪当诛，实无功足录。臣于登极诏稿，将「加恩」一款特为删除；不意颁发时，仍复开载！闻北方见此，亦颇笑之。今恩外加恩，纷纷未已；武臣腰玉，直等寻常。名器滥觞，于斯为极！以后尤宜慎重，端待真正战功；庶使行间之猛将劲兵，有所激励也。至兵行讨贼，最苦无粮。搜括既不可行，劝输又不能继；裕饷之道，何术而可？竖子牧夫，荷戈无力；黄颜黧骨，负甲不胜：是谓弱兵。弱兵，宜汰也。彩服锦衣，翩■〈羽迁〉马上；姣童美女，酣乐营中：是谓奢兵。奢兵，宜戢也。市人游棍，闻报惊心；溃卒逃军，闻金色变：是谓怯兵。怯兵，宜去也。纸上貔貅，按籍则有；阵中桓赳，核数则无：是谓虚兵。虚兵，宜清也。乞严敕督、抚、镇臣一一申饬，或开屯粮足食，或散老弱归农；毋以数百万之饷，为不战、不守之兵坐耗而虚糜之也』。

丁酉，准苏松巡抚祁彪佳回籍。

彪佳抚吴，甚得民心。连为朱统■〈金类〉、张孙振所诋，遂移疾去。及绍兴失守，自经死。

命督、抚究山东总兵邱磊。

磊镇齐，不行；屡旨催促，乃携累渡河。又携被逮原任保定总督侯恂同往，督□海北发（？），然后自以百骑回安东索饷。抚臣田仰时因磊手札有怒愤语，密致督抚

可法，言其不轨状。至是，诱入抚院署，擒下狱。事闻，命可法究奏。毙狱中。

戊戌，加总兵郑鸿逵宫衔，荫子世锦衣卫百户。

己亥，赠原任大理寺卿陆世科右都御史，荫一子。

起朱继祚原官礼部尚书，协理詹事府。

察处御史罗万爵疏纠周鏊。着法司究明。

鏊榷芜关，有烦言；万爵芜湖人，言之甚详。然以纠鏊故，遍诋东林；至谓已与阮大铖、张孙振等有拥戴功——人皆哂之。

庚子，起原任南京吏科给事中屈勋原官。

部题原任工部主事徐葆初改授科员。不允。

葆初，为人朴拙；初以修陵功，奉旨允改授。及题补科，又以都属改授只开幸门，报罢——人谓不谒阁臣故也。

升工科右李永茂都察院右佥都御史，巡抚南、赣、汀、潮等处。

时永茂忿忿谓先巡京营，与诸弁争庭谒礼，故阱使北；然因阱得擢，殆非也——皆谓阁臣铎以同乡私之。

准孙惟城袭封怀宁侯。

辛丑，加户部郎中沈廷扬光禄寺少卿，仍理饷务。

廷扬后在海中起义（原本旁注「丁亥四月事」）被擒，不屈；同事三百余人骈斩于苏，无一降者——人比之田横云。

升大理左寺副王文企太仆寺丞。

文企，旧科臣；崇祯时，以言谪。

加监军道宋劼、兵部郎中李犹龙俱太仆寺少卿。

加刑部尚书解学龙一级，荫子世锦衣千户。

追叙崇禎時江右捷功也。

壬寅，未任光祿寺卿許譽卿乞終養。允之。

譽卿見時情不合，故乞身去。部覆：『仍照新銜給與誥命』——亦異數云。

謚原任兵部尚書呂繼祺「忠節」，給祭葬。

維祺里居，死流賊難。

原任禮部主事周之珣進「玉牒」。

予故刑部尚書沈演祭葬，贈太子太保，蔭子。

准錦衣衛百戶張翥之入錦衣借職。

其後，以僉事掌南鎮撫司；張鳳翔子也。

甲辰，加考功郎中梁羽明太常寺少卿。

後與父云構俱仕北，為吏部主事。

升詹事府正詹曹勛禮部右侍郎，仍管翰林院事；沈延加左春坊左諭德兼侍講、劉同升右中允兼修撰、陳之遴左中允兼編修，同劉正宗管理誥敕。

贈原任山東巡按宋學朱大理寺卿，蔭子。

濟南之陷，學朱死無確據，故恤典至此始得。時同死提學翁鴻業，子疏請，又見駁。

乙巳，令永禁換授改升；有敢復行者，許科、道糾參削職，遣邊外永遠充軍。

明旨自撰一律，閣臣鐸之票非也；且罪何至永戍！

丁未，命張鳳翔以兵部尚書兼都察院右副都御史，總督浙直水陸軍務、巡撫蘇松等處地方。

鳳翔後降北，仍為侍郎。

升浙江参议卢若腾都察院右佥都御史，督理江北屯田、巡抚凤阳等处地方。

加副使耿廷篆太仆寺少卿，监参将沙定洲兵由建昌入川剿贼，受督辅王应熊调度。

北兵陷宿迁——寻以复闻。

兵至则逃，去则称复：积弊如此。

予郑彩荫一子锦衣卫百户。

授黄魁世锦衣卫指挥僉事，黄政、黄芳各千户。

一辈以护卫微勉。

授李胤兰锦衣卫百户。

河南承差，以微劳官。

命内臣高起潜提督江北兵马粮饷、沿江水师。

起潜先泛海至淮，令入京陛见；至是，乃用。

罢职方监军。

以多幸滥故也。

己酉，令九江总兵黄斌卿驻皖、池，兵用皖饷。

斌卿镇九江，侦知左良玉难制，不肯久驻；遂改。

庚戌，命都督许定国镇守开封、河、雒。

命提问巡抚何谦、丘祖德、曾化龙及总河黄希宪。

御史沈宸荃言：『今东、豫两省为提约经理者，王永吉、张缙彦。永吉先失机负罪，先帝拔之为督，宜何如效死为报！乃拥兵近甸，不能勤王救败，惟知一逃；置之极典犹轻。缙彦先考选部属，先帝时为中枢，亦宜如何效死为报！乃身居帷幄，不能固城卫主，腴颜苟活；加之寸砾非枉。幸蒙皇上轸念封疆，宽恩使过；则二人者，皇上白骨重肉之人，可不效曹刿、孟明收功三败哉！奈何永吉观望逗遛，徘徊淮

、海间；未闻荷戈，先请诰命。旧劳乎，昔日之罪无可追；新衔乎，今日之功无可录。且何急于荣父母而缓于勤君上！缙彦不闻一矢加遗，狼狈鼠窜，闻于东按南来；纠连义勇，收拾河北之谓何！岂一复衣冠，贪生负国之心复出，死何以对先帝、生何以谢皇上与臣民也。不图一奋，貽谬万年矣。若蓟与昌平，皆三辅也；永吉罪在难逃，何谦更多一失地陷诸陵之罪。至京城陷失、先帝遐升，凡在守土皆宜厉秣兵马，俟新君之复仇；乃贼尘未扬，先去为望：则东抚丘祖德、河臣黄希宪何以自解？皆不得令之山头望廷尉也』。疏奏，与不列名之登抚曾化龙一并提问。兴平伯高杰请籍原任大学士周延儒、凤督朱大典、翰林吴孔嘉家充饷。不允。

大典、孔嘉皆饶于财，而孔嘉又以合时局议起。高杰武人，诸疏皆听线索于幕客；非其志也。

大学士马士英请征酒税助饷。令户部议行。

总兵杜弘域所陈也。官给票，每斤纳钱一文；惟土酒半文。坛大小，各照例派纳。纳课后，名糟坊一一为官店，免杂差。违者，依私盐律究罪。

辛亥，起补原任御史曾倬山东道。

倬，崇祯时逮削。

起原任山东巡抚王国宾光禄寺卿。

复原任刑科吴希哲原官，补工科给事中。

希哲，先以察处。

城金山圖山。

京口监军主事杨文骢请之。

命速结「从逆」诸臣案，以四议参六等。

工科都李清言：『今者「从逆」一案，仿唐六等定罪矣。然今法与唐法异；何也？彼议于东都既复后，此议于北畿未平时也。或从闯、或从奴，能令如达奚珣、陈希烈辈皆跣足搏颊缚大理对簿否？然则如之何？曰：「无假之笔耳」。夫孔子之悬笔「春秋」也，岂能尽一时乱贼，皆伏两观诛哉！止缘书「弑」、书「叛」，不贷于素王三寸管；而迄今肉已久寒、骨犹新痛，则此笔之风霜亦烈矣。故臣愿今日司三尺法者，吾头可断、吾腕不可移，坚持此笔而已。若现在系狱诸臣，惟有法司议耳』。

。夫一时伏，血有时枯；而千年点臭，毫无时死。明有天日，幽有鬼神。故臣又愿今日司三尺法者，无骖此笔，亦无轻此笔；上者辟、中者戍、下者配与杖，一以明允为功。尔然，则从闯、从逆诸臣遂有死法，无生路矣。一曰歼闯。若欲歼闯，当为晋顾荣。其陷身，陈敏惟日以函首送雒，题「逆贼顾荣之首」为恨。于是与甘卓合计诛敏，而荣卒归晋：如是者，无罪。一曰误闯。若欲误闯，当为晋朱序。其陷身苻坚也，从阵后大呼曰：「秦兵败矣」！于是谢玄乘其挠乱，以八千破百万众，而序卒归晋：如是者，无罪。至从北诸臣，又有别矣。夫闯仇而北功，若身羁异域、心眷天朝，则弭兵息民，亦所以报也。一为宋王继忠是，故刺死也，因兵败臣辽；然卒以通好，被任。一为宋祁宰是，先以医术补官者也，因汴陷，官于金；然卒以谏南侵，被杀。夫如是，死恤、生宥矣。此臣又于六等外列为四议，以为从闯、从奴者后一始失身而终报国路也』。疏奏，命如议速结。

壬子，命苏松督抚张凤翔会同监臣孙元德清查东南钱粮。

时监生陆佐霖言东南正供钱粮，多为吏胥侵蚀故也。人以为奉元德意。

兴平伯高杰疏荐吴甡、郑三俊、金光辰、姜采、熊开元、金声、沈正宗等。报闻。

监军侍讲兼兵科卫胤文因杰荐言：『甡，按豫、赈秦，都留去思。及其抚晋，剿贼着功；防河无漏，晋人尤德之。有能、有为、有守，此所长也。独一生大病，在认东林太真；高予己以君子，轻绝人以小人。附己者，虽盗跖，亦指为伯夷；不附己者，虽伯夷，亦指为盗跖。当壬午、癸未时，流贼盘踞荆、襄，甡奉督师命，逗留三月；平生气概，一朝都冷。先帝若诛以抗违，诚不为枉；薄与一戍，此至仁也。既幸邀先帝之仁，则此时更不须追论甡罪。扶危济难，今曷可无甡！惟愿甡自今后，遇事则从国家起见，遇人则从人品起见；更勿以「声气」二字排陷把持，则不负先帝之恩矣。三俊，清心若水，劲节如山。但入骨之病，亦认东林太真。加之秉性执拗，偏听成癖。人曰某是东林，则信为腹心；某非东林，则嫉如仇寇。至贪奸万状之吴昌时，亦因「声气」二字破格拔擢；识盐谓何！若起掌闲曹，用标清范；三俊，其可少哉！光辰，经济逊甡，孤高亦让三俊；而把持门户，颇与相同。当周延儒再起时，光辰与甡拥附，一手握定，使为己用，而后渐激水火：比所短也。然才非庸伍，守又廉持；去其褊心，便成佳品。采，于昌时起升仪郎，日疏催赴京，誉为贤圣；此畏门户而不敢不入，遂至冒昧耳。若令仪真十年，清标惠政，仪人感之。其为给谏，方号敢言；锢诸林壑，岂曰怜才！臣尝叹国家败坏，皆由在廷臣子全不务做实事。东林、浙党，胜负相争：高者以有用之精神，具无益之口舌；卑者以立党排陷之威，为纳贿招权之藉。东林之君子多，而小人亦不少；但东林小人皆借君子名以欺人，而人畏之。浙党中小人多，而君子亦不少；但浙党君子，东林亦必指为小人而倾害之。一胜一负，相攻不下。惟望皇上明断于上、诸大臣虚怀于下，略其所短，取其所长；则所裨时艰，非浅矣』。疏奏，得旨：『切中膏肓，令部院申飭』。

复原任御史苏京官，驻庙湾联络海上官民。

京按豫，以黯闻，又从逆；因列泽清荐，蒙复。后降北，复为御史。

癸丑，贷原任湖广巡抚王聚奎。

以任事已坏，兵饷俱无，免议；亦缘为黄澍所纠，复与澍讐故也。

保国公宋国弼等言两浙财赋重地，不宜建藩。命礼部复议。

国弼等自务定策功，忌潞王近处肘腋故也。

甲寅，起升原任河南左布政杨邦翰太仆寺卿。

邦翰耄，以居里笑非（？）。吏科都张希夏曾面诘吏部尚书张捷，捷不能答也。

户科吴适疏劾监司陈之伸、夏时亨、郭正中。下部处分。

言『之伸癸未迁兗东道，闻警却回。方在出阙，乃乘国变，遽言得旨降用，复列监司。时亨以处分县令，营补夏邑劝农知县；遽称尝题加副使，通省劝农。夏初闻国变，南逃；又当赍诏差入豫，无何蒙称宪长，借题迎护，躡升江右方伯。正中罢职州守，借危疆为名，得起授东省监司；日事条陈，竟不至境：皆司道不法之尤者。又若章旷、黄国琦，既滥行于监军，宜令削秩图功，许湔前非；不效，则二罪俱坐。既严饬以鼓向往，更方禁以绝效尤；庶朝廷尚有纪纲，而臣子犹知法守。至于大贪□问之曾应瑞、失地潜逃之樊师孔，饰辨巧营，滥入章奏，均非政体』。疏奏，吏部复：『之伸，降级调用；时亨，以僉事图功；正中，削道衔；旷与国琦，俱夺职，充为事官』。一时兴论翕然快之。

偏安排日事迹卷八

十二月乙卯，予殉难诸臣谥、荫世锦衣者，令兵部酌覆；非有军功，不得滥与。

加兵部侍郎练国事尚书、原任尚书白贻清太子太保，各荫一子。

赠故陕西巡按李应期太仆寺卿，罢荫。

皆以剿■〈寇，女代支〉功。

原任通州副总兵王伯时请追论「妖书」及「三案」诸臣。

伯时自称随封恭皇帝，知前后事最真；因疏：『皇祖神宗时，宫闱内治皆贤文母，但册立东宫稍缓。盖缘孝端皇后年茂，明谕阁臣待嫡。若诸臣果从国本起见，言非不正；但谓非加之「易储」名目则无以为功，必欲倾陷孝宁太后暨恭皇帝于不测。读皇祖慰皇太子有「逆恶捏造妖书，离间我父子兄弟」之谕，言时泪下；皇太子亦含泪。时缉访虽严，奈庇护多，上终以贯盈劣生皦生光充数，而吞舟毕竟漏网。及东宫已立、恭皇帝之国，可无他议矣；乃乘疯汉张差突入东宫，而王之采以提牢主事指无影招词，作本犯口供。又赖皇祖圣明，召诸臣于太皇太后灵次，太子、皇孙并侍于前，委曲宣谕；有曰：「我父子何等亲爱，外庭有许多议论；尔辈为不忠之臣，使我为不孝之子」！可见皇祖骨肉间俱有不安；则奸党逞此凶心，将置祖后、皇考何地？时台臣刘光复越班趋进，大言曰：「如圣谕」。皇祖怒其狂率兼震惊太后神位，因逮诏狱。一时轰传「能谏」，不知所谏何言。痴人说梦，大都类此。迨皇祖升遐，遗诏命册皇贵妃为太后，众奸坚执不从，随移居一字号殿，贍资什物十失五、六。至熹宗初年，犹牵诟不体；凡能指谪祖后、皇考者，即称为风力。即此举动，无非欲谋陷祖后、皇考于莫可言之祸耳。臣又忆先年有三大案，贤奸显著。如挺击之案，主之者王之采、何士晋，驳之者刘廷元、岳骏声、杨维垣也。红丸一案，主之者孙慎行、张慎言、吴甡，驳之者徐景、温□、霍维华、王志道也。移宫一案，主之者左光斗、魏大中，驳之者贾继春也。今皇上承统，祖后、皇考尊崇谥号；若取「实录」一览，祖后受朋奸陷害、身处危疑攢□之地者，几三十年。今日报复，当不在闯贼后，应为洗雪。速颁诏布告中外，「实录」、「通纪」一一更正，野史、日抄尽行□削。或另入一篇，以揭朋奸离间之谋。仍举皇祖圣谕与诸疏自供，按一并追论』。得旨：『已经大赦，姑不深究』。

丙辰，工科都李清以敌、寇相持，请申饬中外亟图自修。从之。

疏言：『古帝王中兴，莫不拓基于自强而画境于自足。故汉光武有言：既得陇，复望蜀。人若不知足不可狃，而反以不知足自嘲；故取于天下者，足也。宋高绍统藩服，仅有天下半；而说者谓其病于意足，以己之永有为有，而不以祖若宗之全有为

有，故足耳。若皇上于今日何足有？以河□为丰沛，则恭皇帝宅中之旧封也；为恭皇所已有而不有，则不足。以金陵为长安，则高帝无外之初基也；为高皇所全有而不有，则亦不足。恢复之计，复何可复！虽然，昔人不又云乎：「内求诸己，而所忧乃重于所喜」？夫亦谓内者，甲兵顿、畜精乏，将士懦且骄；竭力以图功，则功无不举耳。臣以为事难浪试，而志无中辍；则窃有味乎子晋之揣勾践也，曰「为人能辛苦」！何谓辛苦？则无荒于觴、荒于色，兼无荒于琼宫。琼台之观，与南金和宝玩，皆此物此志也。况今何时乎？宫闱已化于杜鹃、园陵渐芜于狐兔；登城北望，慨然流涕，斯正其时。且不独此也，臣又尝叹我朝有二亡：惠庙以仁恕亡、先皇以英断亡；皆不以失德。然昔殉主接踵，今从逆比肩；先皇在天之怨恫，比惠庙更□。所望皇上籍甲枕□，缚凶竖□下，刺心血以祭先皇陵，则此痛可伸耳。昔夫差初立，出入必令人呼曰：「尔忘杀父之越王乎」？其杀越何决！然究也志倦垂成，以荒游自误，而勾践乃得以辛苦乘其敝；此亦有初〔靡〕终之前车矣。故臣愿皇上时时抱痛、刻刻怀耻，以此志为中外臣民倡也。不然者，皇上既弛于上，则诸人必逸于下。新亭之血泪渐干，东山之丝竹日盛；臣忘中原矣。望使徒恟于高丽，拜诏不呼于河湟；民忘中原矣。始矜壮志于马上，谓黄龙之直抵有期；终耗雄心于跨驴，谓西湖之□乐可老！将若□俱忘中原矣。诚如是，将列圣之幽恨何时舒？先帝之深仇何日复？臣愿诸臣发一猛省也！抑臣更有请□，宋之南迁，就走李成、擒杨么以靖内制外。而今则猷、猺交炽两川，危若累卵；且汀、潮、南、赣间，又以警闻矣。北有既毁之室、南无可怡之堂，徒曰「王业不偏安」何！偏可遽安？犹太言之也。乃所差可幸者，敌、闯交斗，南牧不遑；绸〔繆〕未雨，惟此闲暇。若彼操鹬蚌二矛，我𩚑渔人一閤；时乎！时乎！后将有不及图者』。疏奏，命通行申饬。

丁巳，进诚意伯刘孔昭、东平伯刘泽清皆为侯，加监军僉事张文光太仆寺少卿。

皆以定策功也。文光后降北，复为钱塘知县。

禁巡抚不许拿访；拏者止许正法，不得追赃。

先是，刘泽清疏裁江北按差，不允。至是，极陈拿访之害，有「寥寥民内不勾几背包、几抬杠箱」等语（？）。遂禁之。

命督辅可法调度行间，俱先发后闻。

命左僉都御史郭维经专督五城御史严饬保甲、讯察奸宄，以清辇毂——从户科吴适议也。

适言：『维经□辑都城，已有成效。宜责成弹压，以从民望』。因荐黄鸣俊、熊奋渭、李茂芳堪任督、抚，不宜淹抑。

戊午，升御史邓起隆太仆寺少卿。

准原任刑部侍郎朱大启荫一子。

命明年合祭天地，以太祖、成祖并配——并配，非礼也。

授睢县民白可俭锦衣指挥僉事。

以吁恩故。

录开国功臣郢国公冯国用裔光彝为世外卫指挥僉事。

国用与弟胜皆有功，独为不滥（？）。

己未，升兵科都黄云师大理寺右寺丞。

复原任右谕德韩四维原官——寻调用。

初传四维从逆，已授修撰。至是，疏辨，复原官；以忠，又褒。工科右戴英言：『四维，先帝时曾受人千金，保举非类。事发，调别衙门；钻营百计，再入木天。至「从逆」一案，惟四维弹射为多。乃云「题封岷藩，三月初十日（？），令下，即出都门」。夫旧例：四月中旬，部方以封差题；四月二十六日，方传制，领节册。或服物未具、仪文未成，尚须守候。今日三月初六日（？），则去题封时犹阅月；整装出都，何其遽也！至援卫胤文例为言，正自有别。盖胤文只受刑辱，实未伪命；岂得同年语哉』！疏奏，四维复调用。

庚申，〔□〕建文诸臣止予赠谥、不得乞荫，以滋幸滥。

补服阕御史高允□云南道。

辛酉，命湖广巡抚何腾蛟以原官总督川、湖、云、贵、广西等处，杨鹗回部管事。

巡按山东御史凌駟入朝。

广东僉事唐阶泰自疏加级。着罚俸二月。

禁锦衣卫僉堂擅受词状、拏禁平人——从御史秦鏞言也。

鏞疏言：『京都重地，法行自迎。今形格势禁，殆非一端。如金吾缉事，原有专司

。今则金堂等官并侵职掌，奸徒窜役，遍地拿讹，冒名恐吓，所在而是。词讼问理，巡城专责。今则部司、戎政、总理、都督各处受状，动拘小民，牵罪诬杜。凡此弊风，总累首善。若三辅要地，亦内也；民力已竭，全恃宽租薄赋，固结招徕。乃有无知之人乘国家之急，假托条陈，妄肆纷至。两浙，亦内也；财赋之地，不建藩封。今南中诸藩遍布浙直，设处供应，既累民财；遍处藩滋，亦伤国体。至于外威不近，臣岂能悉数，姑举其大者。如寇之大仇未雪，乃安心寝问罪之师；北之和议未成，乃拱手让河北之地。将帅大臣已裂土封□，乘诸利假便宜矣。呼吁之疏，□逼圣聪；亦宜稍示裁抑。如封疆大吏、朝廷命官，或委□不去，或召不来，或又有所避趋；而朝东暮西、此去彼就，纲纪堕坏。总兵一官，原为镇守要地；今不为地择人，乃为人择官。敕印旗牌，纷纷请给。副将以下，皆不屑为。监纪一官，原□赞画兵谋，兼令文武一体；今则添设多官，非假燃灰，即图速化。封疆一案，功罪略同；何以□虚戴罪之名！此入爰书之案、从逆一途，轻重稍别；何以一入廷尉之室、一登启事之堂？凡此，皆不顺不威之大者』。疏奏，通行申饬。

安远侯〔柳〕祚昌疏请以定策功，爵赏阁臣马士英等。不允。

壬戌，兴平伯高杰讨贼程继孔，斩之。

继孔以衙□作乱，□为凤抚马士英擒；乘国变逸去，复乱徐州。督辅可法与杰密讨，令□将贺□昌等擒斩。捷闻，户科吴适疏：『录优叙行闻，诸臣激劝军功，以比必边防』（？）。从之。

命各省直提学官严□武生，以清学宫——先帝时所立也。

命有司、士民不得辄□从逆族戚，攘窃家庭。

刑部尚书解学龙先抚江西，因有司拘熊文举等家甚急，株及族戚；故请宽禁。后学龙罢，复行拘；有司罔知适从矣。

癸亥，给追赠诸臣章溢、傅友德等诰命。

赠原任应天府丞过□训府尹，停荫；予原任兵部侍郎彭汝楠祭，停赠荫。

时乞恤甚多，阁臣铎以为杜其荫，则自绝。然夤缘者又间得之，故终不止。

升编修吴国华右谕德。

革管杭州南关主事林日光职，仍提问追赃——内臣孙元德纠其串同奸棍、加税入私也。

元德又查出新旧饷缺额一百七十五万、盐引价欠三十三万，于是兵部一应新旧钱粮俱令清察；亦阁臣士英意也。

甲子，宥失事巡抚陈睿谟助饷收赎。

罪在失陷襄阳；以纳银二万，免。

升兵科左王之晋本科都给事中。

后降北，为苏松道；旋乞休。

起补原任御史冯明玠、沈向俱广东道。

明玠，崇祯时，按山西；以北兵入，削籍。向，则吴昌时例转者。

.....

.....

祔祭恭愍皇太子、吴悼王、衡愍王、徐哀王、原怀王于兴宗陵，改谥孝宗张后曰「孝成皇后」。

工科都李清以惠庙称宗，宜入太庙，止疏请祔祭恭愍以下；又言：『孝陵张后既谥，宜改』。部复，从之。

镇守河南总兵李际遇叛，降北。

际遇西当潼关以扼闯、北，守大河。至是，声言借北抗闯，与北为一；北兵遂渡孟津——既入中原，则开、归不可守矣。

丁卯，升河南左布政尹伸太常寺卿，升尚宝司卿顾光祖太常寺少卿。

复原任御史周亮工原官。

亮工自北归，为锦卫缉下狱；疏辨，复官——阁臣铎力也。复降北，为淮扬道。

戊辰，北兵陷海州。

起升原任山永巡抚李希沆兵部添设左侍郎。

升湖广参政高斗枢都察院右佥都御史，巡抚湖广等处。

筑螺矶堡、板子矶堡。

二堡皆各水汇归江流最狭处；阮大铖所云「二合」也。

禁锦衣卫纵役扰民。

时卫讯丁象干一案，内干连数人，疑吏部书役所匿；番役遂登堂索之。尚书张捷呵使退，不从；咆哮弥甚。捷怒，疏参其横；然仅云「姑不究」而已。

己巳，准铜陵开采。

命户部议漕折定价，布示省直；革小单私耗之弊。征完银两州县径解饷部若裁运军行月粮兑饷（？）——从户科吴适言也。

行税契法。

凡民间田土，熟田每亩二分、熟地每亩五分，山塘每亩一厘；给与弘光元年契尾一纸，永为世产。行一年止——职方司王期升所请也。

改户部主事武备于吏部。

旧制：降谪官，无在吏部者。备尝谪幕庐州，今又以陪推点；人谓阁臣铎意。

荫内臣李国辅侄李守贞为锦衣卫都指挥佥事。

以微劳功也。

命督、抚、司、道等官有巧骗规卸者，吏科参来重处。

吏科都张希夏言：『臣屡接塘报，知和议未成，不胜愁愤欲绝。当合举朝精神悉归并一路，非计兵计饷、遏北御寇之事，勿言；非忘家忘身、弘才大略之人，勿举耳。无奈人心滋巧，机智横生；朝廷为封疆求真才，彼遂借封疆作骗局。其间有骗督、抚之法：逢人说剑谈兵，到处挟金求荐；听其虚声，真若忠义满腔、甲兵夙富者。及督、抚到手，又别有安排；非借需饷而延时日，则假条奏以掩逗留。迨至事会既失，自然举步难前；回京别用，正中深谋。盗爵禄而欺至尊，莫此为甚！其次，则骗司、道：明知死灰难燃，不得不藉危途以活机轴。当其毅然独任，若东西南北，惟君所命；及其路径既通，则齐、豫、江、淮，任彼那移。究若迢迢河上者，不

闻纵一苇而凌万顷。法纪彰明之世，能容此乎？其次，则又骗推知：题虽名曰「危疆」，心实则在希幸。至于狡猾青衿、市井无赖，亦思邀山□之□。弁髦名器，貽笑鹄梁，实自近日始矣。臣以为伐其萌，须严其令；杜其终，当慎其始。今后凡点用督、抚、监、司于有事之地，谢恩后即令束装就道，勿再陛辞、勿候领敕；饷不妨源源而来，敕亦可兼程即去。计其路之远近，定其限之迟速。如事尚可为、故意迁延，比至时移势殊，亦以失陷封疆之罪罪之。若危疆推知之考，何以偏见之布衣、诸生！制锦何席？刑名何事？乃可滥授匪人以滋幸窦乎！即贡、监与曾出任者，亦须察年力、验才品，勿谓人所裹足不前者，便可令其快意以往也』。从之。

户科熊维典以民穷差繁、恐滋驿骚，请停止催饷各差。不许。

督理芜、采太仆少卿宋□请开采铜陵县铜铅，以资国用。命自行督理。

疏言：『铜、铅之产，与金、银不同。采金、银则利重而效速，人所必争；铜、铅利薄而效迟，可免眈逐。且开采之地，必用兵防护；今即以营兵轮护，兵不更置、粮不别增，于计甚便』。从之。

命削沔阳知州章旷官职，戴罪充为事官，赴监督军前效用。

命访求「三朝要典」，宣付史馆；又令分别察议「逆案」，量与酌雪——皆从通政司杨维垣言也。

疏言：『「忠孝」二字近年不甚明白，之屈膝李贼作几许极不忠大不之事（？）如张差挺击一案，谁不知其为风癫，而必欲强坐为刺客。倘差为刺客，则皇考母家必杜□主使之诛，而彼时藩邸亦将有株连之祸；光庙既不遂友于之爱，而神祖亦且被惑溺之名。首此难者，一贪酷之王之采耳；只图博一非望之功，而使累朝父子、兄弟无一可者：于忠孝为何等！次则李可灼红丸一案，平心论之，亦正可谓之无功，而不可诬为行□。倘此药为□，则是光庙不得考终，熹宗不能正始；不但彼时首辅方从〔哲〕不能谢责，即次辅韩爌亦不宜再相、刘一燝亦不宜得谥，而先帝亦久失讨贼之义矣。首此难者，一事后之孙慎行耳；只图遂彼报复之私，而使累朝父子、君臣无一可者：于忠孝为何等！次则为李选侍移宫一案。夫移宫亦止送往事居之常，而不当造〔垂〕帘听政之谤。谓非此谤不能速其移，见吾功；然致光庙不能保其栢沐、熹庙不能酬其抚□，甚至□管冲主者，不归之数年有□之宫嫔，而归至妖淫于外事之客氏。首此难者为一小臣杨涟耳；只图遂王安专擅为群小□援之主，而使累朝夫妻、子母无一可者：于忠孝又为何等！当时大臣不附此，则不能保其崇阶；小臣不附此，则不能跻于要路；不肖者不附此，则失其护身之符；貌贤者不附此，亦不能袞塞责之常。谈居游衍之余地，若不订从前之误，何以破后来之迷！此「要典」一书冠以御制重颁，天下事之必不容缓者也。但使当年作俑者服罪九原，何妨今日吹声者□□一面！伏惟重察，宣付史馆』。又言：『先帝，□精主也；实不

宜有今春三月祸！其不幸及此，实从前不忠、不孝之臣害之，而始实起合党。一旧辅韩爌，为众拥戴，毫无建明，只造得一本「逆案」；而所欲庇者出之、欲害者入之，亦只造得不确、不公之案。如宁、锦之捷，不叙经抚，乃叙一巡关御史；则洪如□岂非魏瑄私人乎？不入此案者，以如锺曾首□门户故也。建瑄祠，各抚谁不被□者！张凤翼岂非建祠于保定者乎？而亦不入案；公乎、确乎？乞皇上将前「逆案」□复审定，第欲订之，不欲翻之。盖翻者谓此案之全差，不但造此案者不服，即臣等亦不服；订者求此案之至确，不但脱此案者快心，即仍旧者亦甘心。夫公乃确、确乃允，乃可传之无□□，所以成先帝之美也』。疏荐已故刘廷元等、见存周昌晋等、从公发愤王永光等。奉旨：『吏部察奏。惟真正党恶害人、建祠颂美者，不许轻议』

御史何□疏纠礼部尚书顾锡畴、兵部侍郎徐人龙。报闻。

都督陈洪范使北归。

先是，洪范与懋第等至德州，有「使臣所过弗敬，命来京朝见」等语。懋第慨然曰：『吾抵淮一疏，业云以死许国；宁死不屈也』！次河西务，先遣使持帖与内院商御书入城礼。内院冯铨，我故大学士也；辞色甚□，却帖不纳。不得已，前至张家湾，遣书摄政王，始遣礼部官又奇库来迎。鼓吹，御书从正阳门入，懋第等随之下鸿胪寺；时十月十二日也。次日，礼部官四人至，径索御书，谩语进贡；懋第等力折之，始退。午后，内院刚林至，踞椅坐，盛气以待。懋第三人出，欲令席地坐，不从；大声呼椅，与对坐。林问今上即位故；又问先帝遇难，江南何无一兵相加？懋第等曰：『诸臣闻变，正欲北行剿贼；而贵国先之，恐骤以兵至，疑与贵国敌。今始相酬，并约剿贼耳』。语毕，以不受御书告；通使曰：『因言御书，故不受』。懋第等折之曰：『大明天子，何云非御书』！林顾视懋等，色不悦；指曰：『汝丧服云何』？洪范代答曰：『以母丧故耳』。遂谩语，欲发兵；洪范曰：『今以礼来，兵往耶』！懋第曰：『且莫小视我江南』！林不答，去。次日，有自称户、礼部官者至，摩挲蟒缎、称兑金银，独御书不受；且云「应朝见」。懋第等曰：『天朝使臣，一揖耳』。留半月，始遣归。懋第等请祭告祖陵并葬先帝；不许。又请留银二千两，委官督工；亦不许。令□丁促之，遂行。懋第等三人□□间用，每懋第、绍愉乘马，皆不令远行；洪范或乘舆，偏间令前行，颇疑之。至仓州，果追懋第、绍愉回，令洪范归报。初，洪范等次静海；旧锦衣骆养性为天津巡抚，遣兵来迎，与相晤。时顺天巡抚宋权，我故给事、又巡抚也；参养性私南使，革□逮问。吴三桂等因惧，不敢见；而懋第又执不屈，语甚坚：故终不得其要领也。懋第等至北京，移驻太医院；乃密疏言：『臣所奉敕书，首重慰告十二陵，会议奠安先帝、先后山陵事。因彼不受御书，遂至相格；不能赴昌平一步，惟遥望涕泣而已。至奠安先帝、后山陵，原奉敕谕令谢升、卢世■〈榘，彳代木〉会议；乃升为□内院，世■〈榘，彳代木〉虽受敕书，驻德不敢来矣。臣等自十月二十七□兵，随向南行。二十八日，次河西务关，相向泣曰：「此行原为祭陵、哭先帝而来；不允，何以报

」！遂草仪注、整牲品，于次日五鼓，先望祭祖宗、列圣帝后，随望祭烈皇帝、烈皇后讫。虽造次不敢不□礼，而我堂□祖陵，使臣远奉君命而不能一叩首山前，是臣等所痛心悲泣而不能已者也！至先帝、先后值社稷之阳九、尽〔干〕坤之正命，梓宫□土尚未成礼，又臣等所悲号流血而欲绝者也！至先帝、先后梓宫一事，沿途访问，言各不一：有言葬田贵妃坟内者；有言□道未□完，草草掩葬者。因遣加衔游击杨王春等密往昌平山陵一带探问，得其回报内称：先帝葬处名翠草山，原□田贵妃葬坟；夫头江大领夫五十名起工，正开隧道。又有监工内官黄高等开土，已见石门。王春自称行商百姓，望石门叩头数十，将随带纸钱焚烧，流泪不止，旁观皆感伤。随拉江大道侧，细问前事；江大云：四月初一日，流贼用人三十六名举先帝柩至此，停红棚内；又用人十六名举同皇后柩，并停。昌平州铺行百姓共敛钱三十千，以开隧道；又有本州岛驻刮户部孟主事，同知州共看葬。四月初四日，入穴；先帝柩在中、周皇后柩在左，移田贵妃柩右。今摄政王恐未葬入穴，因此开看，便于修造碑亭。又探得各陵殿宇皆存，格搨□物不全；昌平东门外私树去大半，红门内树木亦动些须。又报先帝隧道宽二丈五尺等语。臣等闻报恸哭，随于二十四日五鼓望先帝山陵，率各官叩头讫。此臣等不能亲叩先帝山陵之罪也。至东宫、二王的耗，沿途访问，言各亦不一：有言流寇向山海发兵，人皆见皇子两位出者；有言流寇败回，在通州西门内见一位，有父老涕泣进口者；有言寇西遁时，人亲见挟一位在马上出城者。十一月二十三日，守门□官□称：先帝皇太子到礼部，随令人密□，报称有不认者。不认如皇亲周奎、太监贾应庚，百姓皆痛殴；凡认者、保者官民十数人，□皆即杀讫。又皇帝公主住周奎家，闻年十四；为先帝手口断一手，死而复生。又闻自称皇太子者，见在刑部；□以为假，而道路百姓之□多以为真。臣等羁留此地，既不能面问真伪，又无从向□置一语。此臣等所闻东宫、二王之消息也』。时洪范至，有疏言『皇太子因□兵将至，先为贼子弑；止挟二王马上行，迎战。永平失利，二王亦受害』。与懋第异——然无实据也。

命讯癡僧大悲。

大悲，徽人；为僧于苏。忽狂言先帝封齐王，不受；又封吴王。命府部、科道等官同法司会审。

庚午，追叙原任巡按贵州陆献明功，加升一级，遇缺起用；仍荫一子。

阁臣士英，贵州人；故私之。

命宁南侯左良玉早□襄阳，以通郑、宛。

良玉请列衔督、抚前；从之。

总督王永吉疏陈兵饷两匱，时□难支。命诸臣速行料理。

疏言：『方今□虎视于东、寇□□于西。人但知逆寇未灭，忧在心腹；不知□□方来，祸在眉□。人但知藩镇势重，不肯合力疆场；不知藩镇兵孤，未能独力堵剿。人但知将士辐辏，方且征进有余；不知火器短少，正若防御不足。人但知防河急守门户，可以保护江南；不知防江更属根本，不可稍疏户牖。人但知兵力单弱，境上实少雄师；不知饷额空虚，舟中先有敌国。民无固志，兵有离心。诚思及于此，危如朝露；尚何侈言挹伐哉！乞敕下诸臣内外一心，早求良策』。上俞之。

辛未，命蜀中汉土官兵文武将吏俱听督、抚应熊节制，巡抚亦听选用；应加衔各官，皆先行后奏。

壬申，加辅〔臣〕士英少师。

禁各官荐举。

从刑科右钱增言也。

命总督王永吉专防江北、张缙彦专防江南，有警相救。

癸酉，准内臣冯进朝移荫甥男。

诚意伯刘孔昭再疏辞侯爵。允之。

时文武大臣自士英、国弼以下咸口务定策功；惟孔昭泣缴成命，时论贤之。后亡命入海，不知所终。

命都督牟文绶督汉土官兵与督辅应熊合剿张献忠。

命陈洪范赴督师军前，以便袭应（？）。

督辅可法疏言和议难恃，战守宜急图。优诏答之。

疏言：『臣向所望者，和议复成，我因合□力图贼，遂其复仇耳。今北（使）言旋，敌兵踵至，和议已断断无成矣。向以全力图寇而不足者，今复分以御北矣。际此时艰，忧心欲绝。然历观往代国亡，莫不因和自误。今□之拒我，正我所以自奋与天所以成我，特在人心一转耳。从来中兴大业，不外于君臣一德。臣尝慨唐、宋门户之祸，与国运相终！即使所用皆才，已废却一半；况意气相激，化成恩怨、酿为杀运！近年之事，殊堪痛心！今时极艰危，为臣不易。官之久者，其负罪益深；位之尊者，其得祸更惨！有心之士，方以此为危身积戾之场；而无识之人，乃以此为快意寻仇之计。即使藏怒，孰有深于戕我君父、覆我邦家者！不此之仇，而犹修睦

眦之微嫌，快升沈于转□。此之谓不知类矣。谓宜虚心平气，还之大同。何人实是干济之才？何人实是清修之品？无寻题目而开媒孽之端、无捕风影而肆株连之祸，务得海内真正才品，举置均衡；中朝之举措咸宜，阉外之嫌疑自化：此臣所望庙堂之同心者也。昔唐室嗣兴时有李、郭，宋室再造时有韩、岳、张、刘；诸镇何让焉！若当患已剥肤，尚以贼贻君父，谅非诸镇所忍出也。然大将所定者，惟志；三军所鼓者，惟气。志不齐一、气不奋扬，虽赍育之勇、如林之众，莫能用也。试思先帝待诸镇何等厚恩、皇上封诸镇何等隆遇！先帝之罹贼难，诸镇不能救先帝于难，何等罪逆！释此不问，自弄干戈，是犹舍父母仇、寻乡邻斗也。今和敌不成，惟有言战；战非诸镇事，谁事？必皆以皇上复仇为心，简乃车徒、穀乃甲冑，惟敌是图！未至，何以伐其狡谋？既来，何以御于河上？某当危地，而我必急以往援；某争小嫌，而我必先以大义。田单报燕之日，将军有死之心、士卒无生之气；廉、蔺刎颈定交，子仪释恨泣拜：诸镇岂不闻乎？此臣所望于阉外之同心也。然阉外所视庙堂，庙堂所视主德。我皇上中兴未就，大仇在身；凡一□念、一图事，尤望深痛愤。大涣纶音，谕诸臣以怡堂不可安、积习不可狃：在内实筹兵饷，以卧薪尝胆为然机；在外力捍封疆，以江北中州为死所。拨乱为治、转弱为强，在一振厉间耳』。时吏科都张希夏见诸臣日寻报复，亦言「当以光复故业为大翻案、以荡灭闯贼为真报仇」；然莫能省也。

甲戌，赠刑死工部主事李逢中太仆寺少卿。

起升原任应天府尹祁逢吉光禄寺卿。

怀宁侯孙惟城疏□旧辅吴甡、原任吏部尚书郑三俊。不问。

时因高杰荐甡等，故有此疏。于甡言：『其奉命护陵，逗留纵寇』；三俊言：『其以赂用吴昌时，独乱铨柄』。惟城新袭爵，人皆谓刘孔昭等教之也。

谥翰林院编修胡守恒「文节」，荫一子。

贼破炉江，守恒以城守见害。

吏部奏起为民陈尔翼——既而不果。

先是，忻城伯赵之龙疏荐「逆案」太常少卿陈尔翼，下部起用。户科吴适时署吏科，抄参其非；之龙怒，疏争之。适因言：『祖宗典制，惟科臣专封驳，未闻以勋爵参者。尔翼诵称魏忠贤用命，而内外诸臣各尽其心；所据者，钦定爵书耳。若荐崔逆为本兵，尔翼实有是疏，则勋臣代供矣。以谄魏逆者为公道，将魏逆在今，亦应昭雪而后可。即近者以荐崔逆者为公道，将崔逆在今，亦应推用而后可。即今者录用一、二，咸反处昭雪而后擢补，非谓两逆功臣尽当推毂也。明旨有云：「真正党

恶害人、建祠颂美有实迹，不许轻议」；勋臣犹不闻乎？若一经勋臣条列，遂尽登启事；则封驳之省臣与甄别之铨臣，俱可罢而不设：是悖旨自雄而弁髦祖制也』。吏科都张希夏言：『废臣入国，明禁森然。乃等大胆僉邪，敢貌视君父，不谒陵、不见朝，公然辇金挟刺，望门投谒；及谋成事，就仍复潜归，形同□蛾。至封驳之任，是臣专责；孰知驳人之人，反为人驳！职掌争侵，是非无主』。然吏部尚书张捷不顾也，仍奏起用尔翼。时通政司杨维垣由逆党雪，然不欲多雪；每语人曰：『若不应雪而雪，则雪者不光』。故尔翼虽题用，终不登启事也。

乙亥，命山东巡抚王燮驻淮安府安东县，无警防河；登莱巡抚王濬暂驻淮上，以候委用。又省原派山东饷银三万、东登二抚银米三万。

初，燮与濬皆以□事超擢，慨然任行。已见北兵渐炽，遂疑憚不进；屡经科臣黄师云、梁应奇催参。工科右戴英又言：『臣近闻山东人心不忘本朝，乡勇团聚不下十余万；若濬与燮早渡河收拾，自不难为我用。今督、抚重臣逗留如此，于地方何望！臣谓二臣初意，原不过骗官。迨官已入手，则向兵部索兵、向户部索饷、向工部索衣甲器用，借种种不能应手之事，以曲遂规避；而疆事已大溃。臣谓昔坏东省者，虏与寇也；今坏东省者，濬与燮也。若不严行处治、立正斧□，恐尤而效之，未有止息时』。明旨屡催，竟不行也。至是，遂决弃三齐，听二人驻淮。工科都李清曾言于阁臣士英，谓「国法宜振」；士英但曰：『人言我愤愤，后人当思我愤愤』！

东平伯刘泽清言原任兵科时敏复原官，开屯大瞿山。

敏，崇祯时已例转金华知府；未出都，降贼。以泽清荐，反复原官；工科右戴英力言不可。得旨：『开屯不效，一并治罪』。

革候考平湖知县陈台孙职，命抚、按提追。

时中书宗灝俸未及□，已涎吏部；同乡刑部尚书解学龙意在台孙，灝怒。至是，以巡盐李挺疏纠其欠课，遂革——或云：灝中伤之也。

丙子，再赠侍读学士丁干学礼部右侍郎，令与谥，仍荫一子。

干学，天启时以程策忤魏珫，削夺；谥竟寢。

复原任给事中虞廷陞、御史周昌晋等原官——从通政使杨维垣言也。

科臣虞廷陞、郭如开、杨兆升、台臣周昌晋、陈以瑞、徐复阳、曹谷、袁弘勋皆复原官。惟水佳胤以御史例转，候京卿缺用；原任吏部主事李寓庸候服阕，起任岩剧

。寓庸以贪，今屡挂弹〔章〕，故吏部尚书张捷游移其辞，不别也。内惟兆升、佳胤与弘勋非「逆案」，廷陞、昌晋各案中「闲住」，余皆「为民」。时各已故。

复原任给事中罗志儒、丁允□、方士亮、御史张懋禧、李瑞和、蒋拱宸、吏部郎中葛舍馨各原官。

皆言官所荐也。拱宸，先帝时号侵东平伯刘泽清，清遣人刺之途；以不遇，免。至是，闻其复官，出不逊语，故独不登启事；镇臣之能夺铨臣柄，如此耳。

命宣城人刘振修「六部志」。

振，平生博学，集国史成书；穷年矻矻，阅录无暇晷。惟红丸、挺击、移宫三案，独云「要典」谓当。非其所借之人，不当非其所借之言；是或一见也。

增南赣兵二千人。

山东土民丁耀元等起义兵，命督、镇相机接应防之。

荫死难巡抚卫景瑗、宋之冯各一子锦衣卫百户。

免总督丁启睿充为事官，加太子太保、兵部尚书，荫一子。加丁魁楚兵部尚书。

俱因擒刘超功。启睿与弟启光，后皆降北谋补官，同见杀。

刑部尚书解学龙以「从逆」诸臣罪案请，命再议。

有身陷北庭或甘心从北、或不忘报效俟二、三年后定夺者，何瑞征、杨观光，张若麒、方大猷、党崇雅、熊文学、龚鼎孳、叶初春、戴明说、孙承泽、涂必泓、刘汉儒、薛所蕴、卫同祚、赵京任、刘昌、张鸣俊、高尔俨、董纪、孙襄也；有一等甘心从贼应磔者，宋〔企〕郊、牛金星、张磷然、曹钦程、李振声、喻上猷、黎志升、陆之祺、高翔汉、杨王休、刘世芳也；有二等应斩、拟长系秋决者，光时亨、巩焞、周鍾、方允昌也；有三等应绞拟赎者，陈名夏、杨枝起、王承曾、原毓宗、何□先、廖国遴、项煜也；有四等应戍拟赎者，王孙蕙、梁兆阳、钱位坤、侯恂、王秉鉴、陈羽白、刘大巩、郭万象、裴希度、申□□、金汝□、张懋爵、吴达、黄继祖、杨廷鉴也；有五等应徒拟赎者，宋学显、沈元龙、方拱干、缪玩、吕兆龙、吴刚思、方以智、傅鼎铨、张家玉、傅振铎也；有六等应杖应赎者，潘同春、王于跃、周寿明、向列星、李櫏、徐家麟、吴泰来、张琦也；有存拟另议者，翁元益、鲁□、郭充、吴尔埏、史可程、左懋泰、王自超、王之牧、白胤谦、龚懋熙、王皋、梁清标、杨栖鹑、梅鹑、李化麟、张元琳、吴崇烈、侯佐、吴之琦、邹明魁、□魁

、朱国寿、许作梅、胡显、赵颖、吴嵩、刘廷琮、朱积也；有已奉旨录用者，张缙彦、时敏、卫胤文、苏京、韩四维、黄国琦、施凤仪、龚彝也；有已奉旨尚未用者，姜荃林、张正声、顾大成也；有报已故者，吴家周、吴学廉也。疏上，得旨：『光时亨等应否仍须缓决？陈名夏等赎绞果否蔽辜？侯恂封疆罪案未结、又从伪命，何止一戍！宋学显以侍从之臣授伪通政矣，刚思受伪令而扬得意；方以智系定王讲官，今定王安在：何止一徒！且潘同春等既受伪命，岂可但拟一杖！至癸未庶吉士何瑞征引见逆贼，人人汗伪；岂可复玷馆阁！方拱干原未从逆，着与雷耀龙、吴履中等另本拟』！皆明旨所拟也。然汉儒拟戍家居，虽仕□原未降闯，于此案无涉；而彝已出都，又刑部误入者。寻于彝豁。

复御史杨仁愿等原官。

仁愿云南道、徐养心江西道、向北山东道、成友谦浙江道、刘宪华河南道。

削应天府尹王廷梅职级，冠带办事。

梅先为浙江左布政，饷银有欠，为内臣孙元振所发也。

皇太后移居新宫，命妇朝见。

戊寅，命于弘光元年二月初择日成东宫、二王殿。

礼部以岁初多庆，竟未议成服而国亡。

允张缙彦言，定总兵王之纲、许定国、刘洪起、李际遇防守信地。

之纲归德至宁陵东，定国宁陵西至□阳，洪〔起〕祥符至汜水；际遇专守河南，有急相救。

魏国公徐弘基卒。

赠太师，谥「庄武」，荫世锦衣。

己卯，赠殉难甘肃巡抚林日瑞兵部尚书，荫一子世锦衣。

日瑞死于贼。

加郟阳巡抚徐起元兵部右侍郎、湖广巡抚高斗枢都察院右副都御史，各荫一子。

以城守拒贼功也。起元，一榜；后降北，为左副都御史。

命两广总督沈犹龙剿漳、汀贼。

庚辰，复原任吏部尚书王永光宫衔、工部尚书姚思仁原官。

辛巳，改明年郊祀于冬至。

御史沈宸荃言：『祀天不可缓，请遵前旨』。不听。

壬午，命张缙彦以总督兼巡抚归德、开封、河南三府，督王之纲、许定国、李际遇恢剿河北、潼关等处；越其杰以原官抚汝宁、南阳、黄州三府，督刘洪起、黄鼎、毛显文恢剿楚、豫；凌駟巡按河南兼督各镇，兼理河北、山东招抚；陈潜夫另用。

升应天府丞瞿式耜都察院右佥都御史，巡抚广西等处地方。

正推万元吉，式耜以借推得；盖忌者阴而远之也。后为留守粤省□事，与尚宝司卿张同敞殉难最烈；论者方之文信国云。

升四川佥事马干都察院右佥都御史，巡抚四川等处地方。

复原任浙江巡抚黄鸣俊冠带。

升贾登联都督佥事，充四川总兵官。

荫内臣孙象贤、孙珍各弟侄一人锦衣卫指挥佥事。

偏安排日事迹卷九

大清顺治二年正月（弘光元年）庚寅，补光禄监事丁允元吏科、原任兵科方士亮刑科、〔杨〕兆升兵科、南吏科郭如闇户科，御史周昌晋、袁弘勋俱广东道。

允元，崇祯时以不缴红本，处。士亮，从故辅周延儒督辅，坐累，配。如暗、昌晋，虽以时论傍时致挂「逆案」，然不闻躡迁，且少有所排陷；故得雪。弘勋，为人轻鄙，与复官，滥也。后允元降北，为苏知府。

癸巳，加助饷王司木增行太仆寺卿（？）。

命河南巡抚越其杰、巡按凌〔駟〕防守虎牢。

时北兵渡河，抚、按退屯颍、寿、沈丘间；故促往。

命靖南侯黄得功、广昌伯刘良佐率兵堵颍、寿与〔兴〕平伯高杰守归德、徐〔州〕。

大学士可法疏言：『我与□所隔，仅一河耳。河长二千余里，非各镇兵马齐力得御，不能用也。故高杰欲自赴开、雒，而以黄得功、刘良佐兵马守邳、徐。久知敌之乘暇必在开、雒，无如兵力不能远及何！今敌已渡河，则长驱而东，刻日可至；御之河以北，艰难百倍矣。兵在河上者，月粮压欠，苦饥寒；当岁暮时，每名求银一、二钱过节，亦不可得。臣标兵如此，各镇兵可知。伤心时事，有泪空洒！今敌既南渡，并力攻寇；而兵力及我，只不过两月间。况敌中传言，久有「正月南侵，东西并犯」之说！今攻邳之军未还，济宁现集粮喂马，意岂一刻忘江南哉！若非庙堂上多发粮饷，以得功、良佐兵堵颍，高杰兵守归、徐，大家齐心、勿分彼此，臣恐江北之祸即在目前。江北危，而江南亦岂得安枕耶』！命依行。

命兴平伯高杰提兵与总督张縉彦直抵开、雒，进据虎牢；仍令户部速发粮、银接济。

初，杰争扬州，督辅可法颇为所窘；后感可法忠□，颇倾心□依。而靖南侯黄得功以杰往相构，犹怀疑不解也。至是，杰闻李〔际〕遇降北，遂致书可法云：『为今日计，似宜速调黄、刘二藩紧防开、雒，则杰可以全力注徐、邳。若二镇惮于险远，宜径调赴邳、宿防宿；杰量提兵直趋归、开，鼓励中州□就近联合堵寇敌□，且急图完雒、荆、襄以为根本，东南一带方可安枕』。又具疏侃侃言之，与书意略同；内□『臣以一饥军忍馁忍冻，惟力是视；誓欲收拾人心，再整土宇。近见黄得功有疏，犹介介角口；臣置若不闻，但一意以君父仇耻为先，谁实堵御防河而较论长短为哉』！时总督张縉彦议与杰合，而可法疏亦云『杰抵开、雒后，有贼剿贼、无

贼御敌。但所急需者，饱□之粮饷耳』。诏从之。独得功故意犹存，未肯遽往邳、宿，为杰后劲；而东平伯刘泽清又挟横难任，故可法调刘良佐当之。其调剂，亦云苦矣。

甲午，监军佥事耿廷策力辞□□。允之；命以参政管遵□监军，督滇兵办贼。

升尚宝司丞邹之麟应天府府丞。

御史郑瑜疏□原任凤督朱大兴。报闻。

命东省诸臣慕□来归者，吏部谅才叙用。

从御史凌〔駟〕言也。

雷，命诸臣修省。

命督、镇差官不许下县催粮，有司亦不许擅□，候解部照款按发。

时各镇诸饷不敷，以差催为名，沿途截劫；故令禁之。

乙未，降革职四川右布政王梦锡一级用。

梦锡，先帝时以纠多赃，革职。从轻议者，吏部尚书张捷儿女戚。

太常寺卿葛寅亮疏言惩贪奖廉之法。命部院速议行。

疏言：『神庙时，甲科官尽皆自饬，鲜计赂遗；乡科亦多自爱。惟他途之朽□污下或然。今甲科中，比比而是。司□者，出纳皆有扣克；鞫狱者，轻重多以贿成。即抡才之任，交易若市；而地居清要，又或借润于居间。源之不清，流如何洁！凡为外臣，无不括民脂以邀进取。故桁杨桎梏之下，富则破家析产、贫则贴妇卖儿，怨讟交腾；大法小廉之风，荡然矣。国法非不知，而同气相引，俨然混列清华，扬扬自喜；即败露归林，广田园、美宫室，足娱一生：人亦竞艳之。彼视廉吏可为而不可为者，更自偷快得计，而宁复顾国恤也！故贪者必置之重典，赃务纤悉严追；若坏法赃重，即宜籍没家资，并丧其所自有。兹值军需告急，民力惟艰；免加派之烦，以此相抵，实大有裨于国用。至于廉官节介性植，取与必严，固士君子持身自爱之道宜尔。然铤罄垒耻，室人交谪；勉以自立殊难。故养廉之道，自古不废。乃今俸□折□钞，业已甚薄；且艰予不给，而又搜括无余地、捐助有多端。在贪者仅出余□，愈得借口以咨其贪；廉者至损生计，莫能资身以成其廉。要惟天秉忠诚者，淆之不浊；而世多中人，转相仿效，安望天下皆廉官哉！是必悉反乎此。即俸薪之

折势难遽复，亦宜量斟以有待。圣祖于选官，赏绮布、道里费及其父母妻子有差，着为令曰：「以养汝廉，奉公、无渔民也」。而于贪者必严法不宥，令追赃所得；不但有资充饷，亦可复厚□廉吏。抑扬之间，所关风励非小矣』。

授睢阳民李承胤锦衣卫指挥僉事。

刑部尚书解学龙再以「从逆」六案上，兼请停刑。俱允之。

学龙既奉前旨，将光时亨所驳等罪，各加一等。惟六等潘同春等以候选小臣受伪无据，仍归原拟。疏末请停刑，盖为时亨与锤缓须〔舆〕死也。恐阁臣士英不悦，或再驳；适士英援例乞罢，方注籍，学龙不往见，止过阁臣铎密商。疏上，批允；有「详慎平允」之褒。待士英见揭，则旨已下矣；疑学龙欺己，怒。会讯僧大悲狱，阮大铖与张捷、杨维垣等言「旦晚当讯僧有疏」；学龙遂移病。大铖入，士英幕多微小舆，每学龙以和衷语进，大铖辄属垣荐；乘机中之，有以也。

加皇亲都督李铖巨太子太保。

清学田，输银入官。

革方拱干、雷跃龙、吴履中等职。

工科都李清疏陈新政。命申饬行。

疏言：『古帝壬中兴，莫不改元焕号，与天下更始；则愿皇上中天下而立、定四海之民，而无徒以南朝天子自况也！昔我高皇帝定鼎金陵，囊括南北，所手勒屏间、旦晚吟哦者，惟「南朝天子爱风流」为戒。臣愿皇上力追高皇共勒斯民，无以赏花钓鱼，遽侈宋宗太平之盛；且以卧薪尝胆，时存越王辛苦之忠。异日恢复功成，与高皇开创并谓金陵有两圣人焉，皆起东南而有西北，厥功懋哉！虽然，汉贾生不云乎？「群下之众，而王上至少也。所托财器、职业，萃于群下也。但无耻俱苟安，则王上最病」。咏斯言也，非群臣责而谁责哉！夫责诸臣以平奴、荡寇，犹曰「斯事重大耳」；若责以贿赂无营、情面无徇、水火玄黄无过战，惟兢兢整纲饬纪、信赏必罚，则又谁不能况乎！王，犹天也；乃甫经申饬，忽尔弁髦。如监军、监纪不宜滥，设则有饬；而题请如故。希赠、希荫不宜滥，乞则有饬；而封进如故。赏功、酬劳已极攸厚，不宜再三请，乞则又有饬；而上自勋戚重臣、下及护随冗员，干冒无厌。聒聒耶、藐抗耶？大臣如此，何以责小臣；近臣如此，何以责外臣！若尤而效之，视为固然；则万一敌、寇扬尘中外益急，而呼兵兵不应、呼饷饷不应、呼将若士又不相应，天下事岂不可寒心哉！盖以崇祯十七年为单□之初，则收拾人心，一大机括也。步太急则■〈盾〉故，当以兼容并包者予天下以风和濡之象；所谓「人言我愤愤，后人当思我愤愤」者以此。以弘光元年为中兴之始，则又整顿人心

一大机括也。水太濡则犯故，当以震厉奋迅者示天下以当烘电掣之象；所谓「不鸣则已，一鸣惊人」者以此』。疏奏，命通行申饬。

镇河总兵许定国叛，袭杀兴平伯高杰于睢州。

初，定国久据睢州，意惮他徙。会河南总兵王之纲开镇归德，内不自安；有言其送子渡河，招北兵南渡者。适杰至归德，欲以威摄定国，招之会；不应。□复约抚臣越其杰、按臣陈潜夫等往睢，定国始郊迎。时其杰以为不可入城；杰心轻定国，纵马入。酣饮，约定国十六日离睢，又取塘报通敌、送子事示定国；国愈疑，无离睢意。杰促之，怒；□遂于十二夜伏兵放炮，大呼。缙彦与〔其〕杰等皆仓皇走；惟杰卧未起，拥至定国所，被杀。先是，杰以定国将离睢，尽发兵驻县，开封存者内丁数十人而已。定国先多觅妓，选四艳□杰，而以二妓偶一丁寝。及炮发，一丁已为二妓掣，竟败。次日，杰部攻城，老弱无子遗；〔定〕国走降北。杰为人淫毒，扬民闻其死，皆称快。然此行志甚锐，故有惜其死者。

戊戌，补原任御史李瑞和贵州道。

先是，瑞和为死难左都李邦华纠，削职——以按浙不检也。

升吏部主事叶廷秀光禄寺少卿。

内臣高起潜请开丹阳练湖助饷。允行。

谓开之为田，可变价五百两（？）。

庚子，升兵科左钱增刑科都给事中。

癸卯，令汰内地监纪、赞画等官与借名加级各武弁——从诚意伯刘孔昭言也。

复已故闲住太子太保礼部尚书李思诚原官。

工科都李清请也。丘志弘私贿崔呈秀为嫁祸，致削夺、追赃。两仆一死、一戍，犹坐住。故辨复。

诚意伯刘孔昭疏纠御史王孙蕃、刘宪章。命部看议。

先是，御史陈良弼等皆以定策功加衔，孙蕃因病不与。自辨决计，因闻者嗟向隅耳。宪章以巡关南归，得还原官。而山东巡抚余日新先下狱，故孔昭两纠之。然情同法异，不止宪章；而孙蕃则以纠偿纠也。

以大工成，锡辅臣可法、士英、铎、应熊银、币，予工部尚书何应瑞等、内臣韩赞周、武臣冯可宗等升赏荫有差。

文臣得荫者，工部尚书、侍郎三人，俱入监；内臣荫锦衣指挥者韩赞周一人、同知者庠九德等九人、僉事者乔尚等八人、千户者李国辅一人、百户者□国泰等三人。

甲辰，命删「三朝要典」。

原任□□□□孔嘉疏言：『「要典」一书，史臣持论甚正。后崔呈秀无端附和，增入一疏，贻玷简篇。乞行删正』。允之。

议起原任户部侍郎宋之普——既而罢之。

之普为户部侍郎时，曾荐钱谦益等，冀取容门户。后吏科都章正宸厌薄，抄参之。至是，夤缘御史张孙振、黄耳鼎，疏荐求起用。终以见恶刘泽清，故寝。后仕北为户部主事，升常州知府；泽清恶得其正者。

起升原任山东参议张时旸尚宝司丞。

阮大铖同籍也。

起升原任右通政马思理为左通政。

思理先为右通政，坐仲吉救黄道周，下狱。至是，起。后北兵破福建，思理自缢死。

荫内臣张师孔侄世锦衣千户。

以乞怜微劳得之。

命吏部侍郎蔡奕琛以原官进□阁大学士，入阁办事。

初，奕琛抵任，□上疏自辨；内言：『臣向者偏及风闻，牵及礼臣钱谦益；今谦益休休雅量，尽释猜嫌，引臣共济，方愧深叹为不可及！臣独何心，敢留成念！然当日力阱奕琛，欲以受吴中彦贿相加者，实谦益也』。人两哂之。至是，入阁。时诚意伯刘孔昭等欲援国初徐中山王为中书右丞相例入阁，以舆论交辨而止。

准礼部右侍郎谢德溥终养。

德溥母逾九旬，恳请。允之。

乙巳，降溧阳知县李思模五级。

时定约费，赴考童生以三两为率。思模言本县童生大半赤贫；坐阻格，降。

升大理寺右寺副张淳太仆寺寺丞。

淳，崇祯时为工科，以累谪。

赠原任登莱巡抚陈应元右都御史，荫一子。

先，应元子乞荫，不许。至是，又以夤缘得。明旨无常类此。

赠刑死御史冯垣登太仆寺少卿主事、邹逢吉太仆寺丞，予祭、荫子。

赐兵部侍郎阮大铖蟒衣。

以黄年琦兵部主事，仍监军。

时充为事官之令方新也，遽有此授。

丙午，户科吴适陈体元新政五事。俞之。

一曰诏旨不可不信：『朝廷之有丝纶，所以彰示臣民，俾知所遵守。迩来事变错出，间多前后悬殊。用人之途，始慎而继杂；诛殛之典，初严而终宽。禁陈乞矣，而矜功诵宽者□日上；重爵赏矣，而请荫乞封者望日奢。镇帅屡责进取而延迟不前，军需频督转输而庚癸如故。欲期画一，宜重王言。臣谓甲申五月以来，新纶美政，宜敕该衙门恭加详订；举一切大事有关治要者绝去二三，炳垂史册。今后凡奉明旨，务俾上作下应，内外永遵』。一曰人才不可不核：『人才为治所从出，顷者典籍无□，钱神有径，人思跃冶。初仕辄冀清华，官多借题行间，每增监纪。起废而熏莸并进，悬缺则暮夜是求。以至荐牍日广，启事日勤：果尽从君父封疆起见否？臣请自今以往，求才务宽，而用才务严；宁重严于始进，毋致追恨后辕』。一曰□材不可不储：『将帅之略，岂必尽出武途！如唐之节度，内外互迁；盖储之者素耳。请自今严饬中外：蓬华之彦，非韬铃之略勿讲；辟举之选，非军旅之才弗登。技勇骑射，实实讲求；无人不奋于武威，无刻不激于同仇：□材不可胜用矣』。一曰国法不可不伸：『人心所以不坏，赖有公谊维之、法纪振之。顷皆主附逆之徒，即尽膏斧钺所不足惜。今圣明祝网，既垂法外之仁；臣恐此辈犖金翻案，奸狡百出，渐何可长！亟请严饬禁止。即从前计典处分，其挂议轻者犹可榆收，而大贪、大酷断

不可□登进之阶』。一曰言责不可不明：『祖宗设官，外有六曹、内有六垣；俾表里相维，大小相制。是故纠弹之外，复有抄参。岂六曹蔑视封驳，而可称法体乎？臣请敕下该衙门率遵祖制，重言责即以饬官守。更祈陛下急谏言，凡条奏有当者务措于行；毋使批答徒勤，而实效罔着。凡此五者，皆鼎新急务也』。

江楚总督袁继咸陈兵饷实着；并请亟毁「要典」，以断株累。

疏言：『窃臣逃稽往牒，代有中衰。成周雒鼎虽迁，侯服环拱如故；宋中原虽失兴元，陇蜀尚足为江、楚屏蔽。今秦、晋久成寇窟，荆、襄未归版图；蜀省始为猘贼攻陷，继又为闯遣叛将马科袭踞。黔、楚、江、粤，祸渐剥肤。我旧京不受戎索，辱我使臣，牧骑窥逼河干：则形势之弱，未有甚于此时者也。夫寇不可玩，罪在必剿；敌不就和，法在必战。然淮阴之略不世出，睢阳之节难轻责。然人臣以为帝王御人，以诚谋贵□全。责宁南以剿贼，必裕宁南以饷，使君者行预有三月之裹；责四镇以御敌，必使四镇战守实有可恃。南者有以应乎北，北者自不迫而南：此须庙堂实实打算，不可一着松懈。今者履端受贺，人以为拜乎！称觞之日，皇上当以为卧薪尝胆之日。乞痛念大耻未洒，以周宣之未央问夜为可法，以晚近长夜之饮、角抵之戏为可戒！土木之役，得已者已之；浮淫之费，可省者省之。更乞敕谕诸臣，亦痛念大仇未洒，后私□而同王仇；以伐木之和平为可法，以角弓之相怨为可戒！臣每叹三十年来只为「三案」葛藤，血战不已！前此诸臣，当分任其过。若「要典」一书久荷先帝特旨焚毁，诸臣即非屑附崔、魏之人，何必复寻崔、魏杀人之书！臣请书未进，亟寝之；书已进，亟毁之。至王者代兴，从古亦多异同。昔平、勃迎立汉文，功在汉室，不闻穷治朱虚之过；房、杜决策秦邸，功在唐室，不闻攻击魏征之非：固其君豁达大度，亦大臣公忠善谋、翼赞其功。臣请乘此春和布政，再下宽大维新之诏；解□扉疑入之网，断草野株连之藤』。上俞之；言惟「要典」不允毁。

御史李长春疏言南运与北运不同，请改漕粮为民运，仍减兑费以裕军饷。命户部议。

兵部请荫死难左副都□□□锦衣世荫。命再议。

旨言：『锦衣世荫原酬军功，滥荫者比比』；乃独靳殉国一臣，可慨也！

革刑部尚书解学龙职——以保国公朱国弼等纠其庇逆故也。

国弼言：『先帝大变，实殉□社稷；则凡我臣子，即当共殉。若复□污伪命，不但忘先帝，更仇皇上：是李贼固贼，而从贼之臣亦贼也。既已为贼矣，又安分差等哉！即强以□等分之，亦皆失当。如陷虏诸臣，姑暂免收拏，限三年定夺；是矣。其第一等见在从逆者，只云俟缉获正法，不言收奴；岂从逆之罪，转出陷北下！抑姑

留逆孽，为彼交通地也？此失刑者一。二等仍拟缓决，如光时亨、周鍾猷下江南，妄觊首功，曷尝肯为须臾之待而仍以缓死纵之；何待于二贼厚而于先帝薄也！此失刑者二。三等拟赎绞，云只欠一死，非有他肠。如项煜等欲为李贼之管仲、魏征，是以子纠、建成视先帝矣；而云「无他肠」可乎？侯恂既负有封疆、从逆二罪，即宜加等；而反以后罪略前罪，是污伪转为减死之路矣。且赎徒只可赎杂犯，死罪徒非为此辈议。此失刑者三。四等拟赎戍如宋学显等，或是服辜；若渺法媚贼之梁兆阳，何示仅丽此款！岂钱神有灵，可使中兴无法耶！此失刑者四。至存疑另议一项内开：癸未庶吉士应副考功核别奏夺，据部疏前云何瑞征受伪，今可知；即有一二从他官□缓者，与京官何别！岂犹欲今日降调用之耶？徒开幸门，使济济臣工与李贼伪官同朝，辱莫大焉！此失刑者五。如已奉旨录用者，果其现□事任，尚可以后效责之。如巧立名目，今姑为免死之牌，旋且为□灰之籍；野心滑路，正未可保也。此失刑者六。每亦见彼保救伪节度使武愬者，未尝不俨然风化之堂，亦未尝一挂纠弹之口；遂敢冒清议为之，致使屡旨诘责，忽化褒嘉乎！换日移灰，可恃可骇！

！时河南等道御史亦言：『先帝死社稷，此千古来未有。举国翘首，望大司寇操此三尺先诛内贼，后讨外贼，为新朝兴复先声。乃推诿半年，夤缘百计；人人出脱，语语游移。当时请降、劝进、开城、献策、受伪、分符、提兵、追饷种种罪状，一笔□杀。借口在北者，以为声援；即缪奖窜归者，以为效顺。要知□来诸人乃贼弃之而来，原非弃贼而来。据学龙云「只欠一死，实无他肠」；夫从贼之肠，何肠也？而倘有甚焉者乎？学龙为此语，真别有肺肠者也。据学龙云「正法南还，何以处未归而降北者」；嗟嗟！敌寇岂终不□乎？方将尺组系颁□之阙下游魂，暂假何必借之比例。学龙为此语，何其轻天朝而小视中国也！据学龙云「或可不绝其归汉之路」。此辈当日在朝，不能为朝重；今日在北，亦不足为北重。纔之不来，正是投界有北。学龙为此语，何与若辈恋恋也！先是处刊「国变录」之吴邦策，已隐然为从贼诸人留一地步。嗣后援引唐家六等定罪故事，殊不思唐家六等为有君在，故宽臣以不死；今先帝在天，从逆之罪至无等也。只有诛之上可加，并无诛之下可减。乃议戍、议徒、议杖、议赎，简极重难掩、无法出脱者，则挂名北中；择在狱不赦、无法解免者，则缓决岁月。据学龙云「御□改元，春和祥集，为宜停刑」；独不思旧年先帝遇难，正春月也。为时几何，而学龙遽忘之乎！据学龙云「金作赎刑」。先是失陷封疆者许以纳金不死，已轻卖去江山矣；今又欲纳金许从贼者以不死，不又将以祖宗之法轻轻卖去乎？嗟嗟！贼在封疆，犹可言也；贼在朝堂，不可言也。司寇何官？乃以包天之胆，恣意舞文！端揆何地？乃以障天之手，昧心罔上！昔黄道周于杖母逆子，诵其文章义气；今学龙爱无君乱臣，惜其遭逢不偶：何声气连而议论合也！臣等誓不与贼俱坐，岂可与党从贼之学龙同列！乞敕部院、九卿、科道从公速鞫』。皆俞之。时诸臣欲去佥都郭维经，又欲去阁臣铎、尚书黄道周，故正题与借题并行。国弼疏，则副都杨维垣草；而河南等道疏，则府丞邹之麟代草也。惟吏科都张希夏纠疏，稍后遂为中书朱统■〈金类〉所纠。得旨：『姑不究』。

复吏部主事龚省矩原官。

省矩，崇祯时以选事为厂校罗织自尽，其妾亦同死；人皆冤之。

车驾迎皇考御容从大明门入，百官朝服侍班。

加原任大学士钱士升太子太保。

荫原任大学士丁绍轼、朱国祚各一子。

绍轼为内阁，曾与同官冯铨挟移怨冤杀熊廷弼；至今恨之。

起原任都察院左都御史唐世济，以原官管右都御史事。

先任者，为逐沾地也。时掌道张孙振贪横，目无堂官；文移且达吏部。或劝沾疏纠，以一去争之，于是名高；沾不能从。

丁未，御史沈宸荃疏荐原任给事中□周□、倪仁祜、原任御史徐殿臣等。章下吏部。

□以请建懿安皇后坊，仁祜、殿臣皆例推。是铨司以「复原官」拟「原任」，吏部徐石麟命寝之。

命吏部录用原任山东巡抚郭景昌。

即曩旨所谓「朕在藩邸闻而恶之」者，乃知非上意矣；同乡阁臣铎所票也。景昌后以荐赴北，降官参政。

给御史加太仆寺少卿张孙振三代诰命。

旧例：现任加衔，升任即停。孙振以御史加仆少，复援登极恩例以三品服供职。至是，蒙封三代，功司无敢驳者。

升太常卿葛寅亮大理寺卿。

革升任粮道陈亨职，梟书役李缙云等七人，俱没其家。

饷务主事苏观生言：『守松江留银不解，书役等作奸故也』。户部尚书张有誉言：『缙云等未经鞫问，岂无差别』！户科吴适亦言：『陈亨仁心洁履，人孚民望；请虚公勘明，忽一眚轻』。不听。

戊申，刑科都钱增疏劾张缙彦、时敏、苏京等。俞之。

疏言：『法不严，则无以塞乱臣贼〔子〕之胆；法不严且平，则又无以□乱臣贼子之舌。若身任中枢全城与殉难俱亏之张缙彦犹衔列司马、身厕言官，先后降贼之〔时〕敏、苏京犹名挂台省，夫枢督何任、谏官何职？若蒙面□颜，不立赐褫斥；则诸逆方囊头桎足就讯公庭，而此数人或高牙大纛、或纡紫扬青，犹作山望廷尉，彼何以服！乞皇上大震霆断，敕下法司：务将从逆诸犯确核严讯。至张缙彦等急须感奋图功，为赎罪计。倘复悠游玩□以致贼寇彼猖，貽君父忧，则罪并论，立膏斧钺；所当并敕法司明列案末，以观其后。功成，则宥罪；功不成，则正法可也』。疏奏，得旨：『使过诸臣如无实效，自有大法』。

督师大学士可法以弘光初元，请敬天法祖，任贤使能、节用爱人、勤政讲学，以资廓清。嘉纳之。

己酉，改工部主事熊人霖于吏部。

人霖，原任南兵部尚书明遇子也。先任久鸟令计处（？），□得为铨部始此。

修兴宗陵。

内臣移文工部，请易绿瓦为黄；故议修。

庚戌，御史刘光斗请汰衰庸、清仕路。下部议。

时八座之间，多有衰白。疏内所云「向人笑语，勉为鼓掌摇唇；归对妻孥，不觉筋衰力倦」。又言「既在班行之上，鸡皮鹄面，携手同行；将见田野之中，扶颠持危，接踵而至」：皆实录也。

赠南工部右侍郎张守道工部尚书，荫子。

命武臣自公侯伯而下，非赐肩舆，着遵祖制骑马；坐蟒、斗牛，非奉钦赐，不许僭用。其途次应回避衙门，俱照旧制。敢有□冥僭越的参治。

辛亥，监军侍讲卫胤文请罢设江北督师。不听。

疏言：『既有督师，又有提督、总督，一柄三操。不若去督师史可法，专用高起潜为提督；或用总督王永吉，令督师还朝』。又言：『张缙彦为北所迫，渡河而南，兵马无几；宜另用』。

加监军侍讲卫胤文兵部右侍郎，总督高杰所部经略开、归防剿军务。

准戎政尚书张国维归省，侍郎李希沆代署京营。

赠辽东巡抚丘禾嘉右副都御史、山东巡抚冯任右都御史，予荫、祭葬有差。

偏安排日事迹卷十

二月甲寅朔，赠刑死主事郑逢兰太仆寺卿，予祭；不准荫。

命北京锦衣卫各官逃回求改南者曾否从贼？不得轻题。

允内臣田成挑选淑女嘉兴、绍兴二府。

乙卯，命改思宗庙号，并议东宫、二王谥。

从工科都李清言也。疏言：『臣记泰昌初，曾拟神宗「恭宗」，以「恭」之取美名耳。但因晋、隋诸恭帝皆以逊位谥，则美反为疵，易「恭」而「神」，变之正也。若「思」之为谥，亦晋人谥亡国列禅者。一昏庸、一英明，异行同号，虽美亦疵。乞敕部酌议，或易庙号；或以「烈」为庙号，而谥另议。若谓明诏既颁，难于中改；则何不乘此东宫、二王将议成服，而以更议先帝庙号者并议东宫、二王谥，然后同诏海内，矫正前误盛举，亦往例也』。允之。

命京营整理兵马，亲统六师刻期西讨。

丙辰，升工科都李清大理寺寺丞。

升太仆卿王骥为都察院右佥都御史，巡抚湖广；高斗枢另用。

以斗枢在围城，不能遽出也。

升加衔文选司郎中刘应宾为太仆寺卿。

时兵部侍郎阮大铖意气轩骛，侵扰铨政，其门如市。辅臣士英稍和，然亦以铨部为奇货。或有未经考授，径补推知者；或有曾经补官、合入大选，而入急选以便掣签者。重以应宾卖官鬻爵，恃二人为墙壁，吏部尚书张捷画题而已。或夜榜大铖门曰：「闯贼无门，匹马横行天下；元凶有耳，一兀直犯神京」。其为人若此。恶应宾以郎中加衔常少不实补而越升，非旧典也。

补原任南御史徐复阳陕西道、御史陈以瑞河南道。

复阳、以瑞为御史时，曾连纠门户，致累累削夺；人皆尤之。

浙江巡盐御史李挺疏纠运使梁招孟。命会同抚、按察奏。

挺巡盐两浙，需求无厌，招孟勒票不与。挺怒，提书役。招孟入见，大口几饱以拳；挺错愕避之。疏纠招孟贪。挺亦寻为兵科钱源纠，人皆快之，独掌道（?）。

谥桂王曰「端」。

命宣谕臣王铎入阁。

铎当去辅高、姜在位时，内传与卫甚力。又力言蔡奕琛、张捷等不可用；每指其文，每语同志曰：『吾铮铮自树，则此集传；不则，覆瓶耳。誓不学周延儒、温体仁辈以贪奸贻吐也』。及奕琛等秉权，意稍折。至是，以票拟「从逆」为公所暗摘，御史刘光斗又倡言攻之；不得已，一日三往，兼见、兼调停于内。疏方留中，寻宣谕入阁。铎诗笔俱工，为人乐易可亲；凡票诸臣疏，皆「尔」之。一日，去辅姜曰广从容言曰：『外人以尔同内臣，呼如何』？铎大怒，曰：『书言尔有嘉谟、嘉猷入告。尔后于内，亦内臣耶』！是日，诸疏票「尔」者尤多。

丁巳，复吏部尚书张捷子伯骏原官。

伯骏，崇祯时为通政司经历；错买禁器，缘捷故重拟。至是，因杨维垣言复。

升原任山西佥事钱继登光禄寺少卿、尚宝司丞周瑞豹本司少卿。

行人朱统■〈金类〉疏攻江西巡按周灿，并及姜曰广、杨廷麟等。不问。

先是，统■〈金类〉疏纠曰广，牵及灿；灿疏辨，诋统■〈金类〉为谗夫异谤。统■〈金类〉怒，言『曰广诬圣德有七不可，又为九十七臣中之不花押者，何云谤』？又言『廷麟集兵谋为不轨，一以熊文举在虏，可以声援；一以曰广在上左右，可以内应；一以灿江西巡按，无敢发伏』。其语无赖。得旨：『不究』。

复原任编修吴孔嘉原官。

孔嘉父，为族人吴□春所害；故借魏忠贤以报，致挂「逆案」。论者以此原之。

准原任湖广巡抚王扬基冠带闲住。

赠南祭酒许士柔少詹，荫一子。

戊午，升工部右侍郎高倬刑部尚书，转吏部右侍郎□盟左侍郎，改户部右侍郎王志道吏部右侍郎；加兵部左侍郎阮大铖本部尚书兼都察院左副都御史，仍管巡阅江防。

升礼部郎中吴本泰尚宝司司丞。

吏科右陈燕翼疏陈中兴大义。从之。

疏言：『臣□见数月以来躁竞成风，廉耻道丧。士大夫辈但见得官为荣，而不以失义为辱。纔冠进贤，即希华要；既膺民社，复滥京銜。监司之迁转如流，危疆之督、抚递换。赞画、监纪，几半天下；而兵骄将悍，所传如故，且多分廐马之肥。玉围金翼，填咽巷衢；而跃马横戈，雅谢不能，只骤长呵驺之气。北遣疆臣，徒迢迢于河上；南归亡虏，且襁褓于新朝。书左尽由辟召，何数短薄、髡军；罪抚次第登坛，应尽孟明、曹沫。无例不破，有过皆仁。竟丧乱之后，而人材反多；抑不死之余，其动忍弥甚。尤可笑者，黄扉台长，凭阃外为去留；豸史绣衣，望江藩为负固。凌夷既极，长此安穷！抑臣近因覃恩滥及，而滋有慨焉！臣观今日请袭、请荫者章满公交车，必不肯纤毫挂欠朝廷，彼为子孙之谋则忠矣；而因此动念东宫、二王落处，实能为人子孙黎民之保者若何！移封、移赠者数期取盈，必不忍一念遗憾血属，彼为祖父之计则周矣；而因兴情一矫望天寿诸陵、先帝先后寝园幽閼，朝晡之脯糒者若何！平生歌舞，谁忆不归之人！华屋生存，罔道西川之路。平陵下士，一盂饭不忍忘恩；一朝握手，不替成说。从未有十七年来身所比肩逮事之旧主，一旦蒙难如彼其烈；而畴昔三九侍从恩渥诸臣，未久已度阁置之，不复较理。乃如之人负恩顽薄，而尚望其殚思毕志详事陛下者也！屈指旧恨忽三年，再逾数月，渐难提起。一时贤达，毋亦□□。是闭门讨官，聚头黥货；虽言言讨贼复仇，而事事坏法乱纪。譬如人家，父母有难，而其子弟、妯娌且相与较手泽、问田庄；一物不均，则相与诟谇凶讼，误以怒骂为痛哭。呜呼！远矣。今敌贼相持，胜负未决；中国之利，正在此时。行间将吏，不闻一筹一策，用间用奇。而但知张口向内，添官索饷；二十余年来用兵败道，踵习不瘥。今日在事诸臣，亦何须论同、论异，论彼、论此。但向西行画取一步，踏断闯逆之根；更向东来遥寄一盂，洒泪昌平之土。中兴奇男子，谁复过此！不然，要不免因时活计，偷取一切富贵已耳。跛眇相叹，庸有既乎』！疏奏，命部院亟行申饬。

内臣李国辅请开采云雾山。命会同抚、按勘奏。

户科吴适疏言七不便，且谓『正统年开采，故激成大盗邓茂七、叶宗留之乱』；然勘奏如故也。国辅时领勇卫营务；及奉命开采，士英以营务题授其次子署理。

庚申，准原任大理寺少卿詹兆恒在籍。

后北兵破福建，兆恒据开化县岭头山起兵，拒战于阵见害。

升御史李长春太仆寺少卿。

辛酉，隆平侯张拱日疏纠左佥都御史郭维经。命自行回奏。

维经居留都，久得民和；上□之。至是，府丞邹之麟涎金院席，与大铖等百计媒孽。适迎□恭皇帝御容，维经以病未出。越二日，见朝；遂唆拱日纠之，有「恭皇往为诸奸媒孽，维经不欲观兹盛典，犹去年姜曰广、张慎言不欲策立皇上」等语。□阁票议处云「必有所愿者」，御笔更也。

命戚臣世袭侯伯原非典例，以后不得滥请。

谥楚王华奎曰「贞」。

降营将袁诚一级。

以纵兵截饷也。

壬戌，出久推不至左给事中陈泰来等缺。

时户科右陆朗欲转左，言于吏科都张希夏疏请出缺。有旨责泰来等观望，命议处。内杨时化已任北，李如璧以蜀陷阻；惟汝燊不至。

命故官子孙陈乞年远无稽、品望不副者，不得一概蒙覆。

兵部主事蔡屏用请以节制之师省兵、以恭俭之规足饷。纳之。

癸亥，准顾其谦袭封镇远侯。

荫刘有锡锦衣卫千户。

以随皇太后驾也。

甲子，起降原任大理寺卿叶绍颺太仆寺卿。

绍颺，先以京察不谨处。

工科吴希哲请命各官自陈。允之。

时起用诸臣多耄，御史刘光斗请汰衰庸，则暗刺易应昌等；而希哲所云「筠心桂性，末境方饶」，则又为杨维垣、邹之麟解嘲也。

起升原任吏部员外郎陆康稷文选司郎中。

初，礼部郎中吴昌时拟调吏部，忌康稷同乡先辈，恐已起旧厄己，遂拟外转。至是，康稷疏言：『先帝甄铨曹时，已奉旨留用，特为昌时所阱』。命推补。

命修惠宗与先帝「实录」。

先是，工科都李清言：『今日修史何先？唯修先帝之「实录」而已。夫先帝历年十七而惠庙历载四，其「实录」易编耳。止言当时琪笔诸臣，摇手革除，于是化国书为乘，而子虚乌有皆佐笔端，则史彬「致身录」其最也。若非先臣吴宽集内载彬墓志甚详，而安知从王之说庸，又安知从亡数十人皆庸之亲。脱今日不举先帝「实录」亟行披辑，恐淆乱不止「致身录」矣。且此十七年间或黑白互淆、或玄黄逆战，墙辟坚于庙堂，而封疆之藩篱反玷；则逆闯之伺隙以入，止此为厉阶谓！宜早成是录昭来兹，俾千载后知咎有所归，而不至以故宫黍黎为宵衣旰食之圣主咎；则暴诸臣罪，正以扬先帝美也。臣所知者，惟旧辅蒋德璟精心时政，富于笔记；宜令汇集成编，表送史馆。而此外或采阁揭、或采部复、或广集台省诸谏草，仍遣词臣、行人数员分省搜辑；凡郡邑故集、诸名公卿副本，皆宜博致』。疏奏，部复从之。

再举考选，授林有本等科道、部属各官有差。

科七人：林有本、沈应旦、张利民、韩接祖、钱源、徐方来、庄则敬；道九人：黄锡衮、刘襄、郝锦、毕十臣、王大捷、夏继虞、郭贞一、王□、张屯罢。惟来集之以科、姜应龙以道俱抑部，而十臣、贞一又以部改道；皆阁臣士英意也。

谥皇太子慈烺曰「献愍」、永王慈焕曰「悼」、定王慈灿曰「哀」。

吏部议补行人胡麒生科员。不允。

麒生往附声气；至是，以原拟科员冀复旧拟，为户科都熊维典疏驳之。遂疏讼「逆案」冤，辨故辅温体仁诬至「堂堂言路，不容站足」。时阁臣奕琛与同邑，勿善也。御史郝锦疏言：『麒生以北闹关节革职，十二载并无考校礼科。今蒙皇恩还行人原职，乃得陇望蜀，异猾神钻；逢要路便作奴颜，觊美官可以弋获。或笑或骂，或泣或歌，面目总不由己，神情若在悬空。廉耻既无，官箴乌取』！疏奏，命吏部核议。

乙丑，浙江巡按彭遇颿请用辽将、招海军，为战守备。不许。

时虑其招致游移，生扰内地也。遇颿出都，多携劣衿粟监、破甑神弁，给以扎付同知、通判、推官、参将、守、把名色，许之召募，受贿不赀。又携家杭州，出入衙

門皆內戚也。

命汰衛所班運職操等軍，以餉銀濟軍需。

丙寅，准兵部右侍郎徐人龍回籍，准兵科陳子龍終養。

初為浙江官會訊蔡奕琛一案成獄，方向用側目，遂乞侍養歸。子龍後同吏部夏允彝等起兵抗北師及與吳勝兆謀，被緝；赴水死。

命倪嘉慶以戶科新銜察核錢糧，仍兼四品服俸。

遣禮部尚書黃道周祭告禹陵。

道周臨行，疏言：『唐室天寶之難，李、郭討賊，二十五月而復；廣明之難，鄭畋、李克用討賊，二十九月而復。若建中之難，李晟、渾瑊討賊，則不十八月復。所以然者，李晟、渾瑊用奇，郭子儀、鄭畋用正；人心之玩愒不同，盜賊之盛衰亦異也。今人心盈憤甚于往年，賊勢偷離亦逾曩日。今欲東收兗濟、北略漳河、西取應安，然後問洛陽之鐘簴、歸承德之松楸，上觀天壽；此曠日持久，其道良難。必如臣愚，得一沈鸞之將，簡士三萬、舂糧一日日（？）出贛榆韋橋，東踰破車，度歷胸、歷博興，直上鹽山、滄州；此間千四百里皆荒曠，如升墟邑，惟臨胸、安丘、樂安、陽信間稍有屯聚，可因糧而食，走七晝夜至武至清，渡白溝，出其不意，從天而下；雖有勁敵，望宣、大關門而遯耳。然後致陛下哀痛之意，祭告洒掃上十三陵，與長安士民拭淚而覲北廟。還分兩道：一下臨清，以收兗、濟；一下邯鄲，以取漳、衛。其用力甚少，奏功甚巨：此耿弇所發憤于祝阿、劉裕所歡呼于大岷也。燕都已奠，陵寢已安；然後修洛陽之鐘簴，歸承德之松楸，底定中原，如循襟領而扱衣帶，不為勞矣。必候寇賊蕩平，從容觀變，發東南以取西北，力殫于仰攻，志衰于畫守；薪胆之勤，不知更幾歲月！干元中和之勛，猶未可冀也。凡用兵如〔用〕藥，久頓則腐；用將如用□，久頓則銹。以銹汙之□付于鈍手、腐蛙之藥潰于下方，雖庖丁俞附，無以中其湊會矣。念春秋二時，閭巷黎老猶得登于丘壘，洒掃墳墓。至于禹陵三千餘載，猶蒙興朝□念，寵以太牢；而天壽諸陵，往年缺然。追憶往時謹從祀官驅趨瞻拜，能不悲！是臣所不獲已，發為東道出師、收復陵寢之說也』。

督輔可法請〔以〕高杰部將李本身為提督。不允。

杰既死，可法以杰前鋒部將李本身勇，請用為提督；朝議未許。未几，黃得功等疏至，云「閣臣不知是何肺肝，用杰部將為督」！目〔無〕督師矣。

靖南侯黃得功引兵還儀真；上遣內臣盧九德等諭之，乃斂兵。

得功衔杰不已，闻其死，引兵移仪真；名云备杰溃兵，实欲割地也。时杰寓扬诸将士一夕数惊；朝议恐杰部将之守开、归者顾家属还，致敌、寇乘隙，亟请九德等捧谕止之。得功奉诏，敛兵；人以为不远之复。

闯贼李自成被北兵所败，弃西安，走襄阳。

江督袁继咸疏：『为北败虽可喜，实可惧。北未及谋我者，闯在耳。闯贼既败，江南谁事长江！上下宜早为备』。总督王永吉亦言：『臣近闻西安已破，流贼败走汉中，不胜踊跃；继又不胜忧疑也！北乘虚击贼，所向披靡，其气必骄。向屡入内地，未逢敌手；今见国家新创，半年以来未能出门一步，其心必懈。懈与骄，皆犯兵家之忌。若简饶劲马步一枝，直走开、归，进窥曹、单，防其抄袭。以淮、扬为正兵，以骁劲马步二枝疾趋沂、济为奇兵；电击星驰，计日可复二城。若二城既复，兗、济、临、德遂成破竹。两军辐辏，联络犄角，攻其无备，必建□。盖当此内外凋匮时，须破〔釜〕沈舟，决一死斗。倘动欲万全求必胜之策，实无此策。臣不胜踊跃者，此也。若谓长河、长江未必真称天堑，一番挑激，彼必速来；殊不知敌方虎视中原，意欲并吞天下，特与逆贼相持，不暇倾巢压境耳。今西安破陷已真，敌既入陕、寇复入□，以□秦、晋、东、豫、荆、襄胡马进退自由，前无所牵、后无所掣，全副精神总在江南；纵不挑而激之，能保其不投鞭而问渡哉？臣不胜忧疑者，此也。乞敕下部议：如当决战，便须乘此机令速挑马步数万、备办粮饷，□道进兵；若兵马、钱粮不能应急，先宜固守，亦须处处坚牢、事事着实。防江者当代防河者筹□；河如长在，便可作江上藩篱。若从晋、豫上流渡过开、雒，则徐、碭、颍、亳俱是平原，安得有河可守？司饷当代司兵者焦劳，士马饱腾，则战气自然百倍。今长戍荒原，在在枵腹；一或溃决，更以何兵为守！昔齐人有「乘势待时」之说；今有势可乘、无时可待，过此以往，事变愈多，日益□乱矣』。初，永吉于十月遣游击贾以睪往京□侦探。至是归，称建州精骑尽往征闯，北直、山东一带皆空虚；故永吉及也。事竟寢。

命裁减九江额饷六万。

时阁臣士英、戎政阮大铖皆与江督袁继咸不协，责继咸缩兵就饷额；军中偶语起。继咸疏争之不得，力求罢；言『朝廷既不行臣言，又不放臣去，臣惟有以身死封疆；第如社稷大计何』！不允。

丁卯，住福建巡抚张肯堂俸，命剿贼自赎。巡按陆澄源候考核，调新升正詹郭之奇外任用。

明旨责其玩视地方，专构小隙也。之奇忽内、忽外，有同儿戏。

荫方孝孺〔裔孙〕树节翰林院五经博士，景清荫酌议。

言清虽忠于建文，然挟□犯蹕，得罪文皇故也。

予关陕殉难诸臣赠荫。

省城，则巡抚冯孔、按察使黄纲、长安知县吴从义、渭南知县杨瑄；商、雒，则道臣黄世清、蒲城知县朱一统；榆林，则右布政邱任、中部知县朱新□、原任总兵尤世威、侯世禄、侯拱极、王学书、王世钦、王世国、李昌龄、原任副将尤翟文、常怀德、李登龙、张癸、杨明、原任副将惠显、潘国俊、李国奇、原任游击孙贵、尤□昆、见任游击姬继新、陈二典、刘芳馨、刘廷杰、文经国、见任守备白任衡、李宗叙、见任守备左勉、惠渐、贺□雷、杨政玮、掌印指挥李文琨等；庆阳，则道臣段复兴、知府董玩；商州乡官，则原任吏部尚书南企仲、诰封副都御史朱崇德、原任巡抚焦源清、焦源溥、山东巡抚王道统、山西参政田时震、礼部主事南居业；蒲州乡官，则原任磁州道祀万龄；庆阳乡官，则原任太常寺少卿麻僖；咸宁县举人，则朱谊众。内都任尤世威，合门皆缢；而朱新一未配妾，亦投缢死。惟榆林以力抗，闯逆为所忿；城破，自指挥、千、百户及士民死者数万人，皆不可考矣。先是，御史霍达于崇祯末年旨未及复；至是再请，故恤。

赠甘肃巡抚汤道衡兵部右侍郎，加子遇世锦衣卫指挥僉事。

云剿虏功。

勒礼部尚书顾锡畴致仕。

御史张孙振疏其居官狼籍，持议偏僻也；内云：『温体仁在正地正色，小心七年如一日。先帝御谥「文忠」，而锡畴辄拟追削，逢迎门户。彼行与谥谬者，莫若矫诬三朝之孙慎行；而锡畴何不一驳耶！郑鄮忍心杖母，由慎行引入词馆；起用一日，联舟并进，震孟结为死□，倡和呼招。独体仁摘发，功在纲常，便可名曰「忠」。乃锡畴于郑鄮之死友则特谥之，而为先帝执法之臣则削之，何也？乞将锡畴□□削去滥谥，复还体仁谥』。疏奏，勒锡畴致仕。锡畴先以署铨议，为章正宸、熊汝霖纠；至是，□为孙振与何纶纠：两岐夹攻一人而已。

转姚思孝大理寺左少卿，升太常少卿沈胤培右少卿。

复监督剿寇太监□元斌、司礼太监王裕民原职，予祭葬，荫弟侄一人为锦衣卫指挥僉事。

元斌与卢九德尝督黄得功剿寇，又剿李青山于山东，颇有功。御史王孙蕃尝为州守，及选御史，劾其所部淫掠；先帝命逮之。斌疏辨，孙蕃复言：『疏未下科，斌何由知；应有漏泄禁中语者』。时上方怒漏传边报，乃并裕民下狱，死西市。至是，

雪。

戊辰，予北使兵部右侍郎左懋第母陈氏恤典，准录用原任吏部员〔外〕左懋泰。

时懋第久留北，欲授官，誓死不许；围守愈密。未几，又欲取懋泰至，授官；懋弟贻书力阻，惟命葬母，他不及。至是，督辅可法为请母恤典，兼录用懋泰。从之。懋泰当闯逆破京师，不能死；懋第卒，抗节死北。

予原任刑部左侍郎陈以闻祭葬。

以闻，先帝时察处为民。

准常沅袭封上饶王。

准御史李模在籍养病。

模见时事日非，故决意不出；人服其识。

己巳，复原任御史李嗣京官。

嗣京先为吴昌时所□被纠，议处。

河南巡抚越其杰乞休。不许。

责其以道臣简用、官至部堂，一味谄卸也。

庚午，加兵部员外耿章光尚宝司卿。

原任山西巡抚如杞子。

命更议皇考恭皇帝谥——从太常少卿张元始言也。

元始以「恭」为请禅主谥，请改「共」。

辛未，命有以缙绅、士民家产□媚镇将及宗藩、勋戚等家者，立正大法。

以高杰勒索巡抚朱一冯，故禁之。

以左谕德沈延嘉兼洗马，管司经局。升检讨赖垓右中允、原任庶吉士张星编修。

星，崇祯时以累闲住。后降北，为淮徐道。

予东平侯刘泽清弟源清谥「武节」，仍加祭。

源清，战死。

壬申，礼部尚书钱谦益疏修「国史」。

疏言：『万历中，阁臣陈于陞请修全史，开局纂修，旋即报罢。大抵官多，则拜除不一；人众，则考要难稽；文杂，则贯串无绪：古人所以有「头白汗青」之叹也。臣壮岁登朝，留心史事；三十余年挖扬讨论，差有头绪。昔宋臣司马光编修「历代通鉴」，以衰疾乞就冗官；前后六任，听以书局自随，给之禄秩，不责职业，卒能成书。臣愿比先例，即家开局；或书成径进、或按期缴纳，仍听阁臣总裁改定，奉诏颁行』。疏奏，命在任料理——谦益志也。谦益博览群书，尤精文学；搜罗考核，备极苦心。人亦以此服之。后国亡，史稿尽付绛云楼一炬，殊可痛也！

复已故闲住太仆寺卿徐景濂原官。

天启时，景濂为御史，以首驳「三案」，例转；时给事中王志道独是其言，具疏救之。后挂「逆案」，缘此。

起户部左侍郎吴光义原官，管右侍郎事。起凤督朱大典兵部右侍郎，升左佥都御史应昌工部右侍郎。

光义耄而温，为镇臣勒索所苦；故谋起以避之。

升苏松副使陈洪谥太仆寺少卿、广东佥事晏清尚宝司少卿。

洪谥为守，与松守方岳贡齐名；今始升。

予锦衣卫刘侨祭葬。

侨，天启年掌卫，以议狱不肯媚珰，罢。至是，以纠黄澍，故得优恤。

癸酉，升工科左利瓦伊樾本科都给事中。

准兵部尚书管左侍郎练国事解任——寻卒于京。

国事方正，有特操。与魏国公徐弘基先后卒，幸也。

撤高杰兵回，命广昌伯刘良佐赴防归德、总监高起潜驻扬州。

保国公朱国弼疏纠原任淮督路振飞。命部院看议复。

振飞督淮时，李逆方张。上扁舟河干，不纳，矢石载道；衔之。通政司杨维垣久戍淮安，振飞其梓里，待忽略；不快。至是，国弼纠其不法，且讦振飞「凤阳天子气」一语；未几，行人朱统■〈金类〉复纠之。俱命看议，盖迎合也。

日月赤——占者以为兵气。

户科吴适疏陈吏治五患，请严行厘饬。允之。

甲戌，进大学士蔡奕琛文渊阁大学士，荫子，给诰命。

赠吴士奇工部右侍郎，予荫。

授锦衣卫千户□祥指挥，子孙世袭千户。

以旧劳也。

乙亥，追封皇弟由桀颍王，谥「冲」。

.....

御史袁弘勋疏罪「三案」。命已之。

首及已故王之采、孙慎行、杨涟、左光斗、现存吴甡、郑三俊等，欲敕部院正罪，余附和诸人一并勘议。未及袁继咸，谓其公然祖述，倒身帖逆，罪甚；□将□案内诸奸并究。得旨：『事属已往，且经大赦，不必追论』。时阁臣士英富贵已极，惟包揽交□，思永固福祿而已。贪庸误国，不杀人者，士英也；贪奸误国，又思杀人者，阮大铖也。初，大铖里居时，欲与河南国子监生侯方域交；却之。适左良玉憚流贼逼，托言就饷南京；大铖以方域与良玉善，诬为内应。方域以书诮之，内云「执事伎机一动，长伏草莽则已；若复得志，必至杀尽天下以酬所宿恨」。至是验。

加督辅可法、总督王永吉、镇臣刘泽清、高杰衔各一级。

以邳州御敌功也。

丙子，复原任宣府巡抚沈槃原官，仍议恤。

崇禎時，槩私與北盟，為內臣王坤糾；故戍。

補原任吏部員外葛含馨考功司郎中。

為明歲大計地也。

准慈燾襲封崇王。

更上思宗烈皇帝廟號曰「毅宗」。

署禮部管紹寧疏言：『謚法、廟號不妨互相。如我朝有睿帝，又有睿宗；有仁祖，又有仁宗。況卜世無窮，嘉名有限』。詔用「毅」。

補李元功中府添注僉書。

元功便嬖故輔周延儒、溫體仁，曾挂彈文。至是，又為閣臣士英昵；人號「三相應天」。

贈死事武臣沈壽崇都督同知，子孫襲錦衣衛百戶一輩。

丁丑，贈死事知府王行儉光祿寺卿，予蔭、祭葬；潛山知縣李胤佳太仆寺少卿，蔭子。

升吏部郎中來方煒太仆少卿。

.....

吏部余揚、科馬加植、道高允茲、沈宸荃也。揚為阮大鍼所惡，言于吏部，勒令例轉。嘉植，南渡數疏頗錚錚；尚書張捷言其居北科時，與廖國遴等一行人也。允茲與宸荃，皆持議不附；時掌道張孫振惡之，故俱外。時孫振嗜賄，某御史面乞某羗屈二指；孫振以為二千，開顏諾之。次日，二百金至；忽對客大言曰：『若堂堂御史，賄差當糾』！某御史失聲色而走。

謚南京吏部侍郎顧起元「文莊」，蔭一子。

加升內臣韓贊周二級、李國輔一級。

以殫心營務也。□贊周性鯁直，在上前每多規切；及移疾私寓，士英等益无所憚。尚側目國輔，謀去之；屬所私以开采事□會往□國輔見科臣駁疏，請止其行，不听

。后赞周京城不守，自经死。

工科都利瓦伊樾请早建太庙。命工部议行。

命止滇、黔入援兵。

以乏饷故。

□宗室监纪朱蕴楸、朱繇荻为民。

以其诡卸危疆，入都与营也。

宁南侯左良玉疏救江督袁继咸等，言「要典」宜焚。谕解之。

初，继咸以江上兵薄，郑鸿逵兵船不还，须更造；檄九江道叶士彦于江流截买。士彦家芜湖，与诸商■〈目匿〉，缴檄不肯买。继咸以令不行，劾士彦；士彦同年御史黄耳鼎亦劾继咸，且谓继咸腹弃胡以宁劝良玉立他宗，良玉不从，盖欲开督镇交也。良玉先不拜监国诏；闻之，益疑畏，乃疏辨，并明与继咸无隙，诋耳鼎受指使；末又云：『臣读邸报，未见兵何如强、财何如理，惟曰门户、曰「三案」、曰「要典」。昔孔子作「春秋」而乱臣贼子惧，先帝焚典而乱臣贼子亦惧』。时攻继咸者遂谓与良玉唱和，胁制朝廷矣。继咸力诋士彦，屡疏不休；议者亦病其气盛。

戊寅，礼部主事吴景亶请开馆设局，纂修「三朝实录」。俞之。

其说祖「三朝要典」，附时趋也。

闯贼李自成兵至承天。

御史周昌晋补纠漏案杨汝成、宋之绳、曹溶等。命法司并核。

汝成以左都李沾至戚，故免议；纠汝成，意在沾也。

己卯，改浙江巡按彭遇颿于江北、江北巡按何纶于浙江。

遇颿至浙，所拥绅弁兵以千计，横甚，强市于民；民愬之，辄纵兵。众怒，群噪署前；遇颿出兵掩杀，死者七十余。事闻，故调；竟不之罪也。遇颿后降北，为漳州道。

准张承志袭封惠安伯。

命户部未还钱粮，仍责抚、按；不得滥委闲曹，以滥搔扰。

命□张拱日左府、孙维城右府、邓文尧前府，各本佥事。

庚辰，礼部失印，署印管绍宁具疏请罪。

御史张孙振请改元考察。下部院察例具奏。

时东林列仕藉者已同抱蔓，惟在籍未处；虽京察有期，不及待也。孙振坚握河南道印，欲俟京察方迁。刘光斗、袁弘勋以资深不得，皆恨。大约首除异己、继扫中立，终则自相蹄啮矣。

起升例转御史熊纪太仆寺少卿。

纪，万历间以察处王之案例转，累升至参政；皆不赴。

命「逆案」无得滥雪——从诚意伯刘孔昭言也。

孔昭言：『珰昭雪，专为阴行赞导，原无实迹者言耳。若献媚有据，岂应翻案』！从之。

准户科左罗万象在籍养病。

后北兵入江西，万象与左都鍾珪等五人至南京，皆自夸为孙之獬所旧，恳洪承畴题入朝。寻勒回；识者羞之。

补闲住兵科左虞廷陞吏科左给事中。

廷陞，逆珰时有「要典既成，粉饰宜息」一疏，挽救良苦。寻被珰削夺，且疏纠孙居相；而「逆案」中误谓「纠赵南星」，尤枉。至是雪。

壬午，〔□〕首辅士英太保、铎少傅，加署职方王期升太仆寺卿、员外耿章光尚宝司卿，余内外部科官加级有差。

以剪降贼渠程继孔也。

命部院看议左佥都郭维经——保国公朱国弼纠其庇逆也。

初，维经署大理寺，刑部以伪防御使武愆招送押，初未解审也。次日，疏上，维经

疏救之。至是，国弼言：『憊受伪命、伪印、伪牌票，何务何疑！维经救憊疏中已自吐未审，何以悬断无死法！且一则曰「可乎」、再则曰「可乎」，把持要挟，直辨其不可也』。又谓：『防御使印，当问甘受与否；淫奔之女已出奔矣，又何问其甘淫与否？执法之官，甘心庇逆；乞同憊逮讯』。命看议。

起升广东佥事水佳胤尚宝司司丞。

佳胤以讼「逆案」连察，故御史也（？）。

更铸各衙门印，去「南京」二字。

加赵怀民太子太保，荫一子世锦衣卫百户。

命「从逆」各犯及雷演祚一案着法司速行讯结——从吏科林有本言也。

疏言：『演祚不孝、不忠，宜早付一决』。

偏安排日事迹卷十一

三月甲申〔朔〕，上御经筵。

命勘议吏部主事夏允彝、文德翼——御史徐复阳所纠也。

两人以南渡草创，从「读礼」中补铨曹；然未抵任，非其罪也。吏部复二人能，降调。允之。后北兵破松江，允彝投水而死。

命看议御史陈潜夫。

吏科林有本言：『彭遇瓢藉持斧之势，作蛇豕之盟。其出都也，舳舻接于河干；其入浙也，妻子顿于境上。一辇金而入幕，即有兄弟之称；凡给扎而横行，尽为盗贼之状。近有自浙来者，述其满省北将、遍地札弁。或寄食编氓，或派饷巨室；明吞暗劫，辄云亲属。更可异者，去冬有「富强不费兵饷」一疏，题荐至四十七人；来历不明，踪迹诡秘』。且曰：『十七人外，更挟三十饥鹰，以资四十七人之择饥豹。浙民几何，堪此荼毒！宜乎以变告也。若陈潜夫以推官入贺，营改巡方；今又卸肩回道。旋丁父艰，半年司李，俨然读礼侍御。当日躡改，或冀其收拾两河尔。今效安在』？疏奏，止令陈潜夫看议；遇瓢不及也。

命议诸陵忌祭。

时诸陵帝后忌祭皆设孝陵，太常少卿张元始言：『本陵正祭仅八，而诸陵望祭至五十百一（？）。前饌未彻，后期踵至；纵横隧道之上，非所以严昭事也』。谓『凡遇忌辰，宜祇备牲醴，致祭于奉先殿。惟遇五节，则总设一坛，祔祭诸帝后于孝陵』。从之。

御史刘光斗补纠漏案吴邦臣，并及陈名夏、方允昌等。命一并提问。

疏言：『诸臣再迎西□，旅嗅北鞞；数月而两易冠裳，一身而三呈颐类。前途如此，后效可知；岂宜予以录用！至漏案吴邦臣等，宜敕谕诸臣各据确知，补牒入告。陈名夏窜迹他乡，方允昌逍遥故土；若纵而不缉，何以服在系之心』！疏奏，允之。

御史袁弘勋疏雪傅樾、高捷、史■〈范上土下〉、陈殷、张文郁等。

■〈范上土下〉按淮扬，贪，死狱、没产。殷、文郁，供工部主政，以三殿工超擢部堂、京卿，故旨云「不得轻议」。若樾，连纠左光斗、魏大中等虽过，然纠狎邪汪□言差快人意；况以纠逆瑄议，致服□后终。当世不虫，何云「逆案」！吏部尚

书张捷每声其枉，然不启、亦不雪。或曰先经杨维垣纠，意非许也。

原任大学士李标卒。

升吏科都张希夏太仆寺少卿、御史周昌晋太仆寺少卿。

希夏，后谋北刑科左，以被纠不果。

升兵科左罗志儒礼科都给事中。

志儒，后降北，为安庐道。

乙酉，升通政使杨维垣都察院左副都御史。

僧大悲伏诛。

大悲，屡经会讯，语言颠谬：『潞王施恩，百姓人人服之；该与他作正位』等语。御史高允兹未例转时，曾疏言：『大悲一案，其状似癫、似狂，其言如梦、如呓。先帝必无十二年封齐王之文，□王岂有十五年过镇江之事！且藩封贵重，寺人骄蹇；招内「潞王下位迎接与李承奉之叩首陪坐」，正不知有风影与否。至如申绍芳、钱谦益现在宫詹、卿贰，敢有异图？且此何等事，而议之孔圣庙耶！或令潞藩与李承奉并绍芳诸人明白回奏，以释群疑；或三审既明，即便正法，了此公案。伏乞皇上霆断！不然，葛藤不斩，弓蛇自疑，一波复作；起桐封之危疑，滋委巷之裨说，开□网之□端，可乎哉』？会谦益、绍芳各具疏辨，而上亦召对阁臣于内殿，皆请包荒以安反侧；遂诛大悲于市。时御史张孙振审词有「大悲本是神棍，故作疯僧；若有主使线索」。又云「岂是黎丘之鬼，或为专诸之雄」；语多挑激。非上宽仁，大狱兴矣。

丙戌，改詹事府尚书钱谦益礼部尚书、翰林院学〔士〕。

丁亥，命复故辅温体仁谥、荫；文震孟谥仍旧，不必议夺。

命皖抚归并应抚，屯抚改为凤督；王永吉带抚淮安，卫胤文兼抚徐、扬。

召勋臣朱国弼等、阁臣马士英等、翰林刘正宗等入见武英殿，面谕会同府部、九卿、科道辨验北来太子真伪。

先是，去年十二月间，有鸿胪少卿高梦箕仆木虎自北而南，中途遇一稚子，挟与偕。薄暮，解内衣，灿然龙也；惊询，谬云：『我王子』。既益狎，乃易语「太子」

。行抵京□，望孝陵，辄伏地哭。梦箕初犹疑，留与深语；每言及先帝、先后，则长号。又问『闯贼入宫，何以呼尔』？稚子涕泪交下，故作羞恨状；曰：『儿我』。闻娓娓宫中事，梦箕无以辨也；乃始信之。初，欲疏闻；继谓此先帝胤，出恐不免；密送杭州宅内。稚子至，益骄；每酣饮，则狂呼，间大言阔步。梦箕侄不能禁也，惧；书达梦箕。梦箕亦惧，命载送金华之浦江；然外人已啧啧矣。不得已，于正月疏闻；上亟遣内臣冯进朝追回，至绍兴方及。至是，奉上谕：『朕念先帝之子，即朕之子；若果系真东宫，朕尚无子，即□养他。但昨遣内臣李承芳、卢九德前去审视，回奏「面貌不对，语言闪烁」。卿等可会府部大小九卿、科道、旧日东宫讲读等官前去辨验』。时诸讲官刘正宗、李景廉等皆言「太子眉长于目；而北使兵部侍郎左懋第密疏至，亦言虏中有一太子。不知真伪」。询之西宫袁妃，妃曰：『太子有虎牙，脚下有痣。至是验之，无一合』。继问讲读何所？则误指「端敬」为文华殿；□问讲读先后？则误以先读为先讲。问『讲读既完，所写何字』？则误以「孝经」为诗句。问『字写几行』？则误以描摹十大字，自书小字于旁为「全写」。又问『当日讲读，曾问难数次？尚记忆几何』？曰：『不记』。又问『讲案上何物』？曰：『不知』。虽正宗、景廉，亦不识也。又兵科左戴英前，问以『崇祯十六年曾延鞫吴昌时，携皇太子于中左门，何事、何语』？又问『嘉定伯何姓、何名』？亦不能对。时众犹无言，惟阁臣铎大言曰：『假』！使退。未几，左都李沾同数人升阶，始□地乞怜；自云『王昺孙之明，非太子；为木虎所教』。手书付沾，遂据实奏闻。

上召对群臣。

即会审之午后也。上曰：『朕念先帝身殉社稷』，言出泪落，连拭不成语；继乃曰：『朕今日侧耳宫中，惟望卿等奏至。若果真，即迎入大内，仍为皇太子；谁知又不是』！慨伤久之。时左都李沾持「伪太子」手奏疏奏者再，上皆不愿言也。徐命取视，付法司再审。兵科左戴英疏言：『王之明虽系狡狴，然年力尚稚；必有大奸之尤，挟为奇货，将开群疑。凡宗藩之错居内地、督镇之分阃外藩，莫不喜谈乐道；别有一种锢废簪绅、横议处士，专意造言，不风且波。况业有假者在，则更不难文致。窃谓此狱宜稍需时日，使天下共见为假；毋速结顷刻，使天下妄意为真。即已付法司，而一切提防尤宜慎密。盖之明之来，必有群奸护至；计此时必潜伏犖犖，暗中探听。知计不行，又何顾一之明，不寻「灭」口之计。乞敕法司严之又严。若主使之人，务在根究必得，乃可昭示薄海』。疏奏，命法司审。

大学士可法请召回□巡抚、总督卫胤文（？）。命仍审。

戊子，革新推四川巡抚马千职，抚、按提问。

督辅应熊纠其淫掠不遵也。

命督辅王应熊以便宜行事；违节制者，用赐剑先斩后闻。

命滇抚移镇附近川界，出毕节、建昌两路；黔抚移镇遵、永，出綦江、纳溪两路；川陕总督规复保、顺二府，楚抚亟复荆州，郧抚扼守大宁、大昌、达州、东乡出路，沅督扼守平溪、四卫出路，广西协助贵州：并郧阳悉听督辅应熊节制，共图扫荡。

应熊疏言：『蜀之四境，西北与陕西之汉中州县相比，东北与郧、襄相比；而正东则出峡之路，抵夷陵、荆州矣；西南由建昌、毕节以入云南，正南由永宁、遵义以入贵州，东南由思南、镇远以抵辰、沅矣。今■〈寇，女代支〉据成都，已无子遗。若转而南向，则望腹于滇、于黔也。云南巡抚必移镇于附近川界适中之地，而命将率兵出建昌、毕节之两路；贵州巡抚必移镇遵、永之间，而命将率师出綦江、纳溪之两路。此在部议原题疏内，已具其概矣。议者谓李贼在陕，张贼必不北向。然目前李贼所遣马科自七月入蜀，虚喝保宁、顺庆官民而制之；一旦为张贼驱去，则张贼不畏陕■〈寇，女代支〉，亦可见矣。臣故议川陕总督臣樊一蘅宜提兵规复保、顺二府，牵贼北顾，使不得以全刀注于南；臣得据南边一路滇、黔之力，相机以捣其空。然无饷则无兵，又若无一、二堪任大将者，是以未即举也。贼若不能南、不能北，则仍趋夔、巫，未可料也。湖广抚臣宜恢复荆州，以控其东。郧阳抚臣宜守大昌、大宁、达州、东乡之出路，以控其东北。偏沅督、抚宜守沅州以上、平溪、四卫之出路，以控其东南。若贵州军力单薄，应以广西助之。郧阳抚臣所辖尽夔州之界，与川中事体极为关切；则广西、郧阳应许臣得节制，庶缓急可以呼应。臣尚未见敕书开载，不知臣于川陕总督、偏沅总督二臣各职掌何等？但一四川而有三督、抚，其体统号令所施行、将领兵饷所取用，必井然秩然；然后事权一而法纪明，事乃可办』。又言：『秦陇、巴蜀，天下之首也。李贼处秦、张贼处蜀，宜以全力注于此寇而徐议制敌。当李贼北犯时，空垒而往，西安城中贼不满千；若秦中豪右起而图之者，据咸阳、塞潼关，而吴三桂之兵、山西河南之兵急与之搏，贼穷无所归，当授首矣。纵之入关，使贼转生计；而我坐失机会，可惜也！然贼狼狈实甚，尚未即□。宜因此时厚集兵力于蒲坂，扼河东、拒商雒、守郧阳，使贼不得东；时时扬兵，示欲入关捣其虚牵制之，使贼不得西。向以重蜀中之毒独，命一面防陕■〈寇，女代支〉、一面制摇黄，而复竭力与张贼从事；此乃举天下所不能。当之毒尽注射于一□，岂得不以全力予之！若蒙皇上早赐百余万之饷、十四五万之兵以□此贼，则蜀事举而并力向陕，凡山西、河南、郧阳诸路亦并力西向，则陕■〈寇，女代支〉可□；而■〈寇，女代支〉平而敌可制矣』。疏奏，皆俞之。

己丑，命吏部严清选法。

一、推升必照俸荐；一、取选悉依次序；一、除授非边远危疆，不许破格；一、司务为九列首领、通判系牧民□位，不宜滥开事例，即行停正。已选者改授一□衔；职方佥事并内地监军赞画，即遵□可严汰。又以咨荐多属借题、广文滥及例贡，又

各官多有应入大选而混入急选者，悉宜禁。时吏部选郎陆康稷初任，颇加意剔厘。而阁臣奕琛曾掌选事，颇悉诸弊；故票拟详明，一时吏弊稍清。然劫于勋臣、内臣，不得自由者尚十之二、三也。曾有某部官巧营内臣求升徽州知府；康稷为叹愤累日，卒不敢违。

北兵至鄢城，又抵西平。

命非资深望重者，无得滥升京堂。

初，京卿一席，量许添注。至是，迭趾骈肩，朝班日增；故禁之。

赠工部侍郎林如楚工部尚书，停荫。

吏部请赠故山永巡抚陈祖苞兵部尚书。不允。

祖苞，先帝时以失机拟辟，寻毙狱；故不与东抚颜继祖等同戮。先以子词臣之遴疏辨，复官。至是，又请赠；不允。之遴后降北，复任侍读学士。

命黔省勤王兵赴督辅应熊军前，入川剿贼。

宁南侯左良玉遣使告急，命督臣何腾蛟等遏剿。

良玉疏言：『闯贼已过襄阳至承天，贼势急奔，敌势亦急迫；应剿贼，亦应防敌。臣兵合则多，分防则寡；乞刻发精兵，水陆会剿』。言甚危切。

命内臣乔尚总监两淮盐课，严察兵马、粮饷。

所携中军外，复有理刑锦衣千户；不知何制也。

撤浙江催粮饷、緞匹安乡伯勋卫张国材回京。

时清察尽孙元德，故撤之。

庚寅，升刑部右侍郎朱之臣兵部添设左侍郎、太常寺卿刘应宾通政使司通政使。

应宾后降北，为皖抚。

翰林院编修张星以寒食届期，请遥祭诸陵及先帝。命礼部议奏。

时城内外遍帖云：「端阳竞渡，吊屈原也；寒食禁烟，哀介子推也。三月十九为先帝、后銜愤宾天之日，攀髯莫及！吾辈各于郊外结社酬酒，以志哀恨」等语。太常少卿张元始感其言，因疏言：『皇上允词臣张星疏，拟于太平门外遥祭先帝。臣愚谓应另设一坛，并祭东宫、二王于侧。每年忌日，举以为常。且斯日何日也？三光蔽天、九庙堕地；诚与寻常忌辰不同』。谓『应敕天下，凡遇三月十九日，止音乐、禁屠宰，并停止嫁娶、各衙门轻重刑罚；一以志故宫黍离之叹，一以激中外同仇之愤。直待函逆闯首告先帝灵，而此禁始可弛也』。疏奏，命礼部并议。

辛卯，御史张兆熊疏陈致治去弊之法。允之。

疏言：『名器至重，岂可巧营！邇来辨复云兴，以设官专为使过之地；陈乞猬集，岂特恩徒开侥幸之门！甚而冗员猴冠载道，钦命狐假成风。今而后，核实而澄汰之，可乎？易名、祭荫，所以褒死劝生。何至人尽美谥，令千古之华袞不荣；家邀多荫，□一时之簪缨接踵。甚至「从逆」之子，亦得叙功；久朽之骨，犹希翻案。今而后，请核实而严斥之，可乎？陈言补□，所以竭诚尽职。自事权不一，因谤张而起。荐牍视为奇货，武弁亦操月旦；条议侈口知兵，子衿咸骗冠裳。今而后，请核实而殄绝之，可乎？天地生财，止有此数。邇来开采四出，山林恐滋伏莽之奸；催使分行，郡县徒苦供应之扰。今而后，请责抚、按以杜分扰，可乎？朝廷有一事，始设一事之官。今庶僚添，大僚亦添；少卿添，正卿亦添。公堂无座、职掌无关，何补匡济！今而后，议停止以杜滥觞，可乎？铨曹原称冰壶水镜，台省更号鸣凤神羊；若先含垢丛庇，何以程材指佞！邇来钱神过巧，大典不光。今而后，严申饬以杜幸进，可乎』？语多切中。

北兵至上蔡。

命五城等衙门緝讞言——从御史王懷言也。

懷疏言：『皇上斩百大悲，不如斩周鑑、雷演祚。二人者，妖所由兴也。夫真主既出，海内帖然。乃今日号称某王子、明日号称某皇后，甚有狂妄竖子希踵王郎故智，实由二人讥讪新政、造詈宫帷，故讞言繁兴。若不立斩二人，恐浸假鱼腹藏书、狐嗥丛野，乘间窃发』。末言『朱统■〈金类〉天潢一派，不忘王室；阮大铖帝心特简，矢忠图〔□〕；刘泽清作国长城，忧深肘腋』。人丑其言。后懷仕北，历升应抚。

壬申（？），命封疆失事诸臣不分存没，俱着法司分别议罪。

从户科沈应旦言也。

壬辰，升工科左吴希哲吏科都给事中。

升参政耿廷策都察院右佥都御史，巡抚四川。

革鸿胪少卿高梦箕职，命同王之明、木虎等集百官廷讯。

先三日，薄暮传旨：讯伪太子一案，限次日奏。左都李沾犹循例委御史，于是张孙振、何纶、夏继虞三御史登大理后堂先鞫——非体也。时虎新自杭城至，及见梦箕，猝被执；孙振搜其怀中，得梦箕侄成家书一封，内有「二月、三月往闽、往楚」等语。孙振遂挟为奇货，亟奏闻；乃命各官鞫之明于廷，官民俱得入视。甫讯，忽靖南侯黄得功提塘前，出所刊一疏；有「先帝子，即皇上子；若速处治，恐东宫诸臣即识，亦不敢出头取祸」。于是旁观惑。时得功疏犹未上也。

命三楚各有司如期征解，以济军需；违者，着太监何志孔参来重处。

初，志孔因御史黄澍，面纠阁臣士英。至是，反奉温纶，盖士英欲以此调停左良玉也。

命户部行浙直各督、抚严察所属有征漕粮本色上仓兼征折色者，参来重处。

荫孙昌祚、于国宝锦衣卫指挥佥事，季天培指挥同知；俱世袭。又荫田惟芝锦衣卫指挥佥事，世袭千户。

命礼部将伪太子王之明会审一案同东宫、二王谥号，速颁晓谕——从御史成友谦言也。

□兵至潜江口，马步甚众。

命内员屈尚忠、锦衣卫冯可宗鞫问童氏。

先有童氏自河南至，谬云帝元妃。刘良佐令妻往迎，叩其颠末云：『年三十六岁。十七岁入宫，册封为曹内监，时有东宫黄氏、西宫李氏。生子玉哥，寇乱不知所在。氏十四年生一子曰金哥，啗背为记；今在宁家庄』。语甚凿凿，良佐妻信之，跽拜如见后仪。良佐素怯妻，闻之亦信。童氏由此愈骄，凡所经郡邑，或有司供馈稍怠，辄詬詈，掀桌于地。间有望尘道左者，辄启帘，露半面；大言曰：『免』。闻者骇笑。至京，人以为僊；命送镇抚司鞫。初审云某；及刑拷，乃云周王妃，误闻周王作帝，故错认耳。说者谓不讯之禁内而拷之狱中，非体也。

癸巳，命考江南札委弁流，凡由兵部、督、抚给奸猾不才（？）与由他衙门滥给者，俱为民；不法者，拿究。

从工部杨兆升言也。

荫殉难修撰刘理顺、郎中成德一子入监；予世锦衣者另议。

先是，李邦华、王章已荫世金吾。至是，兵部为范景文、倪元璐等请旨，以为『诸臣多阁部大僚，谋国无能，致兹颠覆；先帝斩焉不祀，诸臣延世加恩，臣谊何安』！命另议。

命各镇屯田有效，比捷功优叙。

命户部严核锦衣卫冗役，以省糜饷。

旨谓：『祖宗朝文武廩禄，俱有定制；不应俸给外，又加公费。又该卫旗尉尽堪服役，不应每员更设跟役，致人冗糜饷』。锦衣卫冯可宗请募番役，亦不许。

晋南安伯郑芝龙宫衔，予银、币；郑芝豹等加升另有差。

甲午，罢加纳翰林院侍诏、典籍、五所经历等官，俱销归中书。

旨言两部开纳事例，须照顾国体、铨规故也。

乙未，准左佥都御史郭维经回籍。

工科右杨兆升纠太仆寺少卿钱元恂、万元吉等，御史刘勣疏纠尚宝司卿李之椿等。命吏部核议。

元吉拮据四镇，以劳称；纠之者过。之椿为吏部时，徐耀犹为龙溪令；谓夤缘耀入铨，误也。

荫内臣高尚义、刘进忠世锦衣千户，曹柱石等弟侄世百户。

御史黄锡衮疏参原任刑部尚书解学龙、兵部尚书张缙彦。诏勿问。

疏言：『学龙受梁兆阳数万金，以黄弊破板（？）；缙彦闻许定国杀高杰，单骑逃避：俱应提付法司』。报以「已有旨」。

丙申，刑科徐方来疏纠原任大学〔士〕吴甡、光禄寺卿许誉卿等。不闻。

疏言：『甡闻先帝之变，谓「失德失政，宜为亡国之主」。又因金光辰献三万金于

高杰，乞其疏荐。〔誉〕卿昔在科把持吏、兵，有「许子不惮烦」之诮。又娶名娼王微，听与旧狎游饮，为卖奸之正人君子』。人哂其言。

准总督仓场户部尚书贺世寿回籍。

工科吴希哲疏言：『世寿曾署刑部，勘问「从逆」；乃伊子王盛实以太仆寺丞受伪官，何以服「从逆」诸人之心』！疏奏，命法司察明。世寿缘此去。

赐掌翰林院曹勋银、帑，回籍守制。

御史郭贞一疏参通政司刘应宾。命自行回奏。

疏言：『应宾当先帝丙子年夤缘掌选，黷货无厌，降南礼曹。寻营躡南考功，又复谋转南玺秩；为御史刘熙祚所劾，先帝严旨罢斥。然钻刺之术，到老弥工；好利之迷，人言不恤。自其再燃灰烬、重握铨衡，〔有言〕其纵子及婿，招权纳贿者；有言其遇大选、急选，每日于杨中书家对银两者；有言其恩例副榜，拣择地方、考定危疆，依旧送监者；有言其前人之推补，未几扣除出缺，经手之题注已明，兜凭勒索者；有言其任子之声价未必皆芳，而多获名郡者。嗟嗟！设官分职，所以牧民。今其存者，不过江□数十县、瓯越诸省数百县而已。年有选、月有选、日有选，今皆以官爵行赂，其何瘳之有！非钱皆不可得官；非取之百姓，又不可得钱。螻蛄声闻，夜行有虎。哀此黔黎，腍羊坟首，何物可供乎大夫之求者！以货贿言之，窃贿为盗；以名器言之，盗器为奸。奸、盗之名为大凶德，固当籍家资以佐军需，投饔餼以御魑魅；又恶可司帝命之出纳乎！乞论赃正罪，以警墨吏』。疏奏，人皆快之。

命户部开局广集心计之臣，讲求屯、盐、漕三项，以资国用。

兵部主事陈震生疏陈时政。报闻。

疏言略曰：『撙节之道，当自君身始。宫殿差构各工，自宜暂缓。由此类推，宫中省一分之费，即河上受一分之惠。况今事例杂开，有前代行之而本朝从不踵举者，如榷酒酤之类是也；有本朝未行并前代未闻而创举〔者〕，如纳银准考之类是也。事例出于万不获已，复有增加；情急势穷，则大变将作。况中贵出而听用之冒滥者多，部务烦而奉差之驿骚者众。似宜清减，以省需求。臣历稽往牒，无不以轻役减赋兴、役繁税重亡；燃灯膏尽，其焰乃灭。夫民命，国之膏也』。数语皆切至。

戊戌，予礼部左侍郎赠尚书瞿景淳荫。

时已有旨「天启前诸臣不予荫」；以景淳文章、德业冠绝一时，特予之。

实授李希沆兵部左侍郎。

命总兵方国安扼防池口，以固上游。

总督张縉彦奏复南阳府。

命黄斌卿以原官挂「征蛮将军」印，镇守广西。

斌卿至是，一年五调矣。

复山西巡抚耿如杞原官。

初，如杞为职方时，党于兵部尚书张鹤鸣，力诋经略熊廷弼；人皆尤之。及以不拜魏珫生祠坐辟，风节矫〔□〕。后为晋抚，以北警入援，驻德胜门；而总兵张鸿功溃良乡，坐是同辟。故雪之。

己亥，徙崇王于福建福州府。

诸藩散处吴中者，俱别徙；礼部因崇王自请远徙，选差刑科都钱增奉敕奖谕，以风励各藩。

命颁先帝、东宫、二王及懿安皇后谥诏于天下。

懿安谥诏，至是始颁。礼部尚书钱谦益为诏云：『既慷慨以损躯，亦从容以就义』；得之矣。

更谥恭皇帝曰「孝皇帝」，颁诏天下。

命覆讯王之明等。

时三御史登大理寺堂，安圣旨于中；三法司与锦衣卫皆侧坐，御史坐稍后——前此未有也。指挥皆由张孙振；左都李沾虽堂官，无如之何。梦箕到，咸以甜言诱之明；以严刑加虎。然明旨所云『二月、三月』，所成何局？「往闽、往楚」，欲干何事？并指使附从，实繁有徒』数语，皆抵死不供也。先是，梦箕曾为史可法买硝磺，有欲借此陷可法者。至是，梦箕一无所及；惟口诎之明，仰天叹曰：『我为无赖子所误耳！然一念痴忠，天地可盐也』。乃以提高成等请。命该衙门将王之明加意护养，弗骤加刑；侯明告海内，然后正法。

庚子，起察处浙江右布政顾燕诏。

与察处原任兖州知府官继兰等，俱以不谨雪。

降御史郭贞一二级，调外。

刘应宾素与马士英、阮大铖等比，恐不处贞一，则言者猬起。至是，应宾疏辨，兼诋贞一营求考选，挟憾妄言；谪之。应宾侦知贞一疏出科臣吴适手，因恨适入骨；与大铖共图报复矣。贞一复出疏辨，右通政宗敦一拒不受。

追封故成国公朱纯臣舒城郡王——援英国公张辅封王例也。

初，毅宗闻城破，传朱谕至阁，命纯臣总督内外诸军，托以东宫。会阁臣俱出，遂留之案上；然纯臣不知也。已李自成入见之，故纯臣即日被杀。至是，忽命赠王，比之张辅；说者谓伊子元臣南甯议处，惧不得袭，故欲崇纯臣以自为地也。又赠镇远侯顾肇迹镇国公、永康侯徐锡登永国公、西宁侯宋裕德宁国公、定远侯邓文明淮国公、怀宁侯孙维藩怀国公，彭武伯杨崇猷、安乡伯张光灿俱赠侯。南和伯应袭方履太为南和伯、襄城勋卫锦衣千户李国祿为中军都督府僉事。外武定侯郭培民、阳武侯薛濂、宣城伯卫时春、清平伯吴遵周、新建伯王先通等五人以应袭者未至，侯另题；会国亡，不果。

命靖南侯黄得功移镇庐州，与广昌伯刘良佐合力拒北兵。

辛丑，准首辅士英辞太保銜。

命三品以上京官俱从公纠拾——从吏科都吴希哲请也。

江楚总督袁继咸疏辨袁弘勋。命专意防剿。

疏言：『顷接邸报，见台臣袁弘勋有疏追论「要典」三案侵及于臣。我神宗皇帝之慈爱，光宗皇帝、皇考恭皇帝之孝友，父子、兄弟欢然无间。前此诸臣虽风影传说，立论偏等；然皇上中兴□赦，海内嘉与维新。弘勋必欲□罗往事，锻炼深文；挑煽杀机，寻衅泉壤：掩君相宽和之盛美，伸一己报复之私臆。平旦自反，得无甚乎！总之，皇上所欲阐扬者，列圣之慈孝；弘勋所借攻击者，人臣之私仇。若非圣主覆载为心，门户株连之祸将又有不忍言者。臣始终愿皇上坚持圣志，采臣前疏；命诸臣〔□〕私斗而急公仇，无以有用精神，耗之无根口舌』。疏奏，人服其议正；然弘勋疏已不行，专意防剿可也。

升应安巡抚程世昌太常寺卿。

往例：巡抚无升太常者。因为民阮大铖先往，谓世昌不亲答而送刺，故恨。至是，

将重处；世昌托大铖媚救解，乃已。名升，实抑之；且为朱大典地也。

遣礼科左陈燕翼、行人韩元勋册封琉球。

进总兵刘洪起太子少傅，赏银、币。

以屡着战功也。

命严讯「从逆」各犯；未到与续参诸人俱严提。

壬寅，上祭先帝、先后于奉先殿，举哀。群臣皆祭太平门外，以东宫、二王祔祭。

时群臣多哭失声；诚意伯刘孔昭哭毕，昌言曰：『阻驾致先帝崩者，光时亨。今霜露已移，而视息犹存；何以慰在天之恫』！言已，各大哭。将散，阮大铖始传呼而至。督辅可法疏言：『臣闻去年三月十七日贼逼都城，先帝仰天长号，遶殿环走；拊胸顿足，叹息通宵，大呼「内外文武诸臣误我！误我」！仓皇召对，人人战栗无策，噤不发声。乃政事之堂，尚在讲门户、讲贿赂、讲起用报复、讲美缺危疆。大抵举朝之精神才力，总不出此数端；遂至酿成地坼天崩之变。嗟呼！为臣子者，尚忍言哉！臣待罪南枢，于义应死。其偷生以待者，亦谓徒死无益；不如捐□顶踵、僇力行间，生致贼渠献之阙下，然后一死明报耳。今受命讨贼已十月矣，经营不为不久、事权不为不专，费饷不为不多、用人不为不广；而心腹之忧转剧、指臂之运不灵，株守近畿，漫无远略。闯贼东逼，一矢未加。清夜扪心，恨不即死！因念「春秋」之法，凡贼不得、仇不复，则君不书「葬」、臣不除服。寝苦枕戈，无时而终。且于未能复仇之臣子，深加贬绝，一书、再书不讳。诚恐久之，则玩为常事安之，则无复愤心耳。且载观于书宰纠一例，则责相尤严；于四年、七年缺书二时，则责大司马倍凜。臣谬以相而兼掌大司马职者也，圣人于宰纠既降书其名氏，今微臣敢复列于冠裳！在天时尚径削其秋、冬，在帅师敢仍存其爵位！所以者，明大仇一日未讨，则为臣子者一刻难容于天地间。今日首先伏罪以谢天下，非臣谁责！伏愿皇上重处微臣，以为榜样；一面明布大义、弘张天讨，务期扫清气秽、复神州，庶强敌、逆■〈寇，女代支〉不至笑中国为苟安，而轻朝廷为无人也。臣草疏甫毕，哀痛不胜！溯流穷源，因致追诸臣误国之事非一，而「门户」二字实为祸首。从门户，生畛域；从畛域，生恩怨、生攻击。所以「春秋」之始，首严「朋党」之诛；而门〔户〕之名，竟结燕都之局！诚问山陵安在？先帝、后梓宫安在？血胤安在？犹暇争论闲是、闲非，择取孰利、孰害哉！覆辙在前，可为殷盐。伏愿皇上申戒诸臣：毋讲门户、讲贿赂、〔讲〕起用报复、讲美缺危疆，合内外文武大小臣子一心，专讲「春秋」复仇之大义。若此后文臣犹爱钱、武臣犹惜死，睚眦必报、鬼蜮为奸，将天道必为降亡而国家亦难曲贷矣』。

癸卯，升应天府丞邹之麟都察院左佥都御史。

吏部〔□〕江督袁继咸刑部右侍郎，不允；以陪推原任浙江巡抚罗汝元为右侍郎。

时疑继咸比左良玉，屡疏与时局抗；托为「均劳逸」之言，欲移之内——盖将伺其入而甘心也。上不允。越数日，再推户部侍郎，终不允；遂用汝元。汝元先抚浙江，海贼刘香为乱，失机，处。

东平伯刘泽清奏李明睿自北归。

明睿当闯逆入都，曾被夹；后仕北，为礼部左侍郎。其谥先帝「怀宗端皇帝」备十六字，又谥周后「端皇后」，皆所拟也。已以谴逐，遂泛海南归；疏中所言「闯败后，北逼勒入朝。见小酋不拜，几被杀；幸乘间渡海逃归」者，皆饬词也。既抵南都，与同志阮大铖等酬饮城外数日，竟不入觐；识者非之。泽清疏言：『明睿不附声气，乃自北而南；陈名夏素附声气，自南而北』。遂奉旨察奏。时名夏入北，已为吏部右侍郎。

加湖广巡抚王骥提督军务，兼理粮储。

命三法司覆审王之明等。

高成已自杭郡解至，复严刑鞫；所言闽、楚含糊而已。回奏，命再讯；梦箕惟请死。是日，梦箕与之明始刑。时上恐诸镇心疑，命其提塘官潘茂斌等随审。又命旧东宫伴读太监邱执中往认；之明见执中，亦不识也。于是群疑稍解。然御史张孙振等犹持闽、楚语甚坚；独大理寺卿葛寅亮密言曰：『公等度朝廷兵力，能声左良玉、郑芝龙之罪而制其死命乎！若其供也含忍，则无法搜剔，则激变耳』。孙振等始微悟，言之阁臣士英。自此，不复究矣。初，刑部尚书高倬拟稿，必请正院寺，三御史亦往；独孙振纵笔涂抹，手自为稿入告，皆其拟也。

命兵部着镇臣黄得功提塘官将得功原疏立毁，以绝奸煽；敢有仍前伪言者，兵部擒拏正法——户部侍郎何楷言也。

初，王之明以伪太子至，楷同验。时见阮大铖等轩骍状，密语工科都李清曰：『若辈目无人主矣！太子至，其惧而少戢乎，犹清流幸也』。至是，实见之明贻，方请毁得功刊疏。刑科都钱增亦言「十恶之条，莫大于无将；参听之法，莫愤于朝审。初看验于卫臣私寓，则之明之诈冒已炳；再会审于卫司法堂，则梦箕之□导愈彰。手书现存，百喙难解！今读圣谕云：「朕痛念先帝身殉社稷，血胤犹存，当体天地祖宗之心，加意抚养」。仁哉，圣心乎！若果系先帝青宫，相见一堂，其执手抱头、一言泣数行下者，不知如何酸感官府！梦箕欲远送僻远为存活计，是诚何心哉！「明视朕为残忍寡恩之主」，斯论一出，梦箕何地可以自容！律以国法，立刑何辞！乃皇上犹以为一日成案，不如千秋信史为确也；文武大小诸臣之质审，不如薄海

内外愚夫愚妇之传颂为公也。兹既公矣、既确矣，臣愚谓之明犹可贷须臾之死，而梦箕断难偷一刻之生。今试再诘梦箕：如果系东宫，便当奏闻朝廷，安顿抚养；如何要送僻远所在？跪诵天言，更于何处饶舌，惟有点额耳。且自梦箕阴谋败，而一番讯奏则一番诏谕，虽石顽豕蠢，亦当频聆慈爱圣谕，而恍若有醒；况在血气心知之伦，能无感动！伏冀敕下法司刻期定案，尽斩葛藤；再传示阁部诸臣，亟行汇录宣付史馆，仍镂板成帙，颁布海内』。皆从之。

甲辰，封黄九鼎雒中伯，加黄金鼎都督同知。

俱故后戚也。

宁南侯左良玉再遣使告急，命袁继咸整搦兵〔□〕，相机应接；仍诏黄得功、刘良佐并应、皖二抚俱戒严，以候调遣。

时闯贼离襄阳至潜江渡口，离省仅四百里；左营游击韩反接见两岸中流皆贼，马步走回先桃镇。良玉恐犯武昌，乞亟发各路援兵合剿；益以不支矣。

乙巳，再叙殿工，加督辅可法太师、首辅士英太保、次辅铎少保；又加旧辅弘图、曰广各太子太傅，工部尚书何应瑞少保。余部、科加级俸有差；内官韩赞周等俱各赏银、币不等。

祭惠宗孝愍皇后及太子、诸王于兴宗陵。

以太庙未建，又奉先殿不设位，故帝后皆祔祭于陵。二百余年，一祭而已。

存问原任南户部尚书于仕廉——诚意伯刘孔昭请之也。

仕廉在籍，至不能举火。

丙午，复故辅温体仁官阶，并议雪故辅薛国观等。

从兵科左戴英言也。国观性粗悻，与门户相仇；故为吴昌时所阱。然无黷声，追脏则过。会国亡，不果雪。

加兵部右侍郎朱大典尚书兼都察院右副都御史，巡抚应、安等处地方——后北兵破金华，大典自焚。

命工部勒限造奉先殿琉璃瓦。

命以王之明、童氏二案「审明略节」宣布中外。

初，二事纷纷，人皆言上之薄，阁臣为内臣之奉迎。至是，刘良佐复言之；有「太子先帝遗血、童氏皇上宫闱所系，谨涕泣保留」等语。旨言：『朕前后黄，早夭；继妃李，殉难：俱经追谥。且朕先为郡王，何有东、西二宫！至先帝与朕，初无嫌隙；岂有利天下心，害其血胤！但太祖天潢、先帝遗体，不可以异姓顽童溷乱；宫闱风化所关，岂容妖妇阑入』！因命法司以「略节」播告。时上慈寡断，内外群小日横，致流言喧民间。故一太子至，皆喜。而二、三民望言足征信如高弘图、徐石麟、刘宗周辈又无立朝者，故愈辨疑。上不得已，发士英留中疏昭示臣民——盖初闻太子至，议保全语也。然亦无信者。

丁未，准罪废诸臣输银复官。

北兵破归德，巡按御史凌駟及其侄润生死之。

初，駟不肯附闯，倡义临清，复东昌一府。北兵破闯，授□科。駟伺间南归，授御史。初按东省，已非我有；再改按豫。抵任未一月，叛贼许定国、李际遇等已勾北兵抵归德；群官皆迎降，独駟不出，欲饮毒。北帅宣言「不生致凌御史，屠城」！駟叹曰：『与〔□■〕〈定〉慷慨而殃及小民，何如从容而善全大节』！遂单骑往见；侄润生，亦义形于色，执轡相从。北帅谕之降，誓不许；拘于别幕。駟慨然谓润生曰：『吾与若艰危备历，犹欲据此一块土，为江南藩篱。今已矣』！乃遗书北帅，言「节不可屈、武不可黷；宜敛兵江上，画为南北。不尔，当素车白马，飞□涛以击尔辈」！复作绝命辞百余言，与润生同缢。北帅曰：『忠臣也』！礼葬之。而府、道两官之降者，皆以「不忠」被劾。润生儒服从戎，人尤义之。寻命优恤；以国亡，不果。

戊申，左良玉举兵反武昌。

先是，江督袁继咸密遗户部侍郎何楷、户科倪嘉庆等书，言『良玉势成畸重，宠溢不骄；贤者所难。朝廷宜稍加督、抚权，示相维势』。二人言之当事，漠然也。至是，因为太子一案喧传楚地，有言蓟国公吴三桂送太子于史可法，可法又转送兴善寺者；有言上遣二监韩赞周、卢九德往识认，见帅叩头，独马士英往视以为伪者；又有言旧讲僚方拱干出叹息声，几得罪者。然可法实无此事；而士英则偕诸臣视，非视；若拱干，又士英遗书阮大铖自苏州召验，亦未以叹得罪也。良玉闻之疑；疏言：『此事未可决于二、三左右，应决于国人天下，使太子不失主封、皇上不失至德、群臣不失忠荃』等语。及再疏，至乃云「束身赴国，代太子受罪」。虽录讯词以示，疑自若也。迨下锦衣卫刑鞫，穷诘之楚、之闽状；中外竞骇，谓大狱将起。时黄澍在楚，心衔士英；而良玉诸部将又畏闯逼：力赞良玉反。遂借太子为名，焚武昌东下。

户科王鏞疏纠工部右侍郎易应昌、太仆寺卿杨公翰。命已之。

应昌，素负輿望；至是耄矣，□郊外。户科戴英纠之，不辨，亦不抵任。至是，为王鏞所纠；次日，遂谢恩，亦不辨。人以为凤德之衰。

命军机重大事情，方从文书房封进；余仍由通政司。

命礼部将各藩散处浙直者，俱另议他徙；其藩禄额数，并酌定具奏。

命总兵方国安挂「镇南将军」印。

命户部将催餉各官郭符甲等即尽行撤回；其催漕者，一并察裁。

盖虑其扰民也。惟督铜官纪腾蛟等暂留；仍令该抚、按察其有无骚扰，俟差竣奏夺。

御史刘勣疏纠在狱光时亨等。命速行问结。

疏言：『臣捧读「大仇未复，无涕可挥」之旨，知皇上创巨痛深，志坚恢复。而今疆场之事，日复一日；履不及于窒皇、车不及于蒲胥，宫阙及腥，二东望绝。以申包疾号之师，蹈高克翱翔之辙。臣恐朝气日销，兵日惰、饷日虚、器械日顿，羸马日损；倘能阅岁时，老师匮财，何以匡复！主封疆使过自赎之臣，失之东隅，则当收之桑榆。前者弃甲而来，不问丹漆；今则交绥而止，率彼虎兕。若复兵不先入、功不立奏，以赎罪为藏死之地：畏首畏尾，身其余几！毫厘呼吸，时不再来！此臣所以痛念复仇，愿效他山也。抑臣尤有追恨焉。先帝廷议南迁，阁臣将行而光时亨力阻，不果；乃先帝以尧、舜之资议，作太王之避固，有恫乎不得已者。阻之，诚是也；然天崩地坼，血漚满宫；衣剑□聚，曾无正寝。而时亨不肯以一死谢先帝，星移物换，罪人未诛；在天之灵，目将不瞑。况今山陵未扫，一望陆沈；抚今思昔，泪尽继血。乞敕封疆诸臣奋力同仇，日切先鞭之思；使过诸臣斧钺在颈，宜切后时之惧。并严谕法司明刑饬法，立正逋诛之典』。疏奏，俞之。时诸臣皆以阻迁罪时亨，独勣不罪其阻迁而罪其不以一死谢阻迁，洵平论也。

命吏部将京职五品以下官员，照嘉靖、万历元年例会官考察。

时虏、寇交迫，国已累卵。部院犹徇御史张孙振言，以京察请。东平侯刘泽清疏请已之。报闻。

安远侯柳祚昌举原任尚宝司丞范凤翼等。章下所司。

凤翼与礼部尚书钱谦益善，欲与起用，吏部尚书徐石麟寝之。至是，又以祚昌疏荐。

命于次月初二日辰时颁毅宗皇帝、孝皇帝及东宫、二王谥诏。

督辅可法疏诸臣亟化朋党，共图征讨大计。俞之。

疏言：『属者天方降劫，遭兹凶。真主中兴启运，经纶裕于草昧；多难易以兴谊，海宇欣欣想观盛治。乃历时七月，徒烦宵旰殷忧，未有廓清胜着。今北使言旋，敌兵踵至，和议已断断无成矣。向以全力图寇而不足者，今复分以御敌矣。际此时艰，忧心欲绝。然历观往代衰亡，莫不因和自误。今敌之拒我，正我所以自奋与天所以成我之时；特在人心一转耳。从来中兴大业，不外于君臣一德、内外一心；当此危急存亡之时，可无同舟共济之谊！臣尝慨唐、宋门户之祸，竟与国运相终！即使所用皆才，已废却一半。况以意气相激，化成恩仇；恩怨一生，酿成杀运。近年之事，殊堪痛心！今时极艰危，为臣不易。官之久者，其负罪益深；位之尊者，其得祸〔更〕惨！有心之士，方以此为危身积戾之场；而无识之人，乃以此为快意寻仇之计。即使藏怒宿怨，孰有深于戕我君父、覆我邦家者！不此之仇，而犹修睚眦之微嫌，快升沈于转毂；此之谓「不知类」矣。谓宜虚心平气，还之大同。何人实是干济之才？何人实是清修之品？无寻题目而开媒孽之端、无捕风影而肆株连之网，务得海内真正才品，举而置之均衡；中朝之举措咸宜，阉外之嫌疑自化：此臣所望于庙堂之同心者也。昔唐室嗣兴则有若李、郭，宋家再造时则有若刘、岳、张、韩：极其勋名，悉垂天壤。今之藩镇，何多让焉！若当患已剥肤，尚以贼贻君父，諄非诸镇所忍出也。然大将所定者惟志，三军所鼓者惟气。志不齐一、气不奋扬，虽赍育之雄、如林之众，莫能用也。试思之先帝之待诸镇，何等厚恩？皇上之封诸镇，何等隆遇？先帝之罹贼难，何等惨苦？诸镇之不能救先帝于难，何等罪过！释此不问，自弄干戈；是犹舍父母之仇、寻乡邻斗也，忍乎？今和敌不成，惟有言战；战非诸镇之事，谁事？必皆以皇上复仇雪耻为心，简乃车徒、穀乃甲冑，朝营夕算，惟敌是图。其未至也，何以伐其深谋？其既来也，何以御于河上？某所当者危地，而我必急以往援；某所争者小嫌，而我必先以大义。田单报燕之日，将军有死之心、士卒无生之气；廉、蔺刎颈而定交，子仪〔释〕恨而泣拜：诸镇岂不闻乎？此臣所望于阉外之同心者也。然阉外所视者庙堂，庙堂所视者主德。我皇上中兴未就，大仇在身；凡一举念、一图事，二祖列宗盐之，恭皇帝、烈皇帝盐之！尤望深思痛愤，大涣纶音；谕诸臣以怡堂必不可安、积习必不可狃。□此敌谋叵测、我武未扬，在内宜实筹兵饷，以卧薪尝胆为生机；在外宜力捍封疆，以江北、中州为死所。古人有言：「不本人情，何由兴复」！今之人情已大可见，拨乱为治、转弱为强，在我皇上一振厉间耳』。

命法司行所在抚、按严缉原任总督侯恂及其子方夏——从东平侯刘泽清请也。

疏言：恂巨贪漏网，降贼逋诛；复令伊子方夏交通于己，重贿夤缘。故命并缉之。

户科张利民疏纠给事中时敏。命缓之。

旨言「候兴屯不效，议罪」。

御史王大捷疏纠原任郧抚陈睿谟、楚抚王聚奎、沅抚李干德。命寝具奏。

旨言：『睿谟、聚奎□荆州失陷时尚未抵任，干德现理饷；俱不必深求』。

己酉，升光禄少卿钱继登都察院右佥都御史，总理两淮盐法，兼督江防军务。罢巡盐御史。

营大善殿。

晋黔国公沐天波宫衔二级，仍荫子入监。

左良玉疏纠总兵方国安。谕解之。

时国安侧身阁臣士英，每至京，辄酣饮其第。至是，良玉奏其假己旗号，力攻之；盖欲借为兵端也。

命严汰各督镇监军、监纪等官，以后不许妄题。

赠兴平伯高杰太子太保，荫一子世锦衣百户。

工部尚书何应瑞请加派钱粮，以资浚河。不允。

旨谓一经加派，便相沿为额，祇供官胥侵蠹故也。

庚戌，补考选黄端伯礼部仪制司主事。

赠光禄寺卿史弼工部右侍郎，荫子。

命大理寺左丞李清祭南镇、光禄寺卿王应宁祭南海。

礼科都罗志儒请定毅宗陵名。命礼部酌议。

时志儒商之大理左寺丞李清；清曰：『既改新庙号，宜以故庙号名陵曰〔思〕陵』

。志儒是之。

辛亥，赠故辅李标少傅，荫子尚宝司丞，命予谥。

以国亡，不果。

复原任御史刘呈瑞原官，补广东道——刑科徐方来所荐也。

呈瑞，崇祯时巡按顺天；以北兵入，削籍。

升太常少卿张作楫光禄寺卿；王应宾太常寺卿，提督四夷馆。

作楫后降北，为光禄署丞。

命台省疏荐诸臣须加严核，不得滥行添注。

御史陈以瑞疏言：『故辅温体仁之清忠，与周延儒悬殊。即当天启朝故辅魏广微亦自矫矫，因逆珰逮杨涟诸臣于诏狱，独揭球珰怨，拂衣去；亦岂得与卑秽顾秉谦同日而语』。疏末，又荐黄承吴、陈献策、郭必昌等。故奉旨严核。初，以瑞当天启时，攻门户甚力。御史张孙振欲俟其至，畀以掌道。至是，对御史乔可聘深悔其过，孙振噤纠，皆不应怒而止。

壬子，准督辅可法辞免太师。

命廷试贡生仍分送国子监，不得沿崇祯例授官。

命设官苏松海口，以收洋税。

阁臣士英所请也。

荫左良玉一子世锦衣。

荫丘越一子世锦衣指挥僉事。

北兵破颍州太和县。

升都督方国安一级，荫一子世锦衣千户。

士英署兵部篆，视金吾不及敝裤；滥请者甚众，不能枚举也。国安，为士英私人。

加李本身太子太保、左都督。

以北警频闻，命督辅可法驰扼徐、泗。

偏安排日事迹卷十二

四月癸丑朔，革御史王孙蕃职为民，刘宪章法司提问。

给死难诸臣申佳胤等三代诰命。

减临淮侯李祖述禄三之一，以祖券免死。罚朱元臣俸二年。

加淮宁侯孙维城太子太傅、襄卫伯常应俊太子太保；应俊仍荫子。

准高杰子元爵袭封兴平伯。

卫胤文欲联高营心，故请也。

命严缉「从逆」侯恂。

刘泽清纠其遣子求解、重贿夤缘故也。

杖犯人詹有道一百，仍立枷三月。

以擅闯宫门，口出秽言。

革锦衣卫佥书赵世臣职，掌班等提究。

时佥书等官准状拘人，兼以人役诈骗，先有旨诘掌锦衣卫冯可宗。至是，世臣复准状，故纠之。

丙辰，惠安伯张承志疏纠文选司郎中陆康稷。诘责之。

康稷掌铨公执；勋臣干请不遂，嗾承志纠，语甚（？）。

命兵科左吴适回奏。

先，勋臣杨鹗撤回，适荐鹗可仍抚荆兼督黔、蜀；有「闻与镇臣良玉慷慨同仇，共矢夹辅」语，遂辅臣奕琛票旨「回奏」。时传良玉已反故也。

准徐允爵袭封魏国公。

左良玉兵破九江。是夜，死。

时江督袁继咸闻闯贼南渡，恐由岳犯长沙，则袁、吉危；乃以邓林奇、郝效忠、陈麟三将守九江，自统副将汪硕画、李士元等据袁、吉，已登舟矣。闻良玉反，复旋九江，移诸将家入城，系兵心；诸将列兵城外，拒战。九江士民环集，言「众寡十不及三，激之祸不测；不若俟良玉至，谕以理。诸将敛兵入守，相机而行」。继咸曰：『入城示弱，不可』。乃逆弃郝效忠则已不待命，随家口先入矣。良玉舟抵北岸，书言「愿握手一别，为皇太子死」；九江士民泣请继咸往，纾一方难。继咸曰：『宁南语虽顺，举动与前殊；往必堕计』！士民请益坚，遂同监纪余有灏会良玉于舟中。良玉言及太子下狱事，大哭。次日，舟移南岸；继咸以良玉入城不便，同各镇以单骑往。良玉袖出皇太子密谕，劫诸将盟；继咸正色曰：『密谕从何来？先帝旧德不可忘，今上新恩亦不可负』！良玉恚。有灏阴蹑继咸足，遂不复言；与良王成宾主礼别，约不破城。继咸归，集诸将城楼，洒泣曰：『兵谏非正，晋阳之甲，「春秋」所恶；可同乱乎！已说宁南易檄为疏，屯扎候旨矣』。时继咸方约诸将坚守，而效忠先阴与良玉约部将张世勋——又故与良玉部将张国桂善，潜吊其兵，夜入城纵火，世勋与效忠遂夜半劈门出；诸将惧罪，俱出城与良玉营合。良玉兵入城，杀掠妇女，财物俱席卷去。继咸正冠带，将就死；黄澍入署拜，泣曰：『宁南无异图，公以死激成之，大事去矣』！副将李士春密曰：『隐忍到前途，王阳明之事可图也』！继咸以为然。出城，面责良玉；良玉疾方剧，望城中火光，大哭曰：『予负袁公』！呕血数升。是夜，死；秘不发丧，共推良玉子梦庚留后，急移兵东。

北兵陷泗州。

初，北兵破归德，犹盘桓未下；徐州兵民咸惊溃，督王永吉急调阁标及甘肃团练救之。忽奉密旨「急撤入卫」，于是各兵经趋江上，徐州寂然矣；乃□上言：『北兵已入虹县，距泗州仅二百余里。万一泗河不守，则阑入盱眙。查盱眙东南一路，从都官堂可达淮安；正南一路，从连塘可达扬州；西南一路，从天长可达六合、至浦口。不但淮、扬难支，且向江干问渡矣。乞敕总督卫胤文、提督刘泽清等以全力守徐、泗，保全江南，尚存门户。却以江南全力防寇、防北，庶不致四面受敌也』。至是，失。

命兵部尚书阮大铖、诚意伯刘孔昭帅师御左良玉。

良玉兵既下，方国安时镇池口，仓皇报「良玉反」。阮大铖遽张示于外，极诋良玉父子济恶。良玉一面举兵、一面祝土英生辰，数日内，疑信相半也；大铖与孔昭请帅师出。而黄得功北至，亦云誓扫「大逆」；大铖出以示人，人心稍安。然皆不知良玉死也。

丁巳，命予原任都御史刘廷元等赠谥、祭葬，荫子；徐大化等赠祭葬、荫有差。

时现存唐世济等以次第起用，左副都杨维垣复疏及死者，谓「宜亟恤」。于是吏部尚书张捷言：『欲白后案之臣罪，先明前案之臣忠。前案者何？三朝以来有张差、李可灼、王安诸案是也；后案者何？魏忠贤伏诛案内有真党恶、真害人者是也。自神祖中年，东宫未立，言国本者自是惠爱生论；及国本既定，言者不止有君老附世子之嫌不避也：犹可言也。标我之名，必毁人之名；躐我之位，必倾人之位。始于一时之风影，成于众口之吠声。上谤君父，下诬同朝：不可言也。其曰某赵宣、某许正，本无是事，群附和以实之。其曰某建祠、某诵德，原有的确，而扯及无干则诬矣。今前、后案所錮与门户所摈，如宪臣杨维垣疏列刘廷元、吕纯如等，皆可诬为贼、指为群党；岂知红丸议起，正终正始之论止有三疏议单有数十人、不持时论者十余人而已。刘廷元首以「风魔」定张差案，其为举朝侧目者此二字，其善处先朝骨肉者亦此二字。吕纯如参闽藩时，内臣高□手剑劫抚臣驱车驰至，徐把臂夺剑，遂定其变。忤时齐志，舆论惜之。黄克缵顾命之际，以亲见折红丸之谤；霍维华玉几之际，熹庙口称「信王」，维华高声承旨，出召先帝而社稷定。徐景濂红丸、移宫一疏，明目张胆，发舒三朝慈孝。王永光为太宰，铁肠冷面，瑯焰时（？）一疏数千言，侃侃论列。许鼎臣为考功，亦仿此意；抚晋时，终日焉□杀贼，多俘剿功。徐绍吉网罗三案，勒成「要典」，分别诸臣功罪最着。至于徐大化、徐扬先、章光岳、岳骏声、范济世、徐卿伯以至宪臣疏所未及尚有杨所修、刘廷宣、姜应麟、陆澄源、王绍徽、徐北魁、乔应甲，总皆独立不惧，不傍门户臣也。而章光岳清修劲骨，尤称表表；杨所修正色昌言，罢官居家，骂贼遇害。臣窃有进焉者，前争国本与辨慈孝者，岂非同忠于光庙？而何以袒分左右？惑也。前罪王安与后罪魏忠贤者，岂非恶恶同污？而何以仇若敌国？又惑也。王德完持国本之论，于廷杖之下大呼「中宫安，则皇长子安；皇长子安，则天下安」！倘身后之恤典未备，可无念其人乎！辅臣韩矿以顾命亲见，折礼卿经年臆说；宣付其疏，是非遂定。后来定「逆案」虽非，然前疏所关不少；今「实录」未采，可废其言乎？宪臣为诸臣发愤，或未暇及此；故臣等敢平心贴出，补此一段公案也』。时全予者，廷元、纯如、维华、德完、克缵、永光、所修、光岳、绍吉、景濂；准赠荫、祭葬者，大化、济世；赠官、祭葬者，扬先、廷宣、鼎臣、骏声、卿伯、应麟；复原官者，绍徽、兆魁、应甲、澄源：共二十二人。廷元、所修、绍徽、北魁、绍吉、维华、纯如、济世、骏声、大化、应甲皆案中「为民」，而景濂、杨涟则「闲住」也。惟贾继春列维垣疏内独不及，或以其翻复；而应甲抚秦贪，又不列原疏。人以为滥。

左梦庚兵破建德县。

升广西按察使叶重华太常寺少卿、广西僉事林铭鼎光禄寺少卿。

加诚意伯刘孔昭太傅。

命御史夏继虞巡按应、安。

继虞先令怀宁，阮大铖所■〈目匿〉也；故用之。后降北，为安庆道僉事。

戊午，实授梁云构兵部右侍郎，起升原任陕西巡抚李乔兵部添设右侍郎，起原任光禄寺少卿周宗文原官。

乔，先抚陕西；以按臣纠，戍。

命江督袁继咸以讯王之明「实录」昭布中外。

初，继咸以太子一案见疑左良玉，恐召大衅；乃疏言：『太子真伪，非臣能悬揣。真则望行良玉言；伪则不妨从容审处，多召东宫旧臣识认，以解中外惑』。疏未达，而良玉已反。至是方达，故即命继咸昭布；盖疑之也。时督臣何腾蛟亦同时言之，然无深求者。

左梦庚兵破彭县，沿途杀掠甚众；舟楫连二百里。

命提童氏随役解京复质。

初，传致童氏者为庶吉士吴尔勋。至是，命提讯；因效用督辅可法军前为请，得免。襄卫伯应俊随上藩邸亦疏童氏皇嗣绝影响（？），然外疑愈甚。初，阁臣士英闻童氏至，曾拟疏欲上；言『皇上元良未定，奸党宗藩尚怀觊觎。若果真，当迎童氏归宫；密令河南抚、按设法迎致皇子，以消奸宄。若谓童〔氏〕流离失散，不便母仪天下，则当置之别宫，抚育皇子。昔汉高祖开基，英主也；吕后为项羽所获，置军中者数年。唐德宗母为乱兵所掠，终身访求不得。宋高宗母韦氏、后邢氏皆为金掳，韦氏终迎归，邢氏亦遥加后号。古帝王遭时不造，如此等事多矣。况童氏寄居民家，何嫌也』！疏成，以从龙诸臣皆云「诈伪」，且潜邸宫人无生子者；遂止。至是，复刊其疏欲自信；人终不信也。

己未，升光禄寺卿祁逢吉户部右侍郎兼都察院右僉都御史，总督仓场。

逢吉素与周鏊隙，逢人肆詈，故得迁；又说兵科王士禛纠史可法、郭维经、韩赞周等，或沮之，乃止。赞周识大体，虽司礼首员，然以从龙屈尚忠等横，持之不得；移病而已。

左梦庚兵破东流县。

加湖广巡抚王骥兵部右侍郎。

时甫离京师也。

没守制太仆少卿张如蕙银充饷。

如蕙闻左良玉内犯，仓皇出都，资装甚盛。守门内臣发现珠玕灿目，群攘之，立罄；仅以银七千两闻。各衙门原解印封尚在，然以秉宪颍州与阁臣士英兵事（？），故仅没银充饷而已。于是内臣以宦橐为奇货，日肆搜求矣。户科张利民疏纠如蕙；报闻。

命兵部尚书阮大铖会同黄得功堵剿左孽。

时督辅可法亦集兵策应；未几，渡江，将抵京师。会传上游事讹，可法母留京师，咫尺不得见。说者谓士英首辅自命，恐可法至，耻逊班行也。

命毖门禁。

庚申，准张国材袭封安乡伯。

弃光时亨、周鍾、武愬于市。

先数日，御史张孙振鞫时亨与鍾，命答之。时亨等曰：『杀则杀，可辱耶』？孙振大骂，重杖三十。□□□□因左良玉叛，人心汹愤；忽传圣谕：『光时亨因李明睿不同声气，力阻南迁；周鍾以词臣降贼，仍敢无礼于先帝。武愬受贼伪命，为贼任事，牌示有据。着即照原议会决。其余拟斩的，发云南金齿；拟绞的，发广西地方充军：各终身。军罪以下为民，永不叙用。有蒙眊荐用者，以本犯原拟之罪罪之』。三人遂骈诛，后北兵入南都，孙振亦迎降；行过市，市人语之曰：『若非前讯周鍾等掩面号为「逆贼」。詈不已而秩者耶？今亦作此面孔，何也』？孙振无以应。

赐周鏹、雷演祚自尽。

旨言其结党乱政，谋引兵别图拥戴故也。先是，左良玉内犯，疏言：『臣提师在途，恐百万之众发而难收，震惊宫闱；且声逆贼马士英罪状，正告陛下。自先帝之变，士英利灾擅权，事事为难。「逆案」先帝手定，士英首翻之；「要典」先帝手焚，士英复修之：罪一。越其杰以贪罪遣戍，不一年立升部堂；张孙振以赃污绞犯，不数月夤缘仆少；袁弘勋与张道浚同诏狱论罪，借起废起复原官。他如杨文骢、刘泌、王燧、黄鼎等叛逆，皆用之当路：罪二。己为首辅，用腹心阮大铖为添注尚书；又募死士伏皇城，诡名「禁军」，动曰「废立由我」：罪三。陛下即位初，恭俭上明；士英百计诳惑，进优童、艳女，伤非盛德：罪四。引用大铖，睚眦杀人；如雷演祚、周鏹等，锻炼周内，株连蔓引。尤其甚者，借「三案」为题，将平生不快意之人一网打净；令天下士民，重足解体：罪五。目今皇太子至，授受分明。士英

、大铖一手拏定，抹杀的认之方拱干，而信朋谋之刘正宗；忍以十七年嗣君，付诸幽囚。凡有血气，皆欲寸磔士英、大铖等，以谢先帝！此非臣私言；诸将士言，亦天下忠臣义士、愚夫愚妇之公言也。伏乞立肆市朝，传首抒愤』。士英等大恐，故两人及祸；临命时，特书「先帝遗臣」四字于腹，乃自尽。初，少詹吴伟业已奉差行，与戎政尚〔书〕阮大铖别；大铖曰：『上仁柔主，一切生杀予夺，惟予与数公为政。再，归语声气诸君：猿鹤梦稳，定不起同文之狱也』。又曰：『周鍾、光时亨自有公论，周鑑无死法；惟雷演祚当正大法耳』。又御史张孙振以必杀时亨、鍾为志，曾言之刑科都钱增，兼及于鑑；增讶曰：『鑑，非从逆者』。孙振曰：『当以「门户」诛』！增心不平，故以乞差行。朝行，而数人暮及。

命督辅可法督李本身扼盱眙，进守徐州；刘良佐驻临、淮，守寿州，以防北；黄得功渡江防剿。

旨云：『上游急，则赴上游；北急，则御北』。亦岌岌矣。

辛酉，命黄得功督驻兵于荻港、旧县、三山，俟有警再进。

时左兵连破郡邑，犹无确报：或言左，或言牟文绶兵假充左兵抢掠。适御史黄耳鼎仆自武昌至，谬云良玉坐镇如故。士英悦，请假祝生辰；或叹曰：『若此闻先一日，光时亨不死矣』！盖以为信然也。

命新赦梁兆阳赴靖南侯黄得功军前，白衣自效。

得功请之也；新旨不复问矣。

癸亥，进封郡王韦澄为襄王，封潘氏为王妃。

升刑科左杨兆升户科都给事中。

兆升，崇祯时为南礼科。因南垣□北垣后，合纠吏部左侍郎张捷荐「逆案」，独兆升不从，故察。至是，捷决意予环；虽吏科都张希夏抄参，罔恤也。不月余，遂擢今官。后以请缓剃发，为北来知府宗灏立捶死。

改兵部主事李毓新试兵科给事中，仍管职方司事。

甲子，准原任总督杨鹗以原官留驻常德开屯，并联络土司。

择于〔十〕五日选中宫。礼部尚书钱谦益请并选东、西二宫。命候旨。

乙丑，准原任推官周之夔〔□〕原官，仍候考选。

之夔，先为苏州推官；以太仓漕粮与同年庶吉士张溥、原任临川知县张采左，引目疾归里。巡按福建陆清原纠其不法，列款甚多。之夔疏言清原本吴昌时社党，为溥等修隙，故陷己。内云：『祖宗三朝，孝慈仁圣；尚敢造本无之事，上谤宫闱。我皇上天与人归，大统攸集；尚敢怀二心、持异议，谋危社稷。党人手段若此，况区区微臣哉』！时御史张孙振，清原房师也；欲言清原之纠非是，故之夔胜。

赦「逆案」戍犯李承祚罪，准还京。

从礼部尚书钱谦益请也。

左梦庚兵破安庆。

时传黄澍从乱，巡抚张亮被执，城中杀掠甚众；阁臣士英方擎觞，忽闻问，卮堕地。

命刑部速刊王之明情词，付赍谥诏使臣逐郡宣布。——从御史张兆熊言也。

丙寅，南安侯俞通源裔国勋请还祖爵。命吏部奏核。

国源父子、弟兄俱以功勋，且殉节；量予恩，非滥。惜国亡，不果。

复原任为民吏部侍郎林栋隆原官。

栋隆坐故辅薛国观累，为民。

命钦遣及赴任各官俱请旨验放商贾小民不禁。

命兵部尚书阮大铖、应安总督朱大典等巡抵河口，相机扼剿。

广昌伯刘良佐入卫。

戊辰，诏责江楚总督袁继咸。

时继咸疏言左良玉称兵，堵止不得。故「责以身为大臣，兼拥重兵；何云不得」！

北兵分道南下，总兵李成栋弃城走；督辅可法请召对，命已之。

时北兵已迫，或言北、或言许定国薙发假充北兵；中外犹泄泄也。巡按何纶疏正文体，阁票云：『鬼语四六，不雅不奇，一味□□糊语』。

命移王于湖州。

时以辅臣、总宪皆湖郡人；绝窥伺也。

命移周、鲁二藩于江西、广东，择郡安顿。又召惠王并桂王子安仁、永明二郡王赴近畿居住。

初，诸臣日忧潞王睥睨，且以东林不忘拥戴，借题□剪。惟工科都李清曰：『但移惠、桂二藩于近畿，以待皇子之生。若其未生，有亲藩在；彼疏藩耳，何睥睨、亦何拥戴』！时皆然之。至是，乃行其言。会国亡，不果。

新升广西总兵黄斌卿连破叛兵于灰河、大同等处，以捷闻。

斌卿新命离九江，忽闻左兵叛，以旋舟追上□□五□□□□□等鼓以忠义，厚犒之。自初一至初五，连战皆捷；前后焚舟百余，溺死千余人。并获其奏檄书牒甚众；内贻礼部尚书钱谦益一牒，有「废置」语。斌卿初欲奏闻，恐为诸人祸，乃止。遂具疏报捷，扬舟赴广西。

荫总兵刘洪起一子锦衣卫百户。

庚午，撤总督田仰回，以王永吉为总督兼河道，巡抚淮安、凤、庐等处；以盐法都御史钱继登兼巡抚扬州。

仰，后降北。

加御史郑昆贞尚宝司少卿仍旧。

复已故为民左庶子丁进原官。

进险躁，以南闱累。

送原任河南巡按陈潜夫于法司。

潜夫以京城破，归里。后北兵破绍兴，潜夫沈妻、妾于河，投水死。

复已故行人韩敬修撰。

辛未，加兵部主事黄国琦试兵科给事中。

起升尚宝少卿范凤翼光禄寺少卿。

赠工部尚书张辅之太傅，荫子。

左梦庚兵攻池州，拒却之。

初，梦庚擅总□任，佯语江督袁继咸曰：『先父不幸亡，今至池州候旨』。继咸曰：『如此尚可为！抵池，庶亦得朝命』。密以疏闻，道梗不得达。诸兵将果复攻池，池郡以拒。

晋黄鼎官衔一级。

壬申，诏□左良玉逆状，罪止大戮，胁从罔治。

吏部尚书张捷等请之也。疏并及袁继咸，指为同谋。时同乡太仆少卿万元吉亦密语御史乔可聘曰：『有之』；一时无以辨也。

赠原任南赣巡抚洪瞻祖兵部尚书，荫子。

癸酉，上召对群臣。

时南北交急。大理少卿姚思孝、御史乔可聘、成友谦，皆杨人也；奏「左良玉缓，北尤急；乞无撤江北兵马，固守淮、扬，控扼颍、寿」。上曰：『刘良佐兵，还留江北防守』。士英侍上御前，战手詈曰：『尔辈东林，犹借口防江，欲纵左逆入犯耶！若敌至，犹可议款。若左逆至，则若辈高官，我君臣独死耳！臣已调良佐兵至江南矣，宁死敌、无死逆』！举朝皆失色，有「贾似道弃淮、扬」之诮。时上虽忧形于色，犹顾友谦曰：『若成某耶』！盖往者播徙时，曾饷上于危也。

命罚六科都给事中俸。

时九卿、十三道合纠左良玉公疏已上，两得旨；惟六垣疏未上。吏科都吴希哲初大言曰：『今日所重不在楚，宜出公疏纠揆地；并请固守江、淮』。然逡巡未敢也。已以防江公疏上；有旨责六垣无疏讨良玉，故罚之。

予原任礼部尚书吴山荫，仍与谥。

准礼部左侍郎管绍宁回籍。

绍宁始失部印，继连为同里主事贺儒修所攻；故去。后为北常州知府宗灏所杀。

总兵郑鸿达奏破乱兵于江中，获马千匹、舡二百余只。

时许定国以北兵至，高杰妻邢氏率子以兵三千走泰州，余兵于十四日尽焚瓜洲营，趋镇江，杀放所掠者而更掠；鸿逵梟其先渡者十七人。高兵尽以粮艘载輜重、妇女南向，鸿逵复拒之；炮沈其舟者半，半东下入海。

北兵入瓜洲。

高杰兵溃，民方返故居；忽北至，遂入城——扬南北皆敌矣。

甲戌，命驱江北岸及濠河官民船、仪真盐艘于南。

命靖南侯黄得功移家镇太平，一意办贼。

进靖南侯黄得功左柱国，荫一子世锦衣卫指挥僉事，赏银、币。

得功奏：大破左兵于铜陵，解其围故也。时左梦庚部将李国英纵兵打粮，与官兵格斗，梦庚兵多伤；遂以大捷闻。诸将愤愤，将合力趋芜、采；袁继咸曰：『如此是终欲为乱也』！而斥黄澍等误国。贻诸将札，譬以大义；不听，则赴江流死。中有惠登相者，系继咸抚郅时招安；是其言，诸镇将乃议还师。阅日，朝使至，方知北兵已陷泗，逼仪、扬矣。

命总督王永吉救扬州。

乙亥，起原任广东左布政姜一洪太仆寺卿，湖广按察使恽厥初、福建左布政胡尔慥俱光禄寺卿，浙江按察使王梦锡太仆寺少卿，各添注同礼部尚书钱谦益。

北兵破扬州，知府任民育死之。甘肃□练总兵刘肇基逆战，及原任兵部侍郎张伯鲸俱遇害。

扬城颇坚，督辅可法在焉；北兵从西北隅以大炮击破，遂入城，死者甚众。肇基抗敌，力杀数人，无继者；遂见杀。可法或云见执，叩之不应，见杀；或云不知所之。民育衣冠坐堂上，兵至不屈，碎其尸。伯鲸誓守危城不出，遇害。

升御史刘光斗大理寺右寺丞。

后降北，复为行人司司副。

丙子，留任□巡盐御史李挺于浙江，命都察院无得推缺。

旨言：李挺任内欠课银二十余万，不许离任；实庇之也。

丁丑，命诸将有缩朒起窜、一舸窥江者，不论兵、贼，立行扫除。

锡襄卫伯常应俊、内臣高尚义宴，出师。

戊寅，升浙江水利道李白春光禄寺寺丞。

追赠故兵部尚书于谦临安伯。

时于之英以夤缘，几冒伯爵；御史乔可聘等以非谦系，无画题者，遂止。追封议。初，浙有三大功臣，刘基诚意伯、王守仁新建伯；至是，谦复赠伯。

升御史霍达都察院右佥都御史，巡抚常、镇等处。

达后降北，仍为御史。

命内臣卢九德救扬州，总督王永吉、镇臣刘良佐、刘泽清等合兵援扬。

扬州已破三日矣。永吉后降北，为大理寺卿。

己卯，升尚宝司少卿王鼎镇应天府府丞。

兵科右吴适疏列维扬战守机宜。报闻。

遣保国公朱国弼祀孝陵。

以忌辰也。从此辍祀矣，呜呼！

革兵科左吴适职，命锦衣卫监候。

适言：『顷闻建德、东流失守，是贼、是兵、是为谁氏兵，未有确据也。近接塘报，云荆镇牟文绶兵；又云铜陵西关之焚掠、南陵城外之图劫，是方国安兵。文绶骤膺大帅，沿途观望；苟复纵掠，尤属非法！国安受国厚恩，无驰剿、有焚掠，是拒虎进狼也。乞敕监军按臣确察是否。两镇兵马再若违延，惩以失误军机律』。疏奏，阁臣士英以不纠良玉而纠文绶、国安，拟旨切责之。至是，辅臣奕琛劾适党叛，遂下狱。次日，御史张孙振复补纠，言『适为东林衣钵、复社渠魁，又文震孟、姚

希孟的派。宜立正两观之诛』。皆阿辅臣意也。初，张希夏为吏科时，移适代守吏科；如杨兆升、戴英等不宜以察处赐环，「逆案」陈尔翼不宜以荐崔呈秀为本兵录用，皆希夏命题而适拟稿；然希夏不认也，故众怨皆积于适！其胎祸以此。又适为浙江刑官时，与陈子龙等会讯蔡奕琛一案，按臣左光先题覆，得严旨「永戍」；故衔恨光先、适为最云。

庚辰，赠操江都御史唐际盛兵部右侍郎，荫子。

升常镇副使马鸣霆尚宝少卿。

加锦衣卫冯可宗左都督，进宫衔一级。

辛巳，升鸿胪卿徐一范光禄寺卿。

后降北，仍为礼部郎中。

加赠故户部尚书毕懋康右都御史。

命户部右侍郎申绍芳督催江南钱粮。

偏安排日事迹卷十三

五月壬午朔，升原任吏部郎中李彬都察院右佥都御史，巡抚河南。

升兵部郎中杨文骢都察院右佥都御史，巡抚苏、松等处。

□上江再捷，进封靖南侯黄得功为靖国公。

升御史徐复阳太仆寺少卿。

丁亥，北兵自瓜渚薄镇江，总兵郑鸿逵力御之。

越二日，报鸿逵据京口，与北兵水战大捷；戎政颁赏有差。

加总兵刘肇基二级，荫子锦衣卫千户。

庚寅，〔□〕兵潜师渡江，我师溃；郑鸿逵、杨文骢遁。

江上相持者三日；会是日大雾，北兵乘雾自七里港渡，雾□见有兵驻江上，未知何兵。及飞矢如蝗，群惊曰：『北兵至矣』！步兵仓皇列阵甘露寺前，北兵以骑突之，悉溃走。闽、浙步兵焚掠至丹阳入浙，鸿逵等以舟师入海。

辛卯，车驾夜狩太平府；依靖国公黄得功也。

初，北兵南侵，保国公朱国弼等屏人密奏；上慨然曰：『太祖陵寝在此，走安往！惟死守耳』。至是早，北兵渡江信至，中外大震。上，薄暮开通济门，仓皇出狩；百官犹不知，但夜闻甲马声。次早，犹有入朝者；见内臣纷纷四窜，始知驾已出宫。先是，四月中督辅可法屡疏告急，士英惟票旨「下部」；故金陵寂然。及扬州破，大江中无一舟渡，南北声绝。迟至二十九日，兵部始得报；民间犹未知也。朝廷方恃长江天险，转官、予荫，若无事然。兵科吴适曾诣兵部商防江大计，职方王期升答言：『长江之险，北兵决难飞渡；何足深忧』！适向同官叹息而已。至是，城守无备，一朝狼狈，通国恨之。时士英见事迫，深恨阮大铖、张孙振误己；孙振往见，叱不纳。然无及矣。

壬辰，马士英出奔；乱民拥立王之明于京师。

上之出奔，士英犹不知。惟戎政侍郎李希沅先知，遂行；士英犹后之也。凡携家者，皆瞻顾不能行。初，之明屡讯，百官皆知伪；然民间犹啧啧真也。至是，二、三劣衿为首，率乱民拥立之，御殿三日。又群往赵之龙寓，邀百官入朝；之龙手斩为

百〔姓〕劣〔衿〕三人，乃退。执之明，系。广昌伯刘良佐无拒北意，惟南门外纵兵焚掠。百姓恐攻城，彻夜惊呼；乃议推保国公朱国弼为留守官。之龙密遣使渡江，启迎北兵；时诸臣犹不知，集议礼部尚书钱谦益所。谦益太息曰：『事至此，惟有作小朝廷求活耳』！拟启稿送之龙，之龙置不用。内库银、绢、米、豆、服玩、弓刀之属，皆被劫罄。掳马士英及群党家，又令力剿士英标下用兵几尽。初，辅臣王铎青衣谋遁，识者指骂曰：『若膺太子，辜先帝恩』！群捶之，须发尽秃。搜至之龙处，汹汹欲扑杀；之龙伴下之狱，故免。室内所蓄书画极多，与货俱尽矣。张孙振惧及祸，极冒士英党翼身，免；人皆笑之。

甲午，北兵至大教场，扎营城外；文武官俱迎降，吏部尚书张捷、刑部尚书高倬、左副都御史杨维垣、礼部主事黄端伯、户部主事吴嘉胤、中书龚廷祥皆死之。

是日，刘良佐兵方肆掠城外，望北兵至，倒戈降；将伏不敢动。文臣钱谦益、梁云构、张孙振、刘光斗、宗灝等五人——武臣赵之龙先迎，后皆续往。时兵部侍郎李乔、大理少卿姚思孝已薙发为僧，之龙亦勒之出，同谒。王赐食饮，席地瞰。之龙，靖难功臣赵彝后；至是，首启门降。诚意伯刘孔昭独率麾下兵，先斩关出走。豫王勒各官具花名手本画卯，不到者搜捕，咸加皮鞭；点名者，两大学士王铎、蔡奕琛也。惟维垣先命二妾投井，一妾从之；一妾不从狂奔，命追执之，亦沈井。正衣冠，自缢。端伯安坐私寓，不报名；兵至□，执其妾而捶之。端伯傲然不视；曰：『杀即杀，誓不投谒』！被杀。嘉胤先奉差出都，闻北兵渡江，复回车寓城外僧寺；上书求复明社稷，屡请不达。及书上，命二仆携冠带至南门外方文正公祠前，整冠四拜，缢于树。一仆欲解救之，一仆曰：『不如令主人尽节』！遂死。廷祥遗书与子，誓不事二君，又引马世奇、刘理顺两师死节自励，谆谆以老母为念，言不及私；遂投武定桥下死。捷，初闻变，拟积薪自焚；已不遂，复走缢鸡鸣寺。倬，以北豫王将入京，左右侍郎约倬出迎，不从；缢于寓。徽州监生吴可箕题诗明志，亦自缢。某鸿胪不缴印，为苍头所见，杀。一丐者题诗鸡鸣寺，自缢死。

戊戌，北兵进守皇城。

豫王先遣兵千余，命礼部尚书钱谦益等统之搜宫；方入坐定，即问「崇祯太子安在」？乃出王之明于狱，与并坐；指诸臣曰：『此真太子也』！已见内外俱定，乃屏不召。时谓之明之南，乃北廷所遣；以搅惑臣民也。

北兵奄至太平府，靖国公黄得功、总兵翁之琪战败，死之；上遂入北营。

初，豫王至城外，即驰遣骑兵数千往芜湖袭驾；无一人知者。时上已至太平，犹寂然。朱大典、阮大铖入见舟中，俱入阁。得功见上，誓力战报。未几，得功兵四出掠民家。北兵突至，得〔功〕仓皇出战；初中一矢，犹不退；继矢贯其喉，知不济，自刎死。副总兵翁之琪，亦投江死。中军田雄入上舟，上降北；马士英先期奉皇

太后走浙矣。上至南京城外，诸降臣顿首豫王前，求无死，且求往见。豫王曰：『惟弗行君臣礼，可矣』！时上戴僧帽、着蓝布裤；马（？）。寻入城，诸臣往见，一揖一叩首。上对诸臣泣，众皆泣。寻北狩。

左梦庚挟江督袁继咸叛，降北。

初，马士英以封爵啖诸镇，购黄澍；诸镇益不平，阴画计降北。继咸孤舟，因丛棘中命人语邓林奇等：『不可为此不忠事』！林奇与汪硕画、李士元移舟避皖湖中，阴遣人迎继咸。时逆弁郝效忠方与惠登相合营，佯以登相意，遣使迎继咸赴其军，去入江省为后图。继咸信之，乘风往。将及湖口，梦庚遣悍弁李致和挟舟行甚速；距九江三十里，则北兵营在。继咸见八王子，不肯屈；曰：『某国重臣，受累朝厚恩；岂肯事二姓』！乃拘以北；职方李犹龙以署皖钺行、黄澍以署浔道行矣。继咸后至燕，以不屈遇害。

偏安排日事迹卷十四

六月，刘光斗、黄家以北兵抚命至江南，巡抚杨文骢遁。

是时苏、松等处各邑多起义者，文骢剿兵入苏，擒家鼐斩之。寻见北兵大至，仍遁入海。

原任浒墅关员外程良孺被杀。

良孺，右春坊正谏父也。南京破，未解任；先薙发降，以原官管关。时士民方以起义为名，良孺遂被杀。

长洲诸生顾性之儒服投泮水死。

甲子，〔□〕兵至杭州，潞王及巡抚张秉贞以皇太后迎降；钱塘知县顾咸建被执，死之。

马士英挟皇太后渡独松关，沿途肆淫掠。至广德州，州人拒之；攻入城，知州赵景和被杀，死者甚众。杭州民闻之惧，按、抚等先遣官往迎，以驻兵城外请；士英至，寓临湖小瀛洲。五月二十八日，皇太后驾至，以城□□兵府为行宫；群臣及潞王往朝，入见仪卫萧条，疑为士英母所假。薄暮，城中置宁、太平二坊民竞以炮竹投楼外；士英方宴，惊走，以二楼船舫湖心亭。至晓入朝，用精甲百许自卫请。

太后出，服赭，一紫衣女官侍；令官吏士民皆入见。朝罢传旨，乃用在籍诸臣，独不及刘宗周、章正宸。时江北巡按彭遇瓢适奔杭，命以佾都御史募兵两浙，钱粮凭取用；皆士英意也。翼日，宗周与熊汝霖入朝；汝霖见士英，诘「圣驾安在？辄来此」！士英无以应；然犹盼上江捷。不数日，阮大铖、朱大典、方国安俱仓皇到，则〔□〕得功兵败死。以次日请潞王监国，不受；太后召，泣拜，终不受。惟迎太后入府，从张秉贞、陈洪范等计迎款而已。楚藩一镇国将军恸哭，解衣冠投地去。时杨文骢、郑鸿逵亦自海入钱塘，请王入□□，终不许。至十三午，北兵突至，士英等方与抚、按饮；□急渡钱塘，按臣何纶、抚臣李挺亦行。惟抚臣张秉贞縋城入，偕王出迎贝勒；钱塘知县顾咸建亦佯迎，旋遁。执至，迫之降，不从；见杀，悬其头城上——方暑，蝇无集者。越月余，贝勒挟太后、潞王等北去。洪范与北通，许割地、封王；故王为所欺而降也。初，上既失国，咸恨不立潞王。时太常少卿张希夏奉敕奖王，独语太常寺丞李清曰：『中人耳；未见彼善于此！王居杭时，常命内官下郡邑广求古玩；又指甲可长六、七寸，以竹筒护之：其为人可知矣』！大理寺少卿沈胤培常曰：『使王立而钱谦益相，其败坏与马士英何异』！初，孝庙于天启七年即位，一日，召诸阁臣入内殿，密谕云：『今日有一异事：清晨，某内官来报，说某殿柱上置一黄袱；取视，内一纸云：「天启六、崇祯一，还有福王二十七

」。此妖言也，合根究』。阁臣揭请焚之，乃允。时来宗道为阁臣，揭现存家；所云「崇顿一、福王二十七」者，以十七移置崇祯名下，则福王正得二也。王自崇祯十七年登位，至弘光元年灭；凡二年。兴亡之兆，盖有数云。

闰六月，〔□〕摄政杀明使臣兵部侍郎左懋第及其同行五人。

初，懋第抵燕，议见摄政礼。总兵陈洪范等皆言「欲全国以全身，非屈膝不可」！独兵部司务陈用极毅然曰：『我辈千秋气节，皆系于此。彼建屈膝之言者，皆中□也』。时懋第亦以敕书内「不屈膝，即为不辱命」一语故，持初议甚坚。及追回改馆大医院，懋第题其院门曰「生为大明忠臣，死为大明忠鬼」。至是，闻南都已陷，懋第等皆泣，尽哀；然摄政亦无意杀之也。会中军艾大选先薙发，叩劝懋第早降；懋第怒，勒杀之。其同谋监饷傅浚惧，告懋第勾引齐寇，谋危社稷。摄政遣兵入院，勒诸人剃头降；懋第大呼曰：『我头可断，发不可落』！时用极与游击王一斌、都司张良佐、王廷佐、守备刘统皆不屈，遂执下刑部，重炼三匝。旋移水狱，七日不饮食；逼降，不应。执见摄政，懋第仍服母丧，偕用极长揖，南面坐。摄政〔□〕懋第以伪立福王及勾引齐寇状；懋第曰：『我先皇痛罹大变，以亲以序，当立福王；何言伪立！山东豪杰皆忠义有为，前就见我时，亦勉以大义；亦□土■〈寇，女代支〉』！既又历数摄政不郊迎使臣、不以龙亭出接御书罪。又言：艾大选薙发劝降，应诛。曰：『我血性男子，到此有死而已』！摄政指用极曰：『尔何人？亦不跪』！用极曰：『我兵部也。三尺童子，皆知节义；况我大明人耶』！摄政命捶其颊，用极嚔血呼曰：『士可杀，不可耻辱』！摄政复从容曰：『汝等不怕死，信忠臣也。然降，当不失富贵』！懋第曰：『薙发，不如断头』！摄政命左右拽出，复遣降臣劝曰：『先生惧乎』？曰：『无问我惧不惧，且问若辈羞不羞』？至顺城，又遣满官以封王啖之。懋第曰：『我宁为大明鬼耳』！将刑，顾谓五人云何？一斌等皆曰：『愿从死』！懋第曰：『但恐有悔』！用极曰：『求仁得仁，又何怨』！懋第南向，叩首泣曰：『臣心毕矣』！遂彼杀，五人皆争就死。忽沙风四起，屋瓦皆飞，卷布棚于云际。观者近万人，皆为流涕。

七月，唐王称号于福州，改元「隆武」；遥上王尊号曰「圣安皇帝」。

明年五月，王遇害于燕京；潞王等数十人俱见杀，王之明亦伴死。

上燕居深宫，每徘徊诧叹；谓「诸臣无肯为我用者」！于声色，罕近也。然读书少，章奏未能亲裁，故内阍、外壬相倚为奸，皆归过于上。如端阳捕虾蟆，此宫中旧例；而加以秽言。且谓变童季女，死者接踵；内外喧传，罔辨也。及国亡，宫女皆奔入民家，历历吐状；始得其实。又旧辅吴姓寓居溧水，曾见大珰，询及宫中女皆奔入民家，历历吐状；始得其实。又旧辅吴姓寓居溧水，曾见大珰，询及宫中事。言上饮酒宴乐，有之：纵淫方药等，传闻非确；惜为马士英所挟耳。盖缘士英为御史黄澍所纠，密疏言「上之得立，由臣及四镇力……」。……其言（？），为雨泣

久之。其后一切朝事，俱委士英。又言士英听阮大铖奸谋，欲以「三朝要典」闯击事兴党人之狱；上独不允。亦可想其为人矣。